

近代中國史料叢刊續編第八十三輯
沈雲龍主編

石

船

詩

存

陳毓華著

文海出版社

有限公司

印行

桂陽陳毓華先生遺著

石
胎
詩
序

趙恒惕署



五十一集

石船詩存序

憶自民國十年至三十六年之間先後與於文字之役者四人同里李君鶴祚
鳴九桂陽陳君仲恂毓華醴陵傅君君劍熊湘衡陽馬君幼蘇聲琰是也仲恂君
劍以詩鳴幼蘇雄於文鶴祚兼擅書法皆深入古人堂奧而並世無間然矣鶴
祚為幼年同學次則仲恂交最久亦最先清末由日本假歸過武昌隨程君嵩
生訪鄧君芷溪於府署寓所為與仲恂邂逅之始仲恂甫逾弱冠其詩文已為
大吏張公香濤端公午橋所激賞翌年遊學東京與予過從益密逮余主湘乃
延入幕每撰函聯輒膾炙人口仲恂短小精幹言多鼻音非素識者不悉某年
由天津歸傳夏君午詒言願使奉天說張督兩亭釋紛仲恂願銳身自任余從
之卒以言難達意不諧而歸是其未嘗無意於當世之務而不圖遂以詩人終

也余治軍岳陽公務多暇輒與論詩仲恂謂詩非絕頂聰明人不能作則其肆力於此而有以自信者深矣其後轉任京職窮困如故每以詩示余余曰窮而後工於君益驗願非自入陷穽耶仲恂不以為忤余於詩所知甚淺曩居北京與曾重丈廣鈞相去咫尺日作圍棋戲偶有請其代作詩文者一局未終所作已竣竊嘆其秉賦特異殆於五官並用因憶往侍譚畏公延閣見其口談手批同時並運是與重丈皆非常人所及余日從重丈棋戲歷時數年竟未能學其詩則於仲恂之所造詣固無從測度者矣仲恂於抗戰勝利後卽世暮年遇一麗妹委身相從執奉維謹知交僉稱晚福是亦冥冥中有以酬其終身之潦倒耶仲恂遺著石船詩存曾君履川由香港寓書鍾君槐村謀善付梓蓋距仲恂之歿十餘年矣槐村與仲恂三世通家相與力贊其成遂得問世願是集僅載貽余之作二三首殆其自為刪除或所收有未盡耶慮後之讀是集者或疑我

二人相交非久因書數語弁於卷首至是集之付剞劂踉蹌兩年卒獲時賢慨助使仲恂苦吟畢世庶幾身後一篇存其姓字因念君劍於民國二十年病歿於長沙鶴祚幼蘇於共匪陷湘時或病逝或遇害所傳各異生平字雕句鏤未嘗不為千載計曾幾何時秦火燎原則又未易較其倖非倖也

中華民國五十年秋書於臺灣趙恆忍

石船詩存序

余嘗愚為朋輩刊遺集以為文人嘔心之作窮畢生精力為之重逾于其性命遠甚若令長泯滅非天下至可憾痛之事邪往為亡友王子調父刊猛悔樓詩乞喬壯翁序其端翁獨笑謂余曰子之孜孜為是友朋其有所託命矣異日彙成叢書以腹痛墟字之其可乎余笑應曰諾乃未幾翁亦下世比獲其詩詞與友人共刊布之而石船丈詩亦繼至又謀于其鄉彥夷午槐村漁叔諸公集贊為授梓槐丈曰子與石船翁三世交不能無詞以發其意則昌言曰夫詩言志者也必本乎性情非可以貌襲者其所祈嚮又必與其性焉近非必師說之從也丈之于湘綺蓋一門父子昆弟所嘗從游者也顧其為詩乃與之異趣嘗語余曰我湘綺叛徒也吾詩自散原入而其究也以雙井為歸雙井之界世豈

喻之邪其取徑自艱深入故其為詩也精思酷鍊而出之以雅馴雖精光躍紙上而皆有餘味足咀嚼入蜀以還以山川之感發家國之愴痛友朋之角逐乃益不懈而造乎沉至深痛非貌為唐人者所能望抑亦非以空疎學宋者所可同日語也往旅蜀丈居鄰吾家每日斜時拄筇見過過則飯飯則論詩嘗曰某也中繩某猶未也其睥睨當世賢豪意氣若不可一世而今不可復得矣曩歎既不可拾猶幸其遺詩得以行世也顧有以叛為疑者余以為文章學術天下之公器非一二人可以其私見蔽之也非可逆天下之好尚者也尤非負一時一鄉之望者可以其聲光為籠罩者也當其冥探有得開徑獨行之頃千載可接萬象在旁雖親父子猶不相喻何論師弟邪惟其真其是其當有以厭乎人心之公他非所論也叛必有可叛者存姝姝守一先生之言寧足論學海詩國之廣大者哉然則文之足重豈惟其詩其辨是非知從違不苟同不曲附岸然

獨立之概乃充足多也而世之困于曲說甘為六代奴僕窮年而不返者則又何也太歲在上章因敦敵月福州曾克崙

石船詩存題詞

鍾伯毅

佛家要無我無我慧攝情時地暢詩旨存我迺通神至情生於慧萬物熙其春
仲恂貴公子風雨百年新吐納喬木蔭笙簧大幕賓攬景而敦友萬彙相晦明
鬱勃發詩歌歧路作孤旌俯仰貞元會落拓古今塵持此以之死聊富不為貧
石船橫詩卷何緣繫蓬瀛吾叨三世交驚座豈欲馴憶慚隆無譽弁詩膽輪囷
耄年天之涯海月逐漢聲風流各有淑誦詩更懷人

石船詩存 卷上

桂陽陳毓華仲恂

小寒前日謝穎人招飲

丁亥

好事如君半點癡風襟何減北棲時自題鷗榭妻相和能似龜堂客亦奇

仲雲詩殊有放

翁老去看棋恆縮手閒來入社偶攢眉風迴微霰年光緊欲和樽前禁體詩

東坡生日青溪詩社公祝分韻之字

文史趨庭夙得師邇英策試被殊知廷譏君實皆崇議道謁荆公有恕詞於俗多乖人欲殺此才不相國何資悽涼海外詩篇在未見晁秦共和之

除夕客散歸巧君

粟黃梅蘂泥人妍爆竹嬉春徹屋椽晚悟此中佳趣在詎煩通德伴伶玄

次韻淮蓀與杜茶村同日誕生以詩自壽

乙亥

春味閑閑罨冶城舉觴喜及雪時晴猶因邊瑣捐雄抱君習知邊事不惱山靈索宿盟

元會表逢遼使賀同預國府團拜孟陬酒侑楚賢生風流重有阿咸預未負年來吏隱名

謂新彥

故人梁公約遺詩柳君翼謀近為栞定展讀泫然為賦長句兼訊翼公

老我秦淮一窟水埋玉堂堂呼不起見山谷誰昌厥詩琬琰鐫癡魂知傍龍蟠里

並世劉龍慧李曉皆雅流聯綴奪去天詼詭重來遽無此輩人騷雅中圯眸謎塵

賭韻猶旆旗亭壁泥飲孰貫宜城春懸思九衢歌哭處幻泡居然迹成陳通州

說士甘於灸睨視冀郊賞凡骨誰知百事不中程錦筆索還人爭席張季直先生嘗語君云余昨謁陶齋

見一少年枕爽能談君曰此必吾友陳某葛帔西華重見投貸粟虛向監河說燈末雙鳩挾雨啼散帙幽

吟淚橫臆為諗儒林老丈人黃墟誓在莫輕擲柳君長龍蟠里圖書館

西郊行散二首

澹迤春光小鵲啼稻畦水活柳初黃閒來髀肉驚心甚待向平郊試馬蹏
作崇寒花酒失溫旬宵駝坐倚爐薰緒風已賺愁城破合乞東皇爲策勳

輓陳韜庵丈二首

香草堂前及禊秋酡顏風鬢暎滄洲修門重入愴新桷荒刹偕吟捫古楸託命
經筵言在耳檢焚諫草淚傾眸寒灰續焰知無日悽望鵑魂返舊邱

中宇婆娑欒柳陰散忘寒暑德愔愔書空長縮經天手惜逝遙懸聽水心錦付
邱遲駸可伯楷傳樂毅費常臨山谷老成佚事皆青史閒日鐫思涕不任

偕叔章新彥游采石磯三朝洞

癡石嵌空樹杪懸雲波一髮愴嬋媯隩區未果關天險靈窟眞宜捨世緣迎意
小僧寒玉乞哀時故相碎金傳鸞輪促別魂滋戀紅杏家家插屋椽

喜元白見過

逢君真絕倒爲舉百千卮符采高賢後論思晚學時兔園春倍韻猊佩客含嗤

君任軍會參議
恒以戎服入值

晴雪梅鍾萼裁牋乞小詩

次韻追和南皮相國

采石磯
遊詩

懸懷北闕觚棱日痛飲南廡賓從時喋喋廷謀胡忍詰堂堂箕尾果安之士行

不媿精金鍊君實真如大雅詩眼見耳聞悲欲說景皇餘恫相公遲

是時公已被詔
入覲德宗深欲

留贊樞務沮于廷議未果及帝末
年召公入相而國事已無可爲矣

偶憶二首

駢韜擊韞左丞宅蛛網蝸書太傅家許國何曾真一試悽涼靈境觀前花

龔夔強
庵文與

楊杏城師同質居西城靈清宮旁其地一名靈境杏師平章軍國鎮蓋成陰余恒詣之必延之複室款語每及時事佛變甚至慍於詞色
閒謁強丈則墮榻蕭然商榷文藝偶詢溫室秋歎而已嘗默思之泗洲之佐項城螺江之傳宣統雖顯晦異趣其感於邇乖其時則一也

士大夫處功名之會能行其志
者幾何觀於二公可以悲矣

百鍊精金還繞指諸天幻相自觀心會酬瞻叟從容問並世公高太傅深

螺江詩
眞淨幽

妙人至德蘇思憶張文襄新逝時有以公輓詩傳至江南者樊山師語余曰以樞相處位而詩中有紙錢遮地之語可謂不倫徐詢余曰君謂余詩視張庵何若余應以世說五字師然巖甚自得許爲知言也

次均映庵丈由都還滬見寄

棟花風峭負妍春
失喜能來高世人
儘乞一樽共醒醉
相望片水動參辰
黏天溟漲閉閒老
湧地樓臺事事新
偃影郭池猶憶否
重過祇有草如茵

青溪同社禊飲秦淮穎人代拈承字

東塗西抹年時意
葦柳潛淵漸不能
懶更回鞭酬地主
是日與穎人同集龍蟠里堅邀借往閒從面壁學

巖僧臺盤拗倒料
相貸墨水飲渠甘
自承想見南朝妙
人物朝持秀句來
震矜

公羊桓公震而矜之叛者九國

春夜集寒操家餞纓蘅之官黔中

曹侯手挾風雅翰
揚摧今古傾冥搜
曠心一代顧厨選
襟期澹暎滄海秋
興極携偕文字飲
塵簡堆案但遮眸
南朝何地最負秀
吟付短奚一囊收
底事邊郡

須時傑樽前忽忽奪詩流中年哀樂誰耐得送人作郡幾時休秘丞刻意重遠
別宵觴祖餞羅珍饈墻銜金樞歌聒醉瑣窗四矚雲樹愁念君難爲吾儕留負
擲當前芳草洲却處官事非易酬胡文忠黎文肅渺矣來軫道

讀鈍庵遺集有懷

角藝當年意詎降晚嗤曹鄴不成邦畢收美箭供薪標猶障橫流注海江懸闕
難芟二三策袖極猶欲百千撞忌才忍令斯人死吟罷淒涼雨打窗

次均伯臧見過後以詩見貺君爲雒庵工部丈之從子與余先後居陶齋

幙府

竹林曾及阮公游生死乖離幾十秋劇變眞當蹈東海餘生安忍過西州門懸
通德三星聚庚集詩鍛精金一指柔樹取舊情風日對幅巾僧夏亦風流

次均石公鎮江見寄

人事經聞謚好乖陶集矧憐詞賦類倡俳幢幢億劫雲翻手朗朗孤吟月入懷書

局自隨門近市春衣不典酒如淮幾孤玉鱸金盞約扶夢尋君寶塔街鎮江街名

次均廉山衙齋偶作

此生祇分糜祠祿猶費時流幾枉尋病樹齋前魍魅共髻絲榻畔雪霜侵達音
未果符端竅隱几誰教判昔今領取松風媚孤寄海天拍水不波心

次均煉人市樓偕飲

睇價咸陽不中程苦聞杜宇勸歸聲篷艫詎果償春夢樽酒差憐耐世情猶憶
鑿吟湖上宅謂鑿湖詩社不堪懸望日邊城一欄納手唏興廢奚若青門踵邵平

疊均廉山詩有憂生之嗟賦以廣之

吏隱宜莫石頭若雲巖尺咫愜幽尋清人詩石頭城市即山林讀書頻有鶯聲勸欵榻何愁鼠迹

侵遺世形骸吾與子驕人寒餓古猶今勘詳詩律無閒細不負陰何苦用心

贈哲維君為郭春榆丈之甥

雅聞無忌似牢之藉藉高名北府時相賞青松翹白石猶圍紅袖寫烏絲靈臺
自澈圖難狀信誓何煩事可知持一詔君聊自幸風流曾及侍南皮

君叔螺江太傅詩有恨君晚不南皮

識此語追思涕淚頰之緒

重題仲雲過江集

蟠胸影事戀觚稜驅作南來辦食僧九服逸言標著錄五朝漫士滯才能復聞

正始宗彭澤難忘開元感杜陵蠶尾銀鈎撩觸目宣城酬德痛何曾

段公跋君過江集云友人陳仲恂見

而歎美為題句云拾取風光並入詩渡江人似舊京時旗亭賭句輸誰健爭唱黃河遠上詞誠吾腹中所欲言也云云公薨後三年君始出以相脉對之慨歎

輓孟樸二首

夙貯伶玄感終成彥伯書艷資談藪助雅演禮堂餘

君為越縵弟子

盛府網賅玉仙槎夙

曳裾山川淵對處疊疊輒思渠

寶華歸猶在重過鬢已絲愛才寧復有撫事每同悲
陶齋于節署西旁築寶華庵君與余每預文酒之會有約秋湖
醉俄驚夕壑移尪軀廢行樂拚爲百端糜

爲敘甫題其先德青城山游圖

聖夢青城峯朝來嵌几案冥鴻超不塵雲雨軼天半勁松裊初蘿修篁聳晚幹
清寥鐘唄音香軟青粳飯憑想承平年官閒恣游衍抉奇山水窟賓流侈彥選
遐矣雙寂情懷哉四井願風流故老知爪泥殷把玩假靈國工才復境杼圖翰
冰幅水墨新寧隨蛛埃漉潭潭南麓翁筆酣發幽讚眉宇秋江清生晚幸及見
衡山廣鳳崗先生題詠殆遍曠老余舊識之于王湘綺師座年七十餘矣西笑粵歲年被羈愁喝曠捫歷付卧游等餌清涼散

月夜聞歌詠晚華

江淮酒獨傾叢憂誰與寫惘惘聞清歌奈何老子野平生玉塵人鞮譯半天下
肯使菰蒲鄉洗眸觀都雅著花艷穠氎妙相綜莊冶枿欏迤餘音幽似珠泉瀉

冥禽差解賞諦聽癡匪捨姮娥駕天來凝笑粲萬瓦蕩予古井心無眠淚盈把
旨哉中山言哀樂非外假

徙倚靈谷寺桂樹下詠呈旣離

殉世九坂厝懸思我欲瘦脫身夸毗場暱就便欒影高卓不受塵飽霜態逾靚

深地鬱孤馨肯伴梵宵粲蘭成傷小園安仁感華省留人果何爲

庚賦小山則
蕤桂留人

惱秋

亦堪哂幽蟄語風扉鶴唳倚天緊晚晚惜歲華歸緒夢難整聊蕪結願香若斷
聲聞境持證晦堂禪婆心儻無隱

秋日偕叔章新彥倜君紹頤均叔登棲霞山傍夕復屈過飲賦呈二十韻

題徧南代山詩工人已老棲霞吾素交聞游夢先繞嘯侶騁平楚波黛髻邊裊
秋深遽如許戟梧受風撓萬牛放舐嬉郊疇澹如掃景氣甦肺肝頓覺翳華瞭
納僧祇侯專駢憩寶坊撩浮屠解迎將俛水影亦媯

簡齋

摩挲泐名處閱世蝸涎

飽端資木上座捫崖恣雄討箭栝嬾成行菌芝馨在抱染霜雁背高摩天龍巖
矯金色丈六身巖峙層霞表駛江挽不回披襟納浩浩補亭憑勝域兀視諸峯
小勒此一段奇未負髯書好閑身有忙時逐影暝歸鳥重當刮目看丹楓絢霜
曉回鞭肯化我翦菘瀉家醪醉語短主簿官事何時了

偶君專勤職
事故調之

風雨中結客泛舟秦淮作

涼颼颼響層旛動吹雨磯頭打船重鈴鐸五十猶作癡縮影來俚刦餘夢開天
歷歷詰水濱老眸忍認教坊巷當筵牙撥胃塵蛛補屋翠袖貫釵鳳誰起九京
徵吾詩濺淚灰堆捫腹痛

曩時傳若生可使以精刊板橋雜記相贈謝
以詩云淮稱曠事亮若續莫待成灰和淚吟

遙峯掩暎欲言愁雲衣罽

采綻天縫珠跳絲拂戲羣鱗寺鐘暝接爭渡鬪影水繁燈隻舸專磔秋深柳亂
鴉共宵來一澤焦卷舒綠入畦墜毫霜葑畝吟折此景物奇生涯恨欠煙蓑送
欲語拖樓三世將識事傷時濟何用

謂新
彦

有以飛機致哈密瓜餉叔章者招剖食之戲作二詩

湘綺樓中曾讀賦賢良寺裏及分甘閒來事事撩酸緒抱蔓金臺世不堪

陶齋尚書山港

撫入觀階幕府居賢良祠內賜此瓜分啖善輩

絕域憐渠風味雋御風洵息果來歸絺巾拭拭愴無日合付蠶腸一解圍

九日偕客游靈谷寺重經禪房桂華落盡歸飲酒樓

幽處一枝玉無花倍惹憐飄香將薄日含燠已涼天

子山桂房冬燠

瓶錫終安挂壺歌且

自便秋歡無計捨著影酒壚邊

重游棲霞賦跡既離

乘除誰遣吾儕老資力復輿躋上方通款青邱懸世味愆期紅葉負秋光翔禽雄拊新題榭乾蝶癡黏舊夢床萬碧甃鱗千玉佛南朝巒壑不尋常

疊均雨夜柬叔章

裝胸百緒櫻禪病待乞君家肘後方
佚老有懷題小隱遺榮不夢賦明光
屋山雲掩鴉千樹桐閣風翻葉半床
旉旉孤襟江海寫儘容世論日純常

再疊前均師叔章

幾教縮手功名地自餌真人玉食方
君近戒米食勝處畊書青眼電定中觀我白毫

光晚心每共歌嘯榭豪氣猶區上下床
燕寢超然窮物態有常終竟勝無常

寒夜感懷三疊

老謀壯事成何濟億劫安心自有方
飲處月隨鐫可影夢邊雨過挾寒光
蠹魚幾蝕遮眸冊饑鼠深窺示疾床
晚愛徵君丹訣雋便當削迹隱良常
今茅山即良常山陶弘景隱此

次和纒衡九日獨游貴州東山感賦

使君詩墨雍容見奚事西京說翔皋
青幃琢名千屐折紅牙度曲一樽高
臨邊遽有經秋感撼夢應驚噫氣號
狀得江山負絕意衲僧定裏識人豪

四疊酬鐵庵丈

得名爭重來禽帖難老閒抄種樹方洛下楮縑傾玉價淮南草木借珠光

志

漫嘲邊腹垂經橐終欠蠻腰韻笛床賺取休期陶寫處倚樽綽約道勝常

文星期日必至

秦淮聽歌

初雪五疊

花嗤老廁三千履鬼嘆將營什一方上座曾參梁竇誌舊人已失魯靈光雪邊

雁掠山山葉風末蛩嘒夜夜床沙社伏譚寓詩事哀今誰喻道非常

養歲借梅庵諸老避地滬上交酒茶

歡時語之者有道德非常道天天小有天之語

題陳述虛瞻麓圖

政聲不負懸魚潔歸計猶乖化鶴還安得茗廬天上筆為君狀寫道林山

君為樊山方伯

史故

白頭等殷房山病春菲秋鱸闕几筵畫幅莫懸風雨夜愁飄噫淚漬黃泉

雪中借叔章新彥侔君沐於湯山傍夕遂歸

餞臘風篔一江雪朝來鍾嶺頭盡白墻角梅萼新破顏遙樹銜水萬鴉沒局促
滋欲騁奇游衝寒逝逐鸞輪發嵌空撒作玉花霏秀塔倚天共一色野騎嘶顧
汗氣蒸時騰見雙瞳巖電赫似識縞衣招不來誰歌黃竹聲欲裂塵影愁著
瓊壁堆取沃巖泉肺肝潔微恨諸賢欠勝情不留連榻候初月收神貝闕索酒
澆破暝繁燈光的歷夢痕還戀菟園游妍詞換得梁王悅

輓有壬

子立羣咻闕園機達識尊門能風烈紹篋有謗書存終欠鴟夷哲真同處子溫
百思徒短氣爲汝覆清樽

春日得仲雲自長安寄師近詩丙子

春綠江頭萬柳枝
凭欄喜把達夫詩
攬聲壇坵愁言祿
乞物江山雋買癡
漸近鄉關游子老
君爲豫人
猶餘塊壘故人知
迫宵簷溜糟床注
夢到當年釀飲時

偕政輿夜話有感

鼎沸笙歌不著心
知君解賞無絃琴
酒闌獨自偎殘月
嘆想衷言慰喻深

風夜過養廬

圖史收身健龍鱗
著地神未殊巖電
奕稍訝雪髭新慘
澹三邊事情悽獨
寐人傑樓詩味雋
梅藥卓添春

送伍麒閣蜀游

爲郎頭白計良癡
囊著青溪半帙詩
此處不留留處有
臨歧誦取茗翁詩

凍坐

鶴訝龜言雨雪重
見庚集
石頭三月剪刀風
東來梅柳無才思
儘任當衙菌蚶雄

次均腴深話舊二首

夢落碧湖禊啼鳩不貸春差欣梁菲雋添慰晚歸人
耽詩吾已瘖被酒子彌愁猶是雙如直誰知七不堪

下關曉發

叢憂煎使瀕羸茶妄意江帆一振之此意獨憐殘月好不言待狀大雲奇難忘

梁叟

節庵師

吟噫地曾及陶公

午橋督部

種柳時賸遣鶉畫償世變濁醪那塞晚心悲

讀散原集

大慧人天眼卮言河漢邊斗南遺一老涪後動千年不礙王

湘綺師

張文哂寧煩任

史箋肫忠君國緒悽付爨餘傳

寄憶

春風賺得柳眸青千里江帆獨夜燈曾是屢心著深語風雲失氣髻絲星

江行雜興九首

閉賓巾車閒幾蒙新婦請去作風波民江春呢晴照

夷貨爭傾市傭兵不返田東南民力盡頭白憶光宣

舟中聞人論北洋軍閥舊事

伙伴乏長物打包僧似之登來考功集深地證吾詩

黑夜憂風水雷軒撼榻隅長宵那容寐起聽壑龍呼

倚天膾鯨手溷汝斗大城江頭呼不出煙塔遞鐘聲

過安慶懷伯毅綿仲

郭五屯軍地風煙觸目明雄襟安忍忘酌酒荻花城

過潯陽

等觀空卽色希味苦能甘聖處費思議喚取方二參

寄叔章

白鷺定雋人江鷗起予者噉名老不能觀心法可捨

江注青瑤盆山張髯屏畫矢踪正俗游卜築時松檟

次均鶴樓題壁

張端騰蹟晚鐫心壓髻風煙果一臨金谷當年矜夸俗杜陵卽事嘆非今杜詩捫
天春閣雙翬翥瀦水晴洲萬鷺侵微獨應劉零落盡壁閒剜到舊題吟

謁抱冰堂

庾公婆娑胡床處花滴晴軒風日苦堂堂經國簡冊新彌天愴戢薊州土景皇
矢湔列聖耻幾懸衰職仗申甫被刦禁中等綴旒坐致米祆闕畿輔向非二三
社稷臣蒼鵝禍早鍾典午晚躋政地無可爲懟使祝宗祈死所織兒畢自壞家
居廿載神州競求主北洋軍閥禍國凡十餘年東南杼柚飽蝸涎誰與羸氓式歌舞江左風流思
謝安峴頭涕淚傾羊祜賓從空餘老病存肅參崇像纏愴楚決眸十桂費按抄
重是荊州手栽樹

登天心閣

竟果生還願猶從斬絕躋遙帆浮沒接幽堞往來迷茗椀回春事窳樽失舊題

百年興廢事付與亂鶯啼

雪耘招飲雪廬其居爲郭武壯故宅有石林之勝

鶴骨劉先病不死絕業天遣網維是觴客矜於選詩時著我蕭齋百春簋持護
平泉皴透石靜日舉帷蘸書色笏袍朝拜世有賢忍使奇姿藎黜沒

孤兒院視孟其

愛君狂過我鬼腕劣同之杵著跛胖客謂意墻堆蓬顆兒愁將官裏去窮到錐

無時解事呂楊輩樽前大可思蓮蓀綿仲每言余書體大似孟其故及之

午後郊游

露葩煙篠強羈春憔悴禪床獨夢人幾段啼鶯西郭外青山依舊客愁新

積雨

暫住鄉仍客兼旬雨不休一城昏似海四月冷於秋滴歷糟床注飄零野艇浮

跼天關百慮違爲老農憂

丁在君先生輓詩二首

木壞人安放才難遇亦奇酬恩師友篤

君來湘鵠其師母龍夫人

媚學譚鞅知列校傾風塵明堂

竚羽儀麓山松萬樹慘澹護雲旂

雅識儕安世清操類次公寒眸辨龜甲高掌關蠶叢誰爲陳真宰還當付采風
河汾標絕緒待啓濟時雄

麓山雨中展視丁在君窆次賦慰詠覽

蒙氣鬱層霄千門零雨洗叢山慘失顏亂疊忘料理岑絕陟危磴援石憇巾履
披松風冷冷霑草露茫茫寒籐所蓋纏筋骸龍蛇委不謂一坏中竟戢七尺偉
清標映先達令猷式來史靈輜竚巨卿縮程果來止

時翁秘長由部乘飛機來湘會葬

事盛感邦人哀

輓動蒿里生不識郗君敢附四十誄

簡齋詩空傳四十誄竟不識斯人

饑鶻銜紙灰掠影沒幽葦江渚

夕濤奔聒耳助酸悵短氣才難時天心良自詭塞君終古悲城歸舉春醴

題梁文忠師書付同學左立達冊子

忍死江淮命不辰平生師友允天人撼霄凍雨呼燈起拂拭頻看哭一春

汨羅篇

并序

余自湘返都夕經汨羅春事已竟有感屈平沉湘舊事重念家評事叔完夫暨湘陰郭耘桂醴陵傅鈍庵兩君均以雅才瞻學詮釋騷經不幸先後恹僚以歿感舊永嘆彌難爲衷爰賦長句費之冥冥

東來書簡朝相迫惠風著意將行色踈隄梧柳澹晶輝經雨岡巒盛膏澤潔江
淮記日曠時興懷賈生吊正則孱君自絕厲憐王果覩武關車軸折強鄰壓境
有自來忠讐不管那忍說世閒但賞瓊瑤詞誰知逐臣痛徹骨渺然平生三數
人儵幽蠹簡褻芳惻高才無命懸例看陳徐應劉嗟奄忽范金能語信非祥猗

蘭自焦徒滋惑影江黏有遠古悲寒濤一枕髣髴白

武漢大學訪劉異教授不值

同門劉校尉禪思近如何祿較枝官厚詩緣獨客多
漪嵐捫石室幽草韻繁阿誰耐孤吟得風鳶掠影過

武昌東湖

潭底游鯈閒可數隄干乾鵲噪相呼何年著個林夫子
雁鶴高梅罨畫圖

珞珈山紀游

生本武昌人罔識珞珈山將軍士武甚爲我發其凡

前省主席夏
炳會下樂於此

意行無遠近稍

償一日閒天肯收淚睫初陽昭陵巒秀草茁華滋森篠排琅玕層霞倏明滅影
入碧水潭提壺亦非惡勸沽語暗桓差似聖湖游畫本殊人寰夙意不在多頭
顛況先斑茫茫欲安歸矢當營蓬庵先德邦人知漸近邈鄉關習聞魚米賤

不較銖與鍏保此亦良樂奚必殉綺紈尙念抱膝翁栽柳綠毵毵題詩識賞否

有涕伴崩湍

節庵師別署抱膝寄武昌楹聯右偏云多栽武昌柳他年客過好題詩

舟望廬山

芳信春仍駐佳眠日倏西江空懸鳥印山近入蛾嗁微尙三高負冥搜七聖迷
吾生付飄泊未果遽安齊

賦慰通一悼亡

際海蟠天一劍行年時幾負鰈鸚盟歸來壁立商生事增嘆人間伉儷情
丈室今無法喜妻雨風一檠聽烏啼夢回遽切人天感掩淚頻看錦字題

次均伯臧廬山見懷

晚戀貧交元味醴肯分林鳥啄餘柑堆山芸簡千靈妒殷壑松風一枕諳幾遣
勝流嘆逐北用温子昇事遙傳雄句和征南山谷有和謝公定征南語匡君有約煩持語行樂携雲老尙

堪

次均子威教授麓山見寄

入懷水幅卻炎曛詎待涼飈始憶君
生世不官幽處水髣髴猶舊定時雲漫疑
書尺因來少

曠法師答劉道民書云君與法師當教有文集因來何少

忍向弦徽絕處聞
賸是景陽機畔錦邱江入夢

歎同分

謂樂山師

麓洲歷歷夕朝情想得仙癯獨嘯行
百代史圖納邊幅一庭花藥顯縱橫
不辭閒地妍腔度且耐愁邊亂髮生
白戰鏖吟晚無分勞君雄築受降城

玄武湖詠伯仁

衣前風捲葉惻惻著秋心
魚媚蓮房大蟬語竹嶼深
擎觴遞涼燠殉世飽浮沉
誰與攄孤寄鳴君玉軫琴

月夜叔章見過

閒來恣意買秋光
露浸絺巾刻骨涼
詞寄畢思元
度好髻閒蟾魄幾迎將

輓徐固卿上將四首

正始吾猶及耿光
翼世程徐公堪中聖
山傅自知兵授鉞
專文武懸軍倚重輕
堂堂開濟業政屬老書生

忍數宣南別垂垂
二十年迴翔資特起
號令準前賢珂里春
添靄金吾夜放眠

君任粵省長與衛戍司令
炎蒸糜百戰鬚髯晚蕭然

北段南徐目閒憑
佚乘看清末南北洋各設統制以合肥與公領之時有南徐北段之稱公殊以此自負也
安浦延宿德
橐韃奉餘歡公強

病旋京就國府委員職部曲歡迎甚盛
未親收三鎮俄聞戢
一棺篋餘東絹好誰與掃龍鸞

瞻園竹自動湖墅
月猶新歌哭懸千禩
哀榮極一身風流思
謝埭吹獎感平津
孤旄霜鬣舉攀號
有舊人

題貝葉畫佛廉山藏

積土搏沙造勝緣亦聞桑柏狎諸天小來伎倆餘無幾丈室新參貝葉禪

靈谷寺尋桂樹未著一花戲詠

禪廊娟靜黃玉枝曲几團蒲影見之乘興亟披風月往及門深訝車馬遲一窠已斥千錢買獨樹猶淹十日期我自後機君復爾婆娑無奈暝歸時

重尋古梅已盛開詠東旣離

閉置誰相慰蓓蕾不厭多成文蟲蝕葉掠影鳥捫柯妙勝珠千絡高寒玉一窠凌雲侈聖解見此意云何

次均石公借一乘泛舟過虹橋遂登平山堂時余亦携竹君適游茲境恨不及一叉手也

淮海嬉秋一舸遲景光猶趁雁歸時臨江遲客呼安及繞樹聽簫悵有思雲髻乞分青嶂色雪顛待赴白鷗期橫流何與吾儕事醉倚山樓暫展眉

九日掃葉樓晚眺得發字

并

曩歲奉同樊樊山陳散原

二絕句壁間一時傳爲笑

可復見感成長句

堆葉角塵關何物霜髻千回買

喧呼歡奉觴爭歎若人癡徹骨

幾人存未至相如亦頭白要令

弦古柏迷秋風策策含情獨倚

松寥閣展謁端忠敏師遺

拊江翼層軒影入蒼松黛霜雪

唾處萬景道風神嘆無對法中

論德存江南，惇史識其大。安此瀾岳姿，福域透雲旆。魂戀影前香，頽曦不我貸。

且尋謝公埭

埭在今揚州

風柳晚彌暖

碧山庵午睡

在手煙巒浸水湄，簷簷個個著秋遲。一庵青靄天聲寂，饒與浮生睡足時。

游采石山入廣濟寺小憩磯頭趁輪溯江夜歸

倒影晴江蘸翠螺，柳邊祠宇尚嵒峨。勳名自詭關興廢，風景無殊費涕歌。一映難持往日返，百乖彌負舊恩多。秋心逝逐東颿發，奈此憧憧世網何。

次均纒蘅九日見懷

三千里外戀鸚鷺，何如莊鳥病時吟。畢生好事官徒贅，晚日論交契獨深。自飭簋簠風末俗，未孤邱壑策初心。解嘲種得窮邊柳，留待騷流詠綠陰。

次均石公贈濮一乘居士

萬花不著獅子床胡爲懸戀菰蘆鄉浮玉山巔緊秋杵倚看倒海天蒼浪僕先
卅年善知識聲利窟裏澹相忘能窮百巧顯真實自教兩踵騰輝光理譚臺於
霏玉屑秀句絢似織流黃重聞竹西盛歌吹手輓薄笨風礮礮兒當日工作
計幽塢花藥深迷藏恣意買得二分月誰知劫處秋茫茫轉物已苦糜願力捨
法寧煩區癡狂湧地樓臺狡獪耳荆凡底物專存亡憧憧萬魔影祇夜持此露
電還何方雪顛雲髻逝蹤躡柔艣曉月勤迎將霜葉打頭闌人語把玩一笑非
尋常可憶石城共傾士品第睨較盧與王酒邊飲淚重點檢里巷初非青白楊
短塔蒿沒佛仙骨譚揚仁山先生疊嶂圖迷時世粧餘有平淮碧油水貯情滄汝吳兒腸
逃選失參千佛場蠅鑽故紙癡不妨止則易料海難量牋天乞與醍醐湯

次均散釋雪意

聖處吟肩聳煙花刻意春睥睨所見世偃蹇未歸人筆陣涵剛娜禪機捨喜噴

平生蘇學士才祗折黃秦

交通旅館訪西園不遇館爲散原文故居

年時酒末婆娑地幻作人間傀儡棚版屋模糊鏽鼠迹葦塘隱巨贖蛙聲廢興
何預雙枯樹得失私憐一老兵皴石殘曦懸眼纈吾衰自有古今情

次均纒蘅元晨得雨

丁丑

梅魂柳緒促詩成快閣携春路眼平

見山谷

臨翰情懸三歲隔放衙事簡一肩輕

大醕爭看史胥醉雅吏應饒觴曲聲

湘綺集

合署使君荒歲雪流亡初復飫倉京

贈子羽粵游

忽忽胡爲別憐君著意奇履裾藉名價瓶錫損年時風氣梅花近詩懷燕子知
好將家世說荔海蠹坡祠

尊文達公典試嶺南得人最盛人士至今思之

春寒

暮朝風力拆重棉已屆江南三月天雁足不來貌篆冷埋愁祇許病相憐

強病孝陵看梅花

山坳雄踞照天開繡艷爭教霧曉回驢背看花殊不惡江南士女擅詩才

紅梅布政白梅僧公子偏矜綠萼吟

樊山紅梅寄禪白梅詩均有聲於時衡陽狂士夏紹奎特吟綠梅自號綠梅公子

詩事淒涼誰付

與捫天認取獨謠心

次均哲維新游蘇州羅園觀梅枉詩見及纓蘅在黔遙和並以辱寄

一邏鶯花春未歸好詩爭歛草堂扉高名元白才難壓借嘯山王願竟違不負

遙傳臨海作何來同授攝山衣

時鏡吾居士來都講經

霄樓不耐懷文讌吟遍天頭斗宿稀

丁園海棠謝盡落花著方塘中映麗彌甚

紫綿樹樹磔人香糝作天花縵珞光癡到枝頭雙燕子冶春影入水中央

元巳日同新彥子奇構父衝雨郊游小憇靈谷寺還飲籩步酒榭作

老緒懸袂辰雨風翼之走誰能爲張目壯客二三友晚岑雲霧重提稱疑在手
萬木印天光靚礦不受垢殷紅棠檉花婀娜儕新婦癡立幾梭杪愁任蝶蜂疏
縮影龍湫堂寶墨晞何有寺舊懸端忠敏公書聯至佳近不之見斷松堪作薪借綠墻陰柳鐘唄懸世情
念念負渠久折盡湖海心試傾輓脚酒

晦日雨霽泛湖

風雨持春去天留一日晴妨衣楊柳絮助酒鷓鴣聲含妒雙棲韻竹君招看水上鷺鷥生憐
五兩輕拖樓雄嘯外底事著吾情

稊園吟集喜面銅士

刺鮫射虎老何能私謚鍾山退院僧余久不預詩社喚取夢邊耆舊雋科頭癡共向晨燈

次均映深西山逸士續贈麓山移居圖

麓陰風物等山陰安得王孫折屐尋逸士係宗室畫幅能明高世志詩闌猶著小年心

余與君及徐實質
發嘗以此爲戲

質庶伴得梁妻老才筆傳教吾女深千萬買鄰吾欲往生涯況本水

間琴

江晚

柔檣欠載鳴夷逝負汝垂垂四十年安及野鷗憑水沒還留江月向人圓償春
妍唱層雲裊媚夜繁燈夾渚懸榮樂付將少年事煙濤扶夢逝歸旋

偕竹君憇靈谷寺經樓

抗世吾寧敢貪僧意孔多

古語貪佛
不貪僧

欹樓千石筍點水五銖荷坐閱饑鳶大難廻

隙駟過會當初服返心地付楞伽

飲罷翫月喜雨民參事述職在存卽送其還衡陽徵兵軍次兼懷船山書
院

歷歷參辰宿醒後風掣金蛇瞰層牖石頭夏半海氣屯千雷挾迸寒濤走鬣參

來自南麓南雄襟雲夢著八九耽詩若襟杈枒心攘夷初籍弓弩手士武如君
絕世無高助會自鑲鐘卣捐糜馳赴百艱時莫虞人事恆掣肘沉吟憑想梟鷲
洲枕流樓榭乖撫久莫令書堂失顏色紀綱煩護爲栽柳

題會少梅先生義夫坊

禮豈吾儕設鍾情等達情竟乖庾子願甘殉尾生盟縮屋貞誰尙沿街唱可驚

見放翁詩

柱天坊表在卓爾耿幽明

泛淮

繁管疏燈夜臨流此一奇煙含金縷長風逐玉繩移蝨世償詩債迷人寫酒悲
一帆秋迨駕不分累明時

湖上聽蟬

曲腰柔側纜柔舫片水如茵雪絮驕斟取蟬吟溫曉夢畏人懶過綠楊橋

伏夜湖游遇雷雨作

投老屏俗歡暱此一泓水寧辭得得來叢憂憑櫛理火雲承露涼松颺澹崖晷
芙蓉紅白殊香處絢層倚孤影忘更闌貪對夜山美雙鷗眠正斲長嘯爲驚起
阿香轉縑車珠跳百檣脆沁骨恩已多浸夢聲彌喜還仗狡獪才滂沱滌燕市

佳眠忍自思延息河清俟

時倭人犯
平津甚亟

喜雨民監察兄使藏初還

舍利三年授慧思都人爭想采風詩連床逾嘆髭髯好一蓋休噴棠杏遲囊有
梵經神異護家傳治譜政聲馳卅年弟著憑攻錯詎忘洪都香火時

余與君投分始於
南昌忽三十稔矣

輓陳石遺年丈

相公水鑑收人表亦有真儒未易知幾念淞園肝鬲語猶同淮榭祓除期橫流
手障歸邊幅虛白胸懸照等夷曹洞欠參吾不悔待從天社

謂哲
維

註遺詩

集歲與文
僧居南皮

幕府時從文酒之集內午秋余還自日本邂逅海上張國詞意纏伊欣話移器嗣是轍迹各殊遂不相聞甲戌續集玄武湖喜獲瞻侍每欲投謁吳門重道武昌舊事憾未果也

次均哲維雨夕

凍雨天街浸夢深
愁知黃耳附書沈
南來未果標無義
北夢誰將寫此心
宋人有北夢瑣言

次均鶴亭懷散原老人

殿狎江鷗世可哀
冀憑悲智構春臺
禮堂幾致黃巾拜
藏室長禁白髮催
載酒客應雲雨散
扶天人已泰梁摧
北窗穩據羲軒世
憐有松風駕夢來

次均廉山玄湖秋泛

江宇回涼籟鳥雲
壓髻愁強持頻怯
膽閒棹自橫舟抱
葉魚身大驕人鳥
語稠浮天萍梗似
怙悵一湖秋

次均廉山避居勤園寄家

樓檜四亘嗟何世索索寒鴉喘月棲撫樹仲文斷生意尋源元亮美遺黎風催
雙鬢秋先覺書抵千金字密題世變便當及吾輩悔不撰隱西枝西

次均廉山九日迎水臺禊集未果

晚晚秋光負却多龍鍾漸說慎風波漸憐幽茗關人事難忘平臺擁客過霜鬢
欠教花映坐晴簷待試水添坡癡鴻那喻南中苦幾伴筇樽漬淚歌

疊均雨夜歸廉山

今古鐫胸不自多淮湖控與海通波落英裾畔留香久癡絮樽邊帶夢過真可
啓余睨驥肆誰能致子上鸞坡詩人例有飄零憾鍾羨霜禽自在歌

出都疊前均二首

跼鴛著影阻艱多仗此靈臺寂不波稍喜官書拋去久猶煩殘客數相過駟登
倚命乖郊愈風雨孤床負穎坡

王齊陶與舍弟
楊甫勸歸甚切

歸及江鄉佳節物夕楓紅處逐漁歌

考城才筆晚無多，詎奈銷魂別綠波。南道主人聞見念調苦樵東籬徵士失來過

續菊人
久不至

斂杯微哂荆凡事，巢幕寧區上下坡。

續君上坡
下坡唐人語

漸乏深心師少伯，煙莎閒

顧細君歌

次均廉山有懷鄉居

此中柴棘卓芟除，惻惻芳襟戀孟諸。未減風情閒顧曲，真宜貧餓晚耽書。酸魂花鳥徒歌外，濺淚輜裝歷劫餘。老矣東坡新厭事，勤來肯爲說虞初。

次均廉山漢皋春望

吞聲不廢曲江行，賸是鷗波決日明。二月柳侔初髻媚，千崖雪見一峯晴。韓歌竟負紅裙醉，褚帖空憐白刺生。劫處雲山誰買得，祇饒中隱廢將迎。

次均廉山春步

雪霽松巒欲貸春，難迴曉枕淚波新。漸撩羈緒炊珠米，幾浣詩腸礪玉塵。

茶爲
玉塵

風獵長幡心不住花棲禿管夢無因江漪駘蕩俚情在悽欠周郎百醞醉亡友徐小石孝

廉昔在漢類同游燕

次均廉山奉懷鐵庵丈

一嶮綠波春有意櫂槍詎奈拄神臯夢賢詩在魚商市詛世名歸酒侶豪危語

忍嘲荷作柱寒眸不負筆含刀君精篆書刻石載施湖泛垂垂老真愧梁廡著計高

次均廉山旅詠

夷市幢幢處愁看世幾更春摧當去客花戀昔游城雷雨軒雙夢鎮干憂一鳴

攢燈宵送喜歌哭極吾情時有臺兒莊捷提燈慶祝

次均廉山上已市樓飲集

風緒跼焉地憐曾靳勝游能來間關客邑濱由陝經棧道來漢携唱和詩甚夥莫擲禊春樓羈緒淹玉粲

名篇付貫休鉢心家國憾換得酒悲酬

武昌花隄

邪許聲邊雪髻生授書坊巷記分明避人悽數陶公柳謬被儂兒哂瞰名

次均養廬枉寄抗戰五言長律四十均嘉藻難酬慙其率爾

霜序睽塵燼今來柳覆牆樂猶操故楚客應憶新疆調印泉 燂熾岡燔玉淪溼海

插桑提封摧并薊控制倚荆襄周懸高牙建房謀雅佩鏘賜鶉天欲悔超乘士

偕行避地青山屋停雲綠野堂遷長沙後屢與印泉
譙集公之北郊新邸 眞宜起頗牧印泉論
有壯心 誰使誤關張塌

翼悽瞻宇枯鱗泣望洋莠稂冬尙勁英蕊夏偏殃構李羞能忍轉桑德太涼力

排均勢議寸裂弭兵方洊食浮羸政輸成絕鄭莊前仇哀必勝怙惡蓋彌彰策

府機先決屯田武孔揚捷書燬夜火挾纒渥春陽台兒莊
新捷 先自規淮濟徐當迫洛

漳鯨鯢穹築觀麋鹿肆圍場歃血人爲戰攻心寇不防結惟頌神武俠豈繪流

亡花藥妍生庀詩書喜卷裝止戈非樂戰祝網況如傷返倪矜吾子來庭繫彼

皇三邊風火弭百道賀牋忙車載渭濱望帷尊屺上良及時犁耨幕餘事付奚
囊告岱雲新壽收京日再光不教獠獠反果覩漢周昌藜藿求蘇亟芻蕘慮患
長祈神殲海鱷覘象逐天狼理正師彌壯言誇寇尙猖可傾滇蜀衆寧仗美英
強念我頭皆白聞君髻亦蒼句馳懸玉麗筆越范金剛病鳥仍歌趙皤乘逝適
梁說難三別足吟澤九迴腸肯俟參詩祖何當禮梵王謹心功自大假羽德難
忘裴像昭重譯羊碑蟲百常嚴詞屨杜集采併史輶芳

哭冥飛

世變促君逝聞絃怒自傷有生誰稱意難及是真狂孝友華侔潔文篇錦在囊
萬艱夢來詔殘月影江廊

次均養廬上巳吹臺禊集兼懷靳二志

小桃紅乍騫九達風絮屯揭臺昵春眺涵萬迢不氛簡簡晞古抱騰舉鄒枚賓

壓境魂未甦，妄意被茲辰。豎義海潦翻，揆詞天燄焚。捫燭幾見跋，白戰事方殷。
韻勝澤圖史，藹若嵩上雲。宿鳥抱枝窺，巾屨詭時人。邦伯范韓姿，一德洸以恂。
高掌障倒流，願力奄彌綸。老罷抵關臥，生啖千百軍。撚髭吟著癖，肯與酸子倫。
志也本望郎，句偷開府新。跳擲天駟才，悲復羈埃塵。賡酬翩玉唾，影入雨腳春。
豫治遂無儔，韓詩遂令河南治今古無儔倫念我平生親，決勝萬死前。不廢詩筒勤，曙月耿羈夢歌。
寄慰酸辛

次均樗庵有懷潭州居士林蔬集

景風飄得鬢絲溫，不礙楊花冑淚痕。幽處虬枝常示夢，刼餘鮭菜遠知恩。陳集山川道遠

腹知恩 摻袂待挾雙流駛，詠史憐同八表昏。誰使杜陵淪泊老，扶鑱還擬覓玉門。

寄題北翔鶴山新居

能詩王少將，雨民艷說鶴山佳。表表經天略，潭潭卜築懷。溪猶羅帶繞，峯況錦帆

排情極饒相謔坡公怕硬差

次均養公詠懷醴陵三仙洞朱蘭

溯德善人室

古語與善人處如入芝蘭之室

傾響騷伯音茗茗丹汞域心跡馳雙沉孕異歷有年緇

壁世莫任幻作玫瑰葉醜謁迷四林嘉謚恥御王重迴逋客尋憬彼當門鋤媿

此抱崖崑佳色非待秋叢箭豈無陰子

甘侔不材木有慕在冥禽動操憚孔賞

級佩酸屈唸人外著意芳自樵豈素心持謝太傅階無悶徵在今

呈太谷院長

萬艱軍國費平章江閣人豪屹立當

時居漢口中與退行樓上

破賊謝公惟鎮靜策勳蕭相在輪

將賓流日齷心如水福德天酬髻不霜使欲逢人誇晚遇風流何減抱冰堂

次均樗庵枉詩見懷

憑君遐想子沈子禪機著我版蒲中

曩歲下榻乙庵學使天柱樓與君數數譚話

獰颯遽捲地天去頽晷猶

扶歌哭同酒蕩雄襟才未退筆驅能事理彌工審時慮後歸畊好莫負西來一
葉風

次均養公首夏喜雨

水鄉遞殊態涼燠不可科天厚苦吟身旬月玉燭和暱我光黃山黛色捫榻過
阿香竟不癡載雨膏葑禾柳隄燈密攢絢若翻銀河短樓應接雋會心寧在多
所親八州督頭白疲驅倭了此丈夫事一棹商嘯歌帳下漫持看急郵詫羊何

次均廉山漢上端陽二首

枝官乖世用莫莫且休休猶著避兵勅無聞競渡舟祓除張野艾齋供綴山榴
殘客何心對鼯眠午市樓

影事吾寧忘蕭辰賭酒歌任情償浪漫將命乞嬋娥衫扇憑風舞箏絃夢雨哦
幾教星物換餘晷憬揮戈

次均廉山聞游蜀未果

詩人例有閨中役西笑樽前感不禁
越石百哀猶在目輞川萬事詎容心
合陰湖柳明吾老初釀郵筒惹夢深
留共閒潭花月色欹眠樓角賞妍吟

次均廉山喜聞蜀游

游事生憐入峽艍況饒新詠寵齋裝
案頭杯玳兼宵卜簾際鶯花並笑將

子山集
簾外將

花居然
并笑

不分憑人專俯仰猶教阿世訊閒忙
晚來輸汝襟期好貫酒朝朝羅太倉

次均養公大營移洛感懷

溟海颺波掀鯤鵬戢其勢生丁元二灾
故老傾涕泗禹甸鞠荆榛哀我寸金地
廟略非不臧悍將階此厲鍾作數世患
摧及百年備天塹與共之攻難防豈易
既決瓠子河猶闕桃林塞鈇鉞苟不專
安能制閩外似聞鉅野公睨敵舒裘帶
智多決有餘深致堦蛙斃巖巖欲撼難
屹立負嵩泰倚伏難具陳符離事堪戒

爲虛庵題趙子昂與幻住上人十一帖附管夫人一帖

不鍾王孫元祐時蘇黃米蔡區等差排作北庭真學士風塵事主私自唏百長
爭被書名掩聖處那容玄宰知董凡題跋筆法珍付鷗樹侶年時恩誼儕壘簾杭歸
失去世緣盡乞度中峯老住持烏絲十帙淚墨澆豈徒名蹟與精辭波雨春天
對縑素攪樓突有龍螭窺卷置還君踵悽嘆茫茫持此將安之

子琳見示近什感舊情多即賦長句奉酬

列槩之門湔鄙嗜行卷字挾風雲氣似君侘傺我何云忍死人叢掌牋記武昌
魚膾那中嘗魂思遂渡茗煙味折柳別君會幾時忽忽江山颯悽異高姻劉傅
吾故人風日幾屨南朝寺海天驚失雙忽雷篋衍那存板橋志一息懸爲逝者
悲哀樂鞭笞人閱世携手酤樓醉無歸澆卻一生悼心事雙忽雷爲劉琰父所藏吾爲之題詠
傳哲生丈曾以精製板橋志見貽兩

公均君
懿威

次均廉山贈別林肯庵二首

宦窟慳分席一隅西
輶換得柳眸舒
絨書欲報曹綿竹謂綿竹
飯顆山人昨入渝君甚消頹

杜鵑聲裏杜鵑花
酒有郵筒錦有巴舊時巴
渴筆祇需宮樣紙
憑君將意薛濤家綴最佳

次均廉山觀洪

冥漢鞭雷電中天
諸象搖乍傾
雲夢澤若接海門
湖南牧千蹠
餒東歸一船驕

汀鴻吾念爾壁立太飄飄

次均廉山茗坐

浸市燈如炬欵江草似蘿真
應嬉水府誰爲挽
天河茗椀愁相慰
歌綃費漸多

俗懽蠲捨盡奈此百年何

次均廉山送新彥蜀游

旬夜無佳寐懸懷上瀨船
髯顏猶洛社家世異秦川
見文選君尊人官蜀甚貧
藥裹將妻護游程

抵雁先渝州米貴賤莫斬報長箋

疊均廉山積雨有懷

柳花燕子一塘温不爲春歸損黛痕境閱屯夷人自老緣隨去住佛何恩乞衣
深爲孤吟護殢酒添教旅夢昏樓眺撫心攢別戀雨飄千楫赴夔門

次均廉山紀事

隔水樓臺一望收沈沈著影陸行舟迴天障海晞無望獨爲光黃拼死留

親知均先入峽

次均廉山喜汪用羽至二首

廉山時居郵局樓中

二妙聖湖舊癩姿僂驛樓鵠磯饒卜夜蜃市探支秋

時武漢大水

鑿醉風月苦挾吟肝

腎愁詩王眠食地幽贅寓綢繆

散原先生居武昌最久

捨法何曾捨留情那可留江山欵短髻龍蜃睽孤舟短舞從嗤點羣歡失獻酬
吾襟終磊磊雄嘯接天游

感懷示齊陶

曾授君家匹錦來賦如司馬檄如枚白頭還汝啼無用虛費雕肝嘔血才

七月十四夜輪次巫山作

插天十二屏一屏一鱗爪真面安能詳乍見影亦好素娥恰靚粧揄袂晴昊表
雙崖挾藏之朗若珠在抱萬有無遁形睇到秋毫小懸心米鑑前遇物滋滋了

弘景傳還我舊神明棹歌風送曉不飲朱公泉颯自前熱惱邑有井甘冽宜飲俗呼爲朱公泉

望夜泊萬縣翫月西山公園過市重往傍曉始歸

懸城千級梯昇舉如躋天睥睨忱下視容髮壘粉捐危魂撼九州見簡齋詎謂孿

勝緣著軀岑絕處雄構亭翼然抱岫抗虹榭歛江豎雲椽明軒不受塵松檻
碧芊芊玉蝓沐海還凝晶黦黛邊倚風欲捫之淚睫眊神妍露滴茗椀涼秋緒
含霽川捨去行復來繆戀耿無眠世屯非負我資以耳目便扶夢聽曙鷄偃偃

仍在船

鄂都城下晚泊買小艇消暑

毒熱天褫色幽湍月浸涼
蒿深溼雉堞漏促戀魚航
漸喜朋知近翻憂世變長
清歌誰遣此冰炭梗吾腸

輪中聞劉君菴雲述亡友張子午省長逸事賦長句哀之且重思斐君也
中興諸老乖並世智名勇功無著處胡哉俛與時命爭虎穴潭潭子身赴李使
昔崇曠代才宣南曲譙厠巾履盛時歸佛宅深心千金難竄墨經注人中厨顧
折節交晝錦傳還非不遇仲文遽興生意嗟興公厭尋遂初賦慨慷義酬國士
恩書生果被才多誤彌天志業竟何云荒月葦村一棺付風塵故吏話酸辛遺

憾未趣襄樊路峽猿若喻懷賢悲啼迸寒濤徹朝暮

君主間道由襄樊入川不見從遂及於難

喜不日可面纒衛先之以詩

控扼巴瀘儼大邦西來旗轍望風降渺然人物朝星賡逝矣居諸晚汐瀧不廢
雅絃訟盧駱猶存餘錦被邱江子規聲裏吟懷緊撼汝千崖蜎霧窗

漢渝途中十二首

閉置巾車負一生峽游初紀夢邊程打頭風緊塵殘暑憤憤天公漸世情城陵磯夜泊

百拙千駸晚乞靈秋潭愁見鬢星星客帆那記烏橋夕謬認河燈當市石首七夕

不虞天角及逢君裁就幽詞寄陸雲穎人時客天津一段蟬聲榆柳外攢程西去送斜曛

沙市公園
遇關吉符

東郡趨庭四十年重來丁鶴已華顛錐心悽負成書托稍有才聲亦浪傳庚子歲先大夫

筦權宜昌隨侍來
此距今四十年矣

水宿身羈楚蜀間兒時影事夢追還笙簫隱隱大魚出自倚柂樓看夜山宜昌待帆

勾引秋光雁有情白頭償醉舊棲城飄零賺得新詩料一艇中流聽雨聲市樓飲罷遇雨

棗林紅皺擔肩頰涼雨天教慰苦辛入座雲峯儀態詭明霞解睞晚歸人

雨後園游

西來秀岫差相識東去奔潮不可羈晚磬聲哀讀書利栽松遽挺拂天枝

夕泛過姜幸子

祠爲重時與昆仲講肄之所

北馬南船信等閑茲游奇絕伐天慳瞿塘灑瀆踰龍象況有神鞭鬼擘山

入峽

問途僧夏計應非處處橫流孰息機聞說青城巒壑好衰齡便乞衲僧衣

苦熱

增重江山偉節人愛君友士見天真英流那屑嫺書畫層鼎噉當瑞壁珍

過張飛廟憶在

北平時有以公畫美人見售者某以三千元購得之近復有公畫碑銘出土皆好事者所爲耳

漿汗呷歌浹日餘慰家不用細行書新來祇有東南夢玉雪諸孫最念渠

寄家

喜雨臨廉山

瘴暑秋彌熾煎憂髮已蓬千山聞鳥喚一雨策神功索被行旆裏添詩敗葉中

僧雲閑倍可竚汝賞心同

纒衡招集市樓

長樓酣酒雁來歸悒悒秋心許子知野老倍嗟今夕意放翁儻見中興時不忘

吳廡涎葦菜吾家蘇獨久似說黔村譜柘枝人境闌然嵌軟語鍾憐天末客星奇謂成周叔章庚

白諸君

因子琳獲讀小石近詩賦長句奉懷

蔗境端須倒啖佳苦如橄欖專雋味抵死覓取詩工夫看君狡作一生計六一

游程不到處輸與子瞻出頭地散原生前未嘗入蜀曼吟若蕩巫女心豪歌自下巴童淚世

里南都欠宦情千架寶書鄴侯匹徂秋曲肱不耐閒強爲鵬花籠標置蟠胸奇

字付沈冥差賴桓譚能好事謂子琳有酒莫醅嘉陵江魂酸亘古流人記

問樵以詩草假諸丁君雲甫遽付刳灰賦此慰之

僚衆有賢苦不知錢侯閑止如其詩朱多王好無著處朱實多王愛好謂竹垞與漁洋也剜心自斲冰

雪詞龍蟠之鄉山水窟能稽幽士泯町畦官書忍得十年事卓杖風日偃吟髭
黑夜移舟踐妖夢棟崩軸折摧公私酸儒肝血那肯貸刼將行卷論茶毘善護
嘗揮蝕字蠹侏失翻誤借書鷗懸懷成壞前定在書空咄咄寧非癡況聞收京
露布指顧期挾君嘯卧金焦巔江山雄助恢珠璣

秋晚過纒蘅山居

瘦我青篋憶撩君白石歌刷翎秋鶻勁浮鼻夕牛過知罪憑孤乘浮沈負短策
摩天家國涕戀此一檠阿

疊均東小石

瘡鴻不印眸邊字天放藜床味無味念君止酒屬何心虛負郵筒百觴計謝客
生鍾辨慧才法乘證入深深地獨懸雪髻著情癡灑遍六朝松下淚

常麟嘯其下
今不知存否

授經馬旣藉高聲輓市鹿車失凡匹詩篇綴係元和腳並時壇將費樹

蓋兩江師範中有
六朝松梅庵生前

置辟疆詩壇點將
錄頗及近人

奚待秋風念江南鹽豉葷羹預人事欵樓日落睨神州悼心幾廢

西臺記

哀陳興

君字絮與樹人季子官財政部技士妙年能適於德由港來渝不幸遽以沒水聞

宗袞禪床感寺餘愛憐阿昶萬金儲傷心玉樹風流盡雁到天西客不如樹人長子先以狙逝

雨後山行

秋氣如寇深風撼陵上樹麗天樓宇佳屈作僑官署怛怛危處心行國暝安步
雨淨衆山歸大雲鵬背附裏露狂花馨銜石斷松固抱枝晚唱蟬尋吟愜幽助
保此便欣然奚必東山慕希世名實乖昨非憬今悟無魚菊可殮采擷悅遲暮

次均酬伯堅

短字遮天不願餘東頭容汝掛單居觴歌跌宕傾齊贅家世風流授晉書捷藻
雅教千管禿聖因能遣萬魔除西來名士閒平較政恐曹維衡梁寒操有不如

次均衆非紀哀

年年酌酒羊碑下今日東南寇盜侵一柱天摧關國命有人祈死淚難禁

鷗公來自黔中頗有讌集

詎料多艱日能偕十日樽世隨玄鬢換晚喻素心尊稠坐持詩誦長宵索酒溫
征西舊賓從悽復幾人存

携竹君江樓對月

舉酒東南望茫茫果欲愁遙江燈可數獨樹月長留垌野驕新策煙波戀舊邱
他年吟憶好秋序客渝州

次均叔章喜尹石公至同飲酒樓

豺豕千關伺奇能掉臂來攬裾人未老貫酒菊初胎醑酸懸愁味壇場付辨才
況兼長句好字字挾風雷

次均追和僉壽臣丈除夕感懷二首

壽臣丈去冬客渝時有除夕感懷二律詞意悽戾未幾遂謝賓客簡君叔乾既追次本韻且錄原作督和追維雅故難已於詞不徒期塞簡君之請也

祈死詩篇在堂堂獨此宵竟聯諸老去

散原乘三丈均新造

不恫首邱遙績有士行甓醇於

公瑾醪天摧絳冠早那肯負軒堯

名豈賢兄滅

謂格士丈

籌邊願力賒門才果騰蹕

吾湘魯濂平之流均出門下子大維尤有聲於時

世論未參差崎阻

償天劫酪酌送歲華盡然耆獻盡不獨哭君家

已酉歲湘綺師來游白下陶帥館諸魚園丈與重伯敬貽兩丈均同下榻余斯夕追陪其間丈時簡奉天東邊

道余語重伯丈曰壽丈精繁他日必至封圻敬貽丈不逮也重丈深領之

鷗公還黔在近疊均奉別

百八盤邊路懸懷別後樽山酤秋鯉大野宿夕鴉尊畫軸拈枝寫詩筒當史温

吾衰倦哀樂安乞一瓢存

次均伯堅寄家

霧邊城闕百山圍桐葉風飄卷地飛
悽有人間勞燕曲悵悵誰不戀東歸

贈曾大履川

并敘

君爲伯厚年丈家孫丈出先祖中丞公門
以幕僚兼授先叔讀與先子同
舉丙戌進士官蜀時與潮州伯父結昆季
歡曩在舊都頻偕寒山詩會丈
輒絮絮舉以相告頃承履川以梅月盒遺
集暨自撰涵負詩集各一帙惠
貽賦此奉酬固不勝感舊懷賢之悲矣

索驥九逵間我自知君早秀句股寰區生
憐字字好重是王公孫書冊付幽討
崇詞翼孝仁習之瘞皇考念昔床下拜
癯姿神鶴矯耳語兩家事欵坐捫酸抱
霜塵暝觴歌促使世緣了雅賴碎金傳
末流耿坊表老游眠食鄉德聲琴誦繞

渺然望歐梅龍蛇孰揮掃未墜貽厥賢符采中天芥元味儻復同短章抵松醪

山齋有懷

棟宇中摧力孰扛孤憂靡靡抱蘭茝樂風澤不殊三楚形勝居然帶二江獨憶
詩篇天末李竟乖鷄黍峴南龐打頭霜葉掀鄉思悽更鐘魚向暝撞

郊外詣寒操纓蘅不值

門巷青楊接白楊

兩君同居
春森里

堆胸詩事取幽商晚晴秋色淹孤寄吟到楓林葉葉

霜

再疊惕園感長沙近事

奇痛無前史殊鄉負此樽未聞羽書捷翻遣節旄尊藏壑魚應盡
用魚
弘事 隨陽雁
不溫生還知有日愁祇小松存

口占

海禽毛乍見，猿桷嘆維新。地坼天崩痛，關渠袖手人。

次均龍希靜丈瀘溪對月

我棲三峽日，君入五溪時。鹽米新生事，箬籐古別離。酒悲撩史實，秋緒結禪枝。奚俟求陽羨，牽蘿計不遲。

次均鏡予巴山重九

逝隙墜歡無計拾，西來季重劇悲涼。早從星象哀今日，未果天心厚此鄉。堆案文移雙研渴，掀天絮葉一燈藏。晚糜名窟乖懷久，矢乞楞迦波蜜湯。

曉峯四疊邦韻見，懷風誼斐篤情溢。行間不徒詩筆之超心，鍊冶層出彌新也。謹寄長句奉酬，庶亦越石所云適彰來詩之益美爾。

雁書昨夕落巴縣，故人肝鬲喜重見。雲龍蹤躡廿年強，世比愈郊宜合傳。眇思真爲苦筍歸，不似坡翁玉堂戀。挾張山邑書局隨，史筆記功三長擅。心屬青山

契臥游手栽碧篠翹
楛箭龍鍾遙念風波民
題寄草堂淚皆旋雪著
頭顱寧不知衰謝干戈一死欠天哀
會有南歸祥江春飽汝
菲梁膳

次均寒操九日

不待登臨已自悲
峽猿圍嘯獵風詩舊人落落聞歌覺
玄鑿堂堂讀史知戮力
神州吾亦可渡兵大峴客何疑
潦霖瞥失當階菊憐取蕭辰百感危

次均問樵晚眺

東流失朝宗南雁不逾嶺
粵亦不守負此老鍾鈎寒廳日說餅家國
塑深哀決臆彈

指頃砌角本色山延秋儷多景
雙丸跳不停百技舫爭逞
楓塞攢天紅菊場過雨靚鐘
咽咽疏撞笠屐綻癯影
烏鵲之棲依月桂戟枝靜
迴立視聽收泠然非
世境意根拔薤難吟歌不弛
警獨著讀書眸巖電寒
罔罔天塹安可航茗事乖
雙井桓桓晚勁松劄心矢交省

疊均纒蘅見贈

餘此江山待我悲，狹衷恆畏故人知。
唵嶽孰挽終顏日，風誼彌騫晚覲時。
雄盼仍年空壯駟，明夷孤憤抱南枝。
吏才詩格皆橫絕，未負鳶肩一世奇。

輓雨民監察

淚滴無乾土，驚呼遽痛君。
抵詩資永訣，煨芋溯同分。
世德湖湘誦，官聲隴蜀聞。
圍城千萬語，憶取表幽文。

次均海籌別京逾年

雙流凝照繁霜鬢，悔被饑驅有此行。
不醉樽罍常兀兀，敢嗤風物亦平平。
義城枯樹憐何世，杜曲深杯斷此生。
誰作九京山太傅，腹韜閤合善言兵。
謂長公

次均伯堅夢還長沙

驚聞慘劫及蟲沙，儲有千年涕淚賒。
歷歷釣游猶在目，茫茫瓶鉢本無家。
夢魂

應泣雙樓閣禱祀難償一念差佳處留庵天靳許合當飄泊送生涯

慰鏡予失子

學聞太學人皆嘆幼解玄經慧可知習禮南來吳季子悽看羸博瘞兒時

次均問樵寄訊湘中

青山撰杖天無色赤地論歸夢亦癡一炬豈關符讖事三句猶異見聞詞

湘中乾無確息

吞聲祝詛偕亡日凍骨流離集澤時悽賸杜陵詩史在許身稷契老堪師

曼若招集西郊花園

晚愛吾宗好千鍾在冶金酬時涵佛諦觴客襟詩心荒菊捫霜大寒鴉抱雨沈

滄江秋不住曖曖挹清衿

次均仲輝題肯庵瓶齋雅集圖

短簿林二京國舊北軌南帆習相見稠人那喻槎枒心夾穀獨譏風塵面波翻

星漢舟楫窮嘆子打包歲來倦參天遙詠葛祠松授簡倍思梁園轍昨示瓶齋

雅集圖湘州爾日蔚才彥迸淚幽吟世幾何天壤聲名土苴賤南海節度大父

行直聲循績世嗟羨文勳與先祖為乙酉同年中興佐命圖史存八州牙纛渥天眷玄髮致仕擁

深衣賜閑湖右荷池院大賢之後鍾達人黑頭奕奕帥鄉縣謂長公文蓋時燁赫文

武功峩冠進賢大羽箭沐浴幾從少長游雅翰流傳金百鍊招參府事震撼秋

中夜置酒唏事變典午果同路人心封禪符瑞市朝徧畫錦重還本願乖雄嘯

海樓閃眸電段公凡三次督湘均不久於位拳旗馳翼命世才雲起龍驤朔南扇堂堂大業出書生

驚有神鏑劈禹甸掀天手樹太平基遠圖晚欲拓蘭鄩長文經營西北計劃惜未果行中臺一柱遽

先摧注海傾江薤歌戀策馬寧過西州門燎原不壞靈光殿湘省大災獨荷池舊邸無恙第五之

名驃騎同撚髭沙浦存詩卷謂大武丈謝庭雛鳳無凡毛始述家風文采絢竄荒那

說聚星堂忍死當草文憲傳

次均韶覺重陽妙高台雅集

山海持樽見籬花
藹藹香揀枝
烏唱曉分稻雁隨
陽詩健矜飛動
心閑惜景光
難拋家國感鬢角
乍堆霜

次均衆非自題生日小影

縮影層樓懶是真
一牋妍發隴梅春
纔洪獨剖才無礙
遲速兼工筆有神
希世士衡溯高躅
臥疴靈運嗣清塵
高勳妙翰君家事
護念樽前見在身

次均養公續抗戰篇四十二均

齋雲不自怡
持寄嵩少間
曠闕異涼燠
念君幾政煩
君旣闕嗣音
我亦稽候箋
簷角烏鵲喜
馳枉續戰篇
赤胸揭忠烈
揮使書軌還
抵地金石聲
鏗鏗非世彈
渝州委淹滯
失侶樽展間
飈霧昕夕昏
木落摧長年
酒悲揪古抱
琴絲千萬端
誰令藩維抉
神皋穢腥膻
賜鶉天憤醉
彗孛星次纏
王尼慨橫流
辛有憬伊川

殷賑上腴邦萬棟黟野煙征婦歌藁砧戍卒唱刀環南睇淪羊城東望失狼山
嗟哉文獻盡縹緲千舶遷向來聲名人飲醜爭乞憐自拔俛無途延息夜漫漫
非族心則殊危禍踵不旋桓桓神武師貔虎陳函關組練皚日淨輜輶研谷墳
劍及義無顧天聲開必先會稽何足恥君子越六千冥魂游釜底若劃小鮮
沉聞互猜貳兇德終自殘會當京觀築行見藁街懸戈止三岳撼瓴建百河翻
酋京吾外圍規與民漁田商於安可棄珠崖安可捐轍志旣昭麗士馬亦精妍
磊落行間士義耻瓦礫全矢湔九世仇當躋三古前東山棋局罷風鶴走苻堅
眞聞收薊北悲喜衣裳顛仗義敦槃詞喪心莢豆煎近歐洲議進
行九國公約平生汴洛帥磨盾
風流傳旣眷幕府舊猶申布衣歡玉璣納絃網驥餘飴笞鞭闔澤浹子遺東人
謳二天翼翼成大功糜身盤錯艱元結頌涪溪班固銘燕然穹碑不世烈谷末
陵之巔

次均問樵遺興四首

高簡吾何敢耽吟異昔狂園花窟夜氣擇樹曝春陽除日看何損姚合詩官書讀

輒忘老慚知飲食蔬筍肉邊香

安此無家客天教老是鄉物情寧委悉世議偶包荒難抉眸間霧初添髻末霜

平居憐弟妹無翼度蒸湘

楓菊無遺影寒霄界混茫雲懸雙礎潤霜壓一樓涼挂舌祛臧否游心際聖狂

客來問奇字猶費檢書忙

忍寒遲曉月兀自倚胡床石耳貧初餌江橙老復嘗童時侍宜昌飽啖獨橋鼠窺乘隙急鵲語

媵情長瓶鉢閒閒對伶俜已十霜

君左大弟過飲懷舊口占

蘇家過邁雅工詩見汝春明舞象時汝尙禿頭吾可想生前邂逅且傾卮

投老儋州有重名幾將末禊託平生江南不在宣南在散帙悲懸萬古情琴志文
前有一

書與余云吾輩雲水人
不在江南即在宣南也

疊均曉峯八疊邦字均見懷

獨持芳惻戀宗邦采盡薔薇意不降人外看山悅玄覽枕邊得句似奔瀧等閒
莫負鵝黃酒何日真還鴨綠江峽岫昨逢南雁過寄聲頭白讀書窗

履川招同庚白伯鴈飲集市樓譚譙歡甚

角樓不落人間世屹有詩聲殷地天火裏栽蓮聊自調矛頭浙米大堪憐賞音
真絕廣陵散乞命還參曹洞禪慚負時流矜許意深杯百罰語彌顛

郊外桃杏村看梅作

棄我歡緒駸難援埋胸十丈煤塵昏聞說兩郭足佳處昇穿雙嶺侵星奔野人
不識梅道理山谷漫取桃杏藥其村花萼迎笑似相識愁著膩袷曲温磨移天照

海具殊勝神光電發不敢捫縞裘赤珮閒越立凝睇欲甦垂絕魂昨日天狗墮
地惡豈料蟻命茲告存畢生苦自爲情累亦賴好事湔煩冤催人頭白幾朝夕
挾天遽瀆唾涕痕撫欄惘惘岫蝮曠苦遲雪月欹清樽

呈子靖九丈

村兒爭看古鬚眉落落雄襟那許知垂死還憂天下事故人空膺壁間詩松枝
栽處干霄動梅萼花時琢句奇稍慰百年艱卓念山樓風日坐行隨

題藏經樓

脫影萬花域來參選佛場天猶鳴鼓角客已倦津梁通笈漉漉溜封條湛湛霜
哀時老工部獨暱贊公房

偕竹君謁華嚴寺

風鶴非不仁投止憇蕭寺策杖擁朝雲膜瞻莊妙地緬維破上人

寺爲明破山禪師所建

彌天

法根器赤手構琳宮臺閣中霄寄萬寶護穹窿烏鳶不敢視山堂風日暄鐘魚
亶幽契松杉鬱古香花藥膏寒翠巋巋三百年名顯伽藍記永令蓬藜鄉歡贊
優曇異餘生締聖因刳鱗失悲悻矧有摩尼珠澈照曾曲事

華嚴洞雙桂

檀欒花鳥乞春多奈此傷離念亂何十桂堂中珠履客今來絕域撫寒柯

張文舉
督鄂時

於署傍構十桂堂花時
輒集幕府爲文酒之會

曉起喜見梅花

山葩著意澤寒曦恰是重樓曉夢時忽到窗前疑是汝含情悽詠玉川詩

別山莊梅樹

貪與周旋老尙癡重來愁祗賸霜枝買山並隱嗟無命惘惘听宵索笑時

讀成禺近詩

劉侯府萬有勝處不緣詩義職
心卓鋒車獵目奇記功傾鑿齒君為鄆人
艷事媿微之終古愴難忘匡山奉母時

次均叔乾懷五朵窗桃杏村野人呼為五朵窗

歌籟難回東逝江凋年持夢暱
罌缸雪鴻乍失千間屋蘇傳曾文正公建江南督署屋九百九十九間今國府即其舊址
風

鷓還憐五朵窗得狎勝流茵
屢唾不愁鉅製筆能扛
萼梅忍凍天陔發仗藉才思韻此邦

除夕有懷

賸取波瀾入小詩百懼不廢獨絃時
白頭慚負冰堂語文尙無聞詩可知
晚來哀樂每關渠況瘁何曾了萬逋
愁是義城詞筆減愛才虛費趙王租見子山

重遊桃杏村已卯

聞說有花湧詩思及入花堆
斬隻字人物憐非典午時
咄咄書空妄相似懸命

天陞殷自哀，祆言驚復伯。有至皇遽縮，影五朵窗圖。畫悽披避秦，記賺得兼朝。
看桃花黠兒賣，我竟誰是兩。三白鷺冷水潭，十丈香花華嚴寺。老翁強自預人
間，負渠雨軒色馨味。謂子靖文朝報大書蠻觸爭，且食蛤蜊干許事。

桃林

成蹊無語果何心，祇費劉郎抱淚吟。一角江山春自好，石潭花氣晚鷗音。

歸途

煙雲頌此上，映州幾日春風綠。已稠領味菜花香，十里一兜穩睡過沙邱。

湘人呼
爲兜

兜

次均叔章乘飛機赴西安

碁邊納手晚難平，嘆想先鞭有此行。趨府偶同邢尹避，君入行政院而余甫出三
十年未嘗一日同官也角文漫

似傅班輕東鱗，西瓜終雙合北馬。南船又一程雪淨及關雉，篇什癡鴻銜向淚。

眸明

次均問樵王莊海棠

天波嬌此錦綳欄耐取枯筇逐日看幾奏綠章哀曲護爲燒紅燭慰荒寒人叢
不涴同塵潔春夢應償破涕歡池館垂絲無恙否舊會吟處兀難安

南京丁園池側有
垂絲海棠十數株

花時
絕艷

次均齊陶寄懷

卞珪蹟三別地勢使之然誰遣鴻廡案長寒翟突煙存賢音寂蔑

曾爲乞助於
補仲不報

繫夢

語纏綿付與阿連詠春池草正芊

次均齊陶山居早春

任取春風好君心吹不溫勢交嘖抱刺病頗怯支門欹側三間屋荒儉五里村
寢歌天不且負卻有情樽

題東臺高二適詩冊

繩樞怪底弼輝異，新有東亭玉屑詩。
名士無多憐汝好，彌天莫憾識余遲。
高柔夢負鳳棲樹，賈誼心乖鵬止帷。
烈烈國門買啼笑，憑教諡作有情癡。

鳳子夫人家居爲
其讀書閣君有題

壁詩
見志

和新彥上已用工部均

無計揮愁去，山花決目紅。
忍誣千世士，安望一樽同。
瘦樹猶斬澤，瘡鴻不任風。
傑然吾喪我，遑惜髮如蓬。

山行用前均

悄悄尋吟地，蠻花自在紅。
古肝歐欲出，癡影絮之同。
轅瑟追流水，披闔籲變風。
何裨家國計，生世負桑蓬。

有觴

有觴不舉意云何慄慄看春費淚多一枕詩心誰料理賣花聲過曉鶯歌

雷雨

雷雨恁中夜求衣幾起眠悸魂猊抉石快意蜃歸泉一澤驕江筏千軍淨野煙
洗兵佳朕見莫任淚皆懸

賦謝履川廕亭飲集

曾侯震其文朗若百間屋近友無雙黃韻事恣張目得錢覓吾儕咄嗟登核藪
風流非世人鋪啜蔚褒錄緇維汐社賢什九鐫鬼籙高名亦何庸資世殷歌哭
二子後起勁冕白不以沐臺閣要異才路嚴用應速羸癘枉拳拳調詞幾更僕
蘭砌初著花醉歸可餘馥

鄉居晚春

七寶修成白玉盤也隨人意照田間繩床穩置風波外使抱清輝臥屋山

度陌逾阡得酒澆漫將世務瀾吾曹負心卅歲供嗤點牛背眸光那肯高
雌蝶雄蜂不作雙春皇端自費平章歸心寸寸東流水誰遣天西弔夕陽
檉柳風邊鶯亂啼尙懸詩思西枝西顛春花雨撩天影歸向山樓徑欲迷

連雨

底事春歸雨不歸沈郎吟罷損腰圍傷心千事憑誰說數倚頽欄看翠微
萬紫芳汀一霎收在眸鶯燕欲言愁憐渠殢酒愁猶昨索索詩衷企少酬

江村

花盡還留蛺蝶飛江村惘惘送春歸奇峯明滅雲千狀好鳥啼歌柳四圍拚與
長聽風月笛悔不早製水田衣羲黃窗下高眠適解賦閒情那可非

上巳西安襖集仲雲代拈得太字卽呈養公兼寄仲雲叔章

元戎勁百死西安近有慘炸天祚其詩大筆追建安還高襟煜中外望府援馬枚賦檄今

無對忍知机案閒爽氣朝不貸有美歸古情元已撰彥會攢動鄩杜賢壘壘從
公邁秦川如掌平風花詭儀態玉峙少華峯含日松雪在龍興虎視都萬劫償
一快觴詠以陶之樂此無已太西笑夢影迷倚霄揭酸肺愁持帳下看譏彈例
曹鄩

漫寫

四山鳩語喜雨足綠陰肥頻自尋花處無人蝙蝠飛
樵隱等山居乖五饒七八握麈百艱心同衾委不察
白鷗拍水嬉吾欲詔諸前兀兀難馴意方人覺汝賢
浹日闕山棲春意軒如許天壤深情人乍見羞無語

夕過纒衡

愁邊春遽盡持意訊曹侯萬卷龍蟠閣孤燈鼠瞰樓陳詩不河漢詭世有陽秋

碎雨飄山晚吟歸塞子愁

虎橋觀瀑示章可

日從中散無好懷野鶴昂藏私嘆佳携與人外賭奇興我吟汝畫受安排絕磴
插霄掃蟲鳥海雲墨潑巒壑埋瞥見拳簾走珠玉滉漾天色與之偕萬松倒影
古潭底雨風撼處聲颯颯猿馳圍嘯失歸徑窮險還欲摩蒼崖眠食江南那有
此九死不悔滯天涯展巾乞貌簔笠翁詎有坡公愁硬差

讌集呈李協和上將

平居耽讀歐陽史與略崇規慕贊皇今日將軍豈苗裔一時健者舉摧藏鬣參

蕭培
安

短簿

潘俠
忱

虛襟致羈越平吳婉畫昌天芘禹州元老壯吾儕奚事輟哥觴

南泉之游歡甚寄謝理鳴

貫裘飲羣豪塵中聳俠骨使君信不凡安可無此客章趙吾碩交携尋江上宅

一闕失相聞歡復共新月延閣羅珍饈隆樓展茵席行市歌哭借引流少長列

行嚴携于從游

渺然戀真人

謂中山先生

懷哉勞行役

夷午將之成都君留之甚至

恨影雨絲間投老肝鬲熱重是

霜鶚資

君兼中央監察委員

搏擊失凡物抗言世或疑成史書以策桓桓囊底謀極知可活

國胡為信陵君祈死醜酒色

沐南溫泉嘲行嚴

湯山南北輪蹄倦晚泳西泉意倍新失笑黃州愛奇語老聃沐後定非人

語出列子行嚴

苦嗜大蘇詩

仙女洞尋水源示夷午理鳴行嚴

潭水清無底魚龍不敢窺諸公具殊相莫惜照須眉解珮情安屬移山願亦癡

相傳有飛來木山

松濤和遙磬日晚愜聞知

梔花

少年師事東州老授簡教吟梳子花今日山鄉三兩樹髻凋才盡負雄誇

谷口

谷口幽尋鄭子真樽筇晚晚意彌新玉娥增色闌城外解照千年不寐人

次均答行嚴談詩

韓杜蘇黃骨朽矣神耀麗天憑見之祧唐祖宋同自出慎哉目論區華夷宗相

萬殊忌執著法猶應捨真吾師士衡亦云有愛必捐擊悅了非隄心處宮徵絃作有聲詩光

宣作者吾猶及明璫瑤珮遺凡姿能數天厨等家饌有生祇服樊藩司謂樊山師鄙

詩擗擗那足道臣家夙乏中人資嘔血鑄肝才力薄塞門竊帝聊自欺君乃大

邦控江海南金竹箭天下知苦共酸儒麤競病經國偉業付阿誰玉笈寶書供

遮眼蟠胸千億山海奇勁筆直撼晁無咎惡詩淨洗康有爲南海詩亦自命學蘇並世梁黃

亦大好崑山之璧桂林枝履川蔭亭稍晚起攀古卓絕不支離閩材鸞舉楚不

競能振之者君勿辭動天感神豈細事
旣霧況解懷觸規一唱三嘆清廟頌獨
醒衆醉行澤詞餘年哀樂仗陶寫此義
慎勿詔羣兒君今諱我詩膽怯局促
下嫺鞭笞我亦愁君搏風萬里南溟逝
汗漫中與世路辭堂堂聖解藥震且版
蒲默證滋勿疑西雲一詔老詩伯勝幡
莽有雄魔窺

謂趙堯生丈行嚴行有成都之游往晤之

喜行嚴至

註：以下三詩應列己卯年首此係遺漏補入

角樓燈炬接酡顏賸說南朝劫處山
十代獻徵疲記蒨

君近蒐錄有清名家遺著甚夥

九衢軒馬耐

蕭閒罪言杜牧鋒初斂儒雅殷文鬢
漸斑玉壘錦江春寂寞仗君雄翰伐天慳
次均鏡予偕仲青諸君結廬鄉居

世味吾思熟憑牋幾憮然曷圖文囿侶
爭迹武陵賢風日撩新淚琴書返故妍
休持長暫較閒處受天憐

花下詎新彥

峽山花蕊也驕人刮目平添十丈春忍訊日邊近消息
陝區芳甸裏胡塵與君幾看秣陵花酥雨綿風逐鈿車
駝棘料知今日事探支榮樂遣生涯

疊均行嚴戲答

桐翁爾日狂勝癡吾敢階汝三沐三釐之噫吟拊天
換嗔笑何不歸對南與夷君兩姪留滬世眼
掩掩皮相耳駿賞安覓道林師詛日射天吁何世國
猶不國奚於詩

君詩西來倍趨驚并刀吳剪森英姿譎成持與老嫗
解風流何香白分司即今能者試品第李拔夏媚學
闕天姿曹程伯劣堪儕洪趙斬雲仲好事常吾欺

好意易人詩穉園頌人貪多彭士愛好冒鶴亭吳董卿胡石汪薛逾所知旂鼓略當數陳梁詩壇驍

將還捉誰薛運有詩填點將錄嗟嗟此事大不易駕龍降象裁一奇荆公嘲韓終自蹈費精

無補徒爾爲擬古嘗師子王子圖遍南枝復北枝隸事抑聞雲門老水中著鹽
味不離醫儉莫若閑世說砭俗莫若授騷辭衣法諸天善付囑願發玉藥爲君

規春秋國風用一律諱其尊者文其詞詩祖曲阿房次律晚頻繩美挺之兒文

士筆端銛鋒舌天祇海魅憑鞭笞蓬戶朱門原等觀華裘斧鉞恆同辭公羊美惡不嫌同辭

奪我之心置君腹君不聽水胡然疑行矣阿兄勿困我堆山詩帳磨不窺君譏余聽水樓

詩近誤

浴佛日長安吟集仲雲代拈得寶字即寄仲雲並呈養公

靳子致身非不早苦為耽吟倍潦倒漢廷絳灌不讀書試問詩工有何好對直

樞庭事豈忘風日聯鑣塞佳抱五洲壇坫籍聲名君曾參預華府會議萬幅龍蛇勅揮掃揀

勝題襟墨未乾眼底興亡悲草草老汝東西北人蓆帽躑躅長干道韻事還

追晉永和遺聞誰話唐天寶白頭歸佛終不凡高會龍華掌花鳥征西將軍吾

故人文武風流古應少懸天棧道夢難來吟思何日伴春醪

入鄉夕憇

篋無餘略策農桑世故翻教客屬忙烏柏樹邊晚風好幾從野老語興亡

六月廿一日夜鄉居對月

喘息猶驚昨事危幾勞銀海盼歸期風塵肯賁山鄉月鴛翼閒棲箭漏遲

城中此日始作

甚烈

仲輝見過署樓索書精筆

顛天風葉數能來人字幢幢嘆汝才不負一樓倚晴昊可饒千管狀靈臺高門
自翥鸞凰翼好句爭憐貝琬胎對客揮毫吾不稱祇堪閑處伴樽罍

七夕

鬢絲禪榻淨無塵露滴初桐韻夢新歌罷萬家秋寂寂畫橋烏鵲暗嗤人

哀時騷客髮毵毵巴舞渝謳謝不諳一曲天河啼笑闋傷心獨夜念江南

自門是日必流

配天河

一幃秋容織不成密譚清思憶分明閒來解誦長生殿碧落銀河證此情

西安馮園消夏讌集仲雲代拈得懽字卽寄養公

花霞春猶駐松壽夏欲寒不教隻輪返得乞百觚寬叔子甌人否留侯捨世難
遙憐賓從好巴曲奉餘懽

次均孤桐送蕙農還沅陵

逢君今復峽江湄霜鏢巾韜晚更奇兀有高襟頻中聖瑟然卓雅不緣詩高交
愴失山王侶絕學冥追伏鄭師曾是掉頭留未肯勝流爭想荔蘭詞

次均鏡予中秋後夜與友人論詩

鄉書無準鶯花暮誰勞江關百折魂涼訊初憐風拂席晶輝間得月樓門漸摧
生意時艱大偶褭癡衷詠事尊文物行隨猿鶴盡悽悽百緒付誰論

次均孤桐和衆非中秋

曠別松崖侶歌啼孰與親世催成過客歸慕作齊民樽末陶元亮弦邊石季倫
那堪今夕月費淚醉巫神

次均堯生丈題譚華鄙作

一代龍門制作才蠶叢不仗五丁開後生那識元和腳爭拜雲端御史臺

次均衆非夜宿北碚不寐

涼月捫山榭嵌君乙乙思杜陵三賦日開府二毛時寸草回春晷孤芳引晚卮

東雲雁書穩妒羨有歸期

君亟思還
酒將母

喜聞官軍連克湘陰平江

入湘諸將策殊功巖邑氛霽掃蕩空鶴唳風聲三島震龍興雲氣九州同建瓴
形勝關天下破竹威稜在域中竚望羽書頻送喜青春作伴棹江東

華巖洞桂樹下懷匪石

雙桂鋪芳石礪西隔花秋士費吟思聲塵若接咀魚末才韻寧忘觴詠時生本
瞿曇常示疾官如漫浪漸乖宜次公客死映庵老誰和三中絕代詞

時君寄住華嚴寺禪房

已卯七夕西安讌集仲雲代拈得弄字卽呈養公兼寄仲雲暨舍弟季和
彥集肇孟秋裁吟秋逾仲英篋來復還霜鵠翥霄送堂堂百年心奔湍駛難控
瀕老惜交親祇繞長安夢靳兄暨吾季別深眷增重四極鑿戰軒燈燭何夕共
人海塞門棲風葉打層巷誰肯念此翁槎枒乖世用鳴皋希遠蹤考槃悅幽誦
瑤琴非真知抽軫怒不弄

觀羣鴨戲作

鴨欄閒獨覩蟻陣眩生水暖會先覺曠歸亦念家善鳴應見貸類聚本無他
駭極元旻輩誰將美諡加

纒蘅飲集賦謝

投分曹侯強十年憾欠品藻湘綺前微獨皖黔政聲好揀客考詩超可傳秋園

山閣動高飲雲黛篩影疊盞邊章

行履會川黃

潘伯

愁絕倒餘子況皆來僚賢

續衛叔章

彥遠介松皆行政院舊人

肥魚大敵灌瀘酒莊諧疊疊捫真詮比月郵死猶不瞻竭來歡集寧偶

然蒼鵝示兆天未悔仍聞胡騎禍湘漣腥羶四羅海水赤東南杼柚蛛網懸吾
儕寧預家國事政宜痛飲澆愁悵風颺花午鳥聲碎醉睨裾珮爭翩躚

次均海籌九日同登王莊山

景光割取媚天機信足寧嫌石徑微一雨山山懸本色隔江葉葉澤餘暉臨涯
有畏雄鯨吼抱柱還憐乾蝶飛不飲市樓良負汝秋心獵盡竚東歸

次均縷蘅赴西藏留別

才鋒表表掩江邱玄覽安庸戀本州樽失詩流誰卜夜菊憐邊客爲留秋且教
西徼知麟鳳未負東山迸樂憂好句郵還先及我癡看雁足影巖頭

次均子羽月圓樓望

欹樓遽有古今情，刼取寒波入抱明。
未分江山隨鬢換，微憐日露逼秋生。
烏衣雋侶還餘我，白帽雄襟那肯平。
去後思存梅幄瘦，閒閒茗椀數殘更。

伯君見過復示近詩

筆圭久矣無佳士，能枉高軒費嘆嗟。
應任老夫傳雋句，不嫌更僕索新茶。
當年日下人如玉，來處終南雪可花。
影事幢幢殘紙裏，悽涼相遇況天涯。

翠華山登高仲雲代拈得有字詩成忽冬至矣

淵明磊落人閒居，慕重九我老落峽江。
索索竟何有，猿嘯秋不情。鼠鬪夜相守，
翠袖乖補蘿。白衣孤送酒，誰教俯仰間。
殉世償衰醜，徂西朋樽開雅韻。澤璋自
誇示，鵬之同後機。私自忸跂想，二華巔
雪葉舞瓊玖。諸君興不淺，會復揮吟帚。
名篇肯寄將，深護不教黜。萬年冰雪心，
揭付歲寒友。

偕旭初孤桐詣尹默梅莊

墨朱狼藉子沈子著影梅莊不見梅北海空憐少章老東坡獨嘆米顛才豈同
任俠因人熱莫靳樵蘇挾客來拚與糜精無益事刻期白戰鉢鐘催

疊均懷香宋纓蘅

煙花掩靄炫春城此日何堪憶兩京在手文移揮不去當胸崖嶂劇難平漫游
西問雙鳧寂蘇軾雄句東看一架橫香峽上新來感幽獨長鏡遣得有涯生

次均香宋懷纓蘅

癡佇歸颿釋吝勞見康樂詩吟筇初倚梵天高譯鞆爭候才堪副笳鼓遙聞夢不牢

儻邁優曇饒慧智莫尋貝葉費爬搔懷人榮縣方瞳叟獨倚寒檠草命騷

次均二適見懷

梅萼憑樓春有意憐渠能賦滯荆蠻嗜痴那肯斬田宅君懷十
畝蘇詩憤俗真當沽市

寰蠹簡畢看人未老雁梁分啄世微關貧居亦有陳蕃榻襍被能來一破顏

次均尹默飲集贈真如

障海東還豎勝因悠悠若自較冤親能交吾輩詩添好不負生來岳有神換酒
騶裝常質貫扶天部曲與彌綸公猶遲暮他何說恃醉休嫌語意真

次均香宋丈水瀉

雨風浹日費欹頗堪念巖棲邵叟窠行散輒煩木居士償歡初謝金叵羅

君近止酒

詩篇廁上應彌勝班舊歌邊已不多情極杜陵憂國淚吟望壯傑挽天河

次均香宋丈病起得鄙詩

晚來坡叟世緣疏爭重欹斜淡墨書卅載雲山終老是一江鱗雁渺愁予

榮縣久無書至

麟經寧獨關褒刺缺舌頻勞訊起居亦有窮詩資莞爾歌樽況及雪晴初

除夕

身送維摩五七年山谷詩維摩老子五十七黠癡往往被人傳祭詩鏡聽閒刪去政可冥心一枕

眠

稗官風味冷如僧亂帙疏花護雪燈何日天戈竟東指浯溪刻石老猶能

韜園辱示詩冊賦贈

北轅貌得太行奇吟帙晨開若見之篋有新書王傅裔老爲上客杜陵時臺司

爭重吾能說謂孔程兩公師習友既離皆賢人可知披對安容作凡語峽鄉萬壑面春姿

次均廉山除夕索評詩冊

蹙蹙吾偕汝千艱迸此時箋天肝代紙饋歲淚和卮南蕨妍同采東颿詔所思
餘生終不負叙左慰深期

次均行嚴歸示近詩

繞樓蹄轍萬雷譁爭看劉郎去後花君花時游成都塊壘偶煩中聖酒風情猶戀小團茶

平居管樂垂垂老殘夢巫夔處處家
修飾嫫媧歸自憫敢儕秋實與春華
寸偈人天懺萬譁廿年聖解見桃花
耳中已不區牛蟻舌本差堪辨茗茶
澹忘鯖羞五侯宅貪吟芳萼四娘家
鬢邊滄海風煙幻虛負才思述夢華

再疊雨夜懷行嚴

短樓殷有萬雅譁在目情山霧染花
劇念高居欠蠻素豈嗔殘客索煙茶
雄吟難掩風雲氣玄抱微矜著作家
隔雨佳人憐咫尺酒宵歌哭損年華

三疊行嚴過飲有贈

野徑風吹犬語譁生愁軒馬損籬花
梅鹽終負能調鼎煙水聊堪自煮茶
天壤不情安著汝古今有幾果名家
急觴拚遣飄蕭恨喜更謔篇似薛華

四疊夜與行嚴夷午劇譚

玄史雙詮語不譁風期澹似晚秋花
託音陶令無弦木回味蘇公已飯茶
文武

道微宜納手樂哀年迫不緣家天涯忍料妓宵共短鬢欹樓惹月華

鄉居懷行嚴五疊

人外相望異寂譁癡吟幾落雨燈花陳詞爨吳肝爲紙痛逝虞淵淚當茶守責

不關良可指

潘伯
廣語

江山信美那容家萬艱迫令風情減虛負樓居萼綠華

君比有
放遺疊

素之
意

暑夜有懷六疊

已失蛙池鼓吹譁墻頭棗柿各添花貧居漸嘆薪炊桂暍夜頻煩橘代茶殘磬
憐應遙和我短簔悔未早浮家跼鳶生世矜無恙寂寂寧慚鄧仲華

曉過什家舖七疊

喚回殘夢市聲譁鬢角初涼浥露花真合勞生謳草草可聞嬌語喚茶茶
頻來敢恚人爭席投老還教客作家堤柳鞦韆絲吟撫久心憐張緒擅風華

見湘
綺詩

偕子奇詣行嚴八疊

畸天還許笑嗚譁
慚負家山手植花
佳士遙將青玉案
短奚幾解錦囊茶
能平軍國無凡語
若數文歌亦大家
海上鳧毛驚乍見
悲時寧祇老張華

九疊憶秦淮昔游

聽雨歌樓管吹譁
劉郎平視六朝花
幾煩纖手分盧橘
亦博流波遞芥茶

見板橋雜志

座上青衫皆淚影
江南黃葉本吾家
妙年趨府今頭白
還到鵲鄉哭寶華

端忠敏督江南

於署中負寶華庵落成日公語余曰他日當以居君耳蓋指賤名爲諶也

孤桐擬傾橐爲刊鄙集感愧其意十疊

敢提瓦缶抵雷譁
才盡江郎筆不花
詎分療貧長煮字
差堪賭典免傾茶

比數有鐘集

黨聲雅自傾膺泰
俠抱今猶見解家
乞序士安君定許
酬知生世結棠華

詠古十一疊

搜粟籤了郅屋譁杜陵感事哭江花
孱王猶自悟蒲脯驕使何勞較酪茶
忍說流離了暮齒誰哀零落屬良家
江河東去追難返悽望神皋黯物華

十二疊閒居

唱曉嬌添鳥語譁寒香依約隔籬花
繫情遙戀章臺柳療喝頻資顧渚茶
夙與周旋寧作我不嫌通峭自爲家
藥鎗齋鉢垂垂老耐取禪功轉法華

嘲行嚴十三疊

真人夢蝶息無譁閒殺山樓一邏花
名士價輸中噉餅徐娘味似隔宵茶
狹中

偶署非朋議

君近不著驚緒

賦袷常踪釋禮家

君論詩獨服海藏

書體文思今代少此才惜不典清

華

鄉居喜約農至十四疊

劫地人來曉雨譁開扉同對紫薇花

園中紫薇開

爲傾經歲閨中釀肯伴餘生客裏茶

事大端宜諸國老

君因教育事就商于子靖丈

情親不獨係甥家

余婚於曾氏然與重伯履初丈先有文字忘年之契

中朝閱閱飄零

盡喜邁超宗世載華

十五疊晚過浮圖市

邪許聲邊耳語譁夢回滋戀一林花近人舐舐牛浮水泥客嚶嚶鳥喚茶賸此
枯眸對桑海悔不賴肝作田家東坡妄擬香山老幾被塵襟浣道華

讀史十六疊

高讌長圍鼓角譁舊人誰唱後庭花軍前祇自醺牛酒塞上無聞市馬茶猶恃
江神堪捍國終望戚晚肯輸家興亡一例南朝事儲淚重當弔麗華

十七疊懷散原文中正街故居

一角園亭哭笑譁客來爭賞老簾花玄談偶把松爲塵孤憤常傾酒當茶自有
耿光懸照世定知魂魄望還家

文遺稿未歸

蕭辰影事悲安忘雪髻銀床汲井華

十八疊懷樊山師

丈室蕭然聽鼠譁幽憂携詠輞川花

公典率落時憲常帶抑一日忽促余為設茗魚園招散原文歌讀竟日

風流一代題梅萼

紅梅

詩甚為當時所重

晚晚孤棲諡茗茶

晚號茗樓又曰茶人

龍性不鑄山傅啓

謂張文襄駟塵頻過李師家影譚謬

擬隨園輩誰嘆高文蔚典華

續衡挽持便是倉山一輩人

懷端忠敏師十九疊

平原傾士夜樽譁爭買吳絲繡衮花一室分嘗天府餅雙筇借啜佛巖茶銀鈞

映澈爭墩榭

公重葺半山亭

寶鼎

所藏毛公鼎為千古神物

漂零估舶家黃米戟庭三易主此生那可夢京

華

公在北京居黃米胡同

借問樵編輯戰史暇蒙評隲鄙詩甚伏其精允二十疊

刻羽含商世耳譁欣知英鑒老無花得錢且覓忘形酒聯榻當傾體已茶魑魅

鼎前皆史實雨煙碯上有君家

君實居北碯

畸人不獨妍詞勝三載圍城貌更華

二十一疊洞夜念行巖

儘饒諸妄幻譚譚習盡維摩那著花南館未忘淹旅食西江莫惜勝官茶見後山集
窩題安穩天應貫鄉謚溫柔晚可家入峽杜陵差不負千詩在手湛清華

寺名酬唱錄並叙

左疊均寺名凡七古二十有五首本均倡於孤桐余初謂長慶體無疊均
先例孤桐謂何妨自吾輩作古因徇其意漫爲之孤桐涵負得詩百餘篇
余乏二君之才辦此已做賦悉索矣寫定供來者撫掌之資云

次均孤桐比日讌聚之作

勝因跡遍南朝寺西來漸欲褫文字不殊彭澤酬影形安與玉川聒同異青藜
頃近擘峩岷菩提坊裏春閭闔法中檜棟隆願力掀天龍象擾之馴世變乘除
三十載鶉蛙化去幾人在危樓雪鬢歌哭同唾處風飄澆溟海避地堂堂老楚

卿醇疵得半世儒驚

見韓文

忍憑故紙灰堆裏刼取千秋萬禩名

疊均履川述懷

簡栖能銘頭陀寺仲將能題懸勝字二者於君皆自有詞源筆陣鬱嗟異謫仙
生世本巫岷巷接青楊風日闇東閣觀人無著處相公恚渠才未馴蹕厲中原
越時載仲宣未負羸經在蘇黃斂手訟風流紅袖艷遮秦淮海高文奚必致公
卿沈沙一賦漢廷驚何如載酒江南去博得人間漫士名

再疊伯鷹習書

南朝四百八十寺寺寺籠君換鷺字絕嘆霍瀾雲瀑妍搏與才人弄光異昨扛
瘦骨投幡岷琴閒酒半色闇闇曼吟遙曳天風舞冶草顛花隨意馴老我冶城
忘歲載楊瑟劉君六雋侶今安在兩君均皖人尤雋人也青眼高歌不負渠左援潘江右陸海謂履川
擺落官書暱墨卿似聞三絕椽曹驚哀時惘惘庾開府愁向江關擲盛名

三疊孤桐戲檄蔭亭

打包不肯宿僧寺登高不肯題糕字誰屬君家秘密藏著人深地費嗟異南衡
闕面面西岷輜師門士玉闔闔玄鶴天半愛毛羽奇姿寧爲時世馴況聞水石
拋時載皇宰靳留真迹在不分山王嘯竹林詎見羊何和臨海記室雄文軼馬
卿飛書何使鄴中驚詩壇號令嚴官府已斥寒蟬仗馬名

孤桐頻跡雄作四疊奉酬

念君積別麓山寺倂奇摹得李邕字游梁說趙翼羣流刳休遽教時地異駕天
昨肯蒞江岷樂此風物絃聞聞眇心若到遙古處狘鳥蠻花假使馴我年殺君
劣三載蒲柳未秋霜髻在舊人猶憶李西涯大兒可呼孔北海春池吹皺詎干
卿火迫詩筒撼夢驚終歎徵君仍好事梁臺諸議有渠名

五疊孤桐寄香宋侍御史

使翁媚仕躡卿寺晦晦誰復稱名字霜簡朝聞夕罷歸在天隻羽倬祥異神游
是不踰夔岷禮堂萬簡青閭闔定知經術孕材武窺境劇賊望風馴悽憶移舟
三十載玄都花樹吟安在篋藏諫草避人焚畢生忠義懸江海堂堂故相作新
卿圖畫嵩山士論驚痛哭西臺誰省得愁同孟頫賸書名

六疊寄匪石

曩昔幽尋華嚴寺到門匆匆題鳳字癡狂不畏石交頤雙桂羈人賞馨異卷書
先我來巴岷禪房花藥秋閭閭百年衷抱作惡處上方梵唄攝之馴起陸龍蛇
遽三載歌哭肯容吾輩在詎因杜若戀汀洲猶倚繩床障滄海雅聞度曲妙耆
卿風物殊鄉惹夢驚蛛影猶存啖謔語雲間日下狎知名

山鄉紀懷七疊

文移不樂溷官寺書大懶作細行字萬緣於我果何預苦挈荆凡較同異風波

天遣羈夔岷崖堂僧夏松閣閣眼前詩國互雄長辦取杯酒澆之馴閱世踈賢
成代載淮南苦賸雞犬在何堪策馬過西州便擬乘鼈度東海家世鍾漸長勝
卿梁山風雨宿心驚右軍誓墓情詞苦那向人間晚噉名

八疊酬涵負

君能篆銘碧落寺我亦解參黃絹字敢說川潦等一源同不同兮異不異楚有
衡疑蜀有岷排宵酬唱醪閭閭郊愈割天鬪苦句雄幟寧爲李杜馴並驅憾失
元和載寸心奄有遙古在詩格君豈王半山史才我亦習四海發興緣卿法用
卿墨場飛將百軍驚還饒廣武英雄感豎子空成一代名

衆非招飲姑姑筵因憶畏公南游軼事九疊

德人粵游姑姑寺女冠圍寫烏絲字今君高會姑姑筵勝情寧與昔賢異漢臯
取別集幡岷長年弟蓄墳篋閭神鋒舊可剽兇象萬辟千灌糜之馴國瘁人亡

經歲載征西幕府幾人在松楸安得酌北邙旗馬猶思過南海棟國隆家代有
卿鳳毛愁使老兵驚此時飲會張三世豈許凡兒浪得名

涵負雨夜招飲康齋聯句紀事十疊

諸仙翮止般若寺金函瑤笈失凡字噫咳愁兼帝謂通赤電中宵赫殊異樂此
不悔老巫眠賭詩說餅茗閭閻萬年馬揚降生處豪語讐使才魅馴幾憑嘯詠
遣年載白頭仗有同心在西來未負羣玉山南去儻尋香雪海端憂著述慕虞
卿白壁齋還二主驚遑念承平榮樂事瞻園鐘鉢最馳名

憶借竹君焦山之游十一疊

携汝曩游碧山寺但噉鱗魚不著字三年夢欠到江心勝處煙鬟儻憐異雅慕
峽流與岵岷巖頭質廡眉閭閻別來韓愈懷終戀抗世高柔意已馴橫流入望
擲年載百罹抵迫霜顛在羈越平吳本願乖準擬扁舟泛湖海消渴新來似長

卿茂陵涼雨賦心驚藥鎗經帙明吾老被晒還兼吏隱名

謁孤桐不值十二疊

媛羽圍樓等蕭寺棐几獨存黃庭字撫樹婆婆念仲文誰遣時移復勢異經年
綦迹淹西岷商略今古波闐闐海內李薛長句好我已短氣君未馴人境締交
垂卅載火冰倚命癡蠅在圖游已失九老峯絢世猶投萬人海重是坡翁賞曼
卿芙蓉仙闕苦猜驚幅巾莫憚頻來往成此風流二老名

懷故相國張文襄公十三疊

白頭憂國行山寺倚天自勝豁蒙字指揮直欲失會胡互古江山耿恢異雅知
風教表峩岷西來常夢倚闔闔手提橫流納邊幅稟知坡穎裁之馴繫國存亡
三十載董公健者晒安在謂袁世凱高文不廢萬古流故第倘存十利海戟髯公相
黑頭卿奧略長教譯寄驚趨府少年垂老死人間慚說賸詩名

孤桐重居上清寺樂廬作此調之十四疊

頑仙耽住上清寺豈爲玉皇參文字百經此地眼忽明世情水木助清異危樓
髻影嵌江岷不妨門帙署閭閻一杯兒壤訝不得酒宵縮手巾難馴涪溪刻石
知何載日月風雲渾自在孤謳君儻疲津梁豪氣我已捐湖海並世推卿忍死
卿石船槌碎不容驚槁衰行澤天心酷誰念當時有美名

孤桐諸君枉集翌日十五疊呈桐翁

此會何殊龍華寺羣真各腹瑯環字身能豆粥辦咄嗟屑與王郎鬪珍異盍簪
渾忘客沱岷菊燈卜夜天闍闍撒米成珠等閒事老猶狡獪非不馴生晚不逮
過江載永嘉祗賸流人在猶夢著經西及關真當抱詩東入海聞說新書報仲
卿俠腸荐士語堪驚還饒絕業藏山偉生世龍門史有名

論詩十六疊

變雅百章存閤寺竈婢亦解泥中字妙手偶挾造化機緣情體物不差異杜公
勝處勝巴岷憑知詩教葩閭閻島郊琢詠臻絕被嗤坡老格未馴屠龍學技
損時載蛻骨終留凡胎在苦將末契託後生渠自東海我南海少年側艷步飛
卿綺語流傳暗自驚政應熟精蕭選理西江餘潘那能名

鏡予以十二門論見假復睽新篇十七疊

壯也授記定林寺膜禮仁公習梵字悲聞靈骨塼塔局貝葉諸天擁光異西來
夢佛隆嶓岷同參吳季袞閻詩龍酒虎時作態弘網十二摩之馴沈沈震且
昭何載東南像佛燼灰在天女猶教花著衣麻姑空悼桑栽海才慧閒來嫂柳
卿江帆如願不容驚醍醐分乞湔癡惱矢有餘生誦淨名

和旭初感舊見贈十八疊

丈人宦羈鵠磯寺暇日多從究文字六龍下食無凡鱗詩翁夙嘆門材異雄筆

聞曾檄蜀岷晚交仲子漪闐闐興極逕排書畫舫世無坡涪那肯馴白頭獨憶
光宣載江楚相望賢師在憾君不獲灸風流西北支離卧鵑海杜曲平居重孟
卿風塵捉手此堪驚鄙邦況念神明守待致郎君識令名

行嚴得疊均百二篇衆非孤桐等均集戲題其後十九疊

癡翁果構孤桐寺畫肚日戰四聲字廿七鮭菜消受難哇作酸噫有瑰異期君
故事修夔岷六一堂上鐘闐闐菊邊送酒使乍到月底敲門會不馴人生在自
憂千載短檠勾動唸情在何日快覩九州同江淮河濟注之海北雁書來訊子
卿秋聲四起醉魂驚愁將膾鯉屠鯨手換得批風抹月名

偶與孤桐論荆公故事作此證之二十疊

罷政老棲半山寺苦與謝公較墩字圓通倔強性偶殊專主隆民事無異朋黨
渾忘有洛岷畢生質白號闐闐老魅江南傳短句蘇二黃九低首馴經綸上冀

漢唐載同朝誰諒孤忠在百艱圖樹富強基遺恨無方復遼海分謗何心怨惠
卿辨姦一論意差驚青苗保甲雄規著未負風流治實名

衆非招飲二十一疊

園府職綱殊省寺當機早了等因字豪襟斥取十萬錢堆翅大魚羅鯖異如君
差不負沱岷峩眉禮罷雲閣閣諸天付與大悲智前身業障劇之馴刮目三朝
勝千載散帙時見新吟在自研險墨榜筠軒頓覺寒花眩銀海酒酣畧分欲相
卿行馬郎君貴莫驚王謝渡江人有集亦期善紹治弓名

壽會汝嘉四十二疊

太傅功德毗盧寺金碧昭懸肇窠字公孫強仕千關來長松風舉互矜異跼天
歡復集西岷平生甥館琴閭閻百端倚伏誰料得盤錯翻教骯髒馴焚玉崑岡
瞬連載一門昆季晞安在消息愁聞簡沈江願力安同杯渡海迂矣陽秋蔑世

卿金張七葉上都驚河洛波瀾吾畧辨憐渠才抱最知名

亮吉見示洛磧鄉居二十咏二三疊

洛磧西端隆福寺香翁可題千佛字山靈憐子果知還
皈依寧與錦堂異蘅扉不掩對巫岷翰墨酣作煙
閭世緣偶著內熱處綠天如釀沃之馴馮客泐名
經幾載一龕枯佛無恙在延僧不負月歸潭
襖秋猶饒花似海晚來閨諛號卿卿賭典傾茶笑
自驚爲說戴公山下好短艤乘興買狂名

香宋丈評余書殊酷似香光寵飾嫫鹽慙負雅賞廿四疊

小年範習碑塔寺亦愛玄宰學米字眼神腕鬼晚自嗟慚
共鈕袁較同異子雲奇字本西岷今見丈人池闌闔
侔天自有屋漏訣顏家釵股角之馴折檻歸來不計載
玉堂寶書森猶在徹底神通象渡河片爪之而龍戲海中
朝書體詡清卿吳中丞大激造化新回藝苑驚瘦硬百年添紙價
斂毫私晒墨豬名

元日過涵負飲

庚辰

老至饗仍及非君孰枉招魚蔬憑世貴花藥倚人超國有無雙目生逢第一朝
降幡端欲把能事付天驕

千萬鄰猶買今不費一錢有兒詩學我無命相何權白戰拋全力青燈媚獨眠
官閑事事韻曷減永嘉賢

夢季萼有感

弱齡歌榭飫才名畢爲閑愁促幻生幾向旗亭伴之渙亦從簾肆索君平新詩
零落春應負殘夢依稀月自橫悽憶習池連榻坐驚鴻照影嚴含情

人日得香宋書卻寄

江春吟憶榮州老得見榮州書亦好頓使緒風甦病魂恍有幽苔拂塵表堂堂
翰墨魁瀛洲渴驥驚蛇恣揮掃蒼卓奄具南北長李會凡筆不足寶一榻野鄉

四十年那許冰炭轆衷抱歌哭難忘氣類人偈示詩功祛煩惱桃花聖悟尙何
疑此翁著意非草草知是麒麟地上行靈山膜謁愁絕倒

次均酬紀南讌集

兀有茗樓酒百杯汪倫情極喚春回圖中山海孤玄對壁上詩篇愜別裁翹座
羽冠賓甚偉質廡椎髻婦多才惠風助喜撩情話莫惱重湖雁不來

次均鏡予樓望

風破層冰凍解嚴篔簹初茁綠毛籤禪功澹似一瓢水詩意溫於挾纈簾便擬
等觀睨凡楚何煩寵飾及嫫鹽冥鴻得意塵沙表似晒勞生苦滯淹

次均問樵元夕

積世婆婆粥飯僧淮南雞犬失同昇一簾晚黛濃於墨雙桁春江直似繩翠袖
閒翻金谷曲白頭愁看錦城燈閉門心事堂堂在新婦相嘲卻不應

次均問樵春望

荒荒圖乘面山橫難遣花谿太瘦生潘岳自嗟魚失所劉琨還羨雁能鳴携雲
納袖憐殊趣汲井煎茶賞獨清吟憶冶城春味雋綠楊繫艇聽啼鶯

疊均嘲問樵

晚憐承旨等枯僧難忘鷓鴣管道昇眼有千秋金鑿鑑腸如百轉輶轡繩娛饑
安望沙成粥照寐常呼月作燈參得法華諸妄寂竭來綺語大非應

次均問樵見贈

暖夕茶煙子所居遣情此復聽歌無奇猶當日菰蘆士雋紹平生笠履圖薌澤
彌憐波際影絮泥不澆定中珠妍吟況媵簪花字丁語深闔買錦糊

次均齊陶懷營盤街故居

昔翁高築郡城陰睥睨會胡峙史心馬過竟悲山作屋鶴歸還恐檟成林待憑

王粲恢芬緒永爲鍾期痛絕音頭白負心非一事倚天酬汝涕難任

次均鏡予借馬韻初邨居閒集

家山崩柝困盧循野老吞聲那當春淨地應無敬容客碩交況有李邕隣天憐
慧業羸清健鬼妒玄文聚苦辛萬象歸心太平域古人渺矣愛今人

預生寄近詩有答

陶齋舊賓客哀此兩幡存祝世詩彌卓懷賢酒不溫情江酸夕夢曉柳失春痕
攬袂悲無望中原虎豕尊

次均鏡予懷王莊海棠

便欲絜家王莊住欵江欄檻好煙樹頰髭摘盡獨憐渠紅妝睡穩羅香霧雨風
作崇勒春光尺咫遽成夢中路天陲無處可藏愁懊惱新詞閒自度聯吟每嘆
鶴侶稀偶經苦觸蜂衙怒況更江南消息無粉本脂圖定非故讀騷飲酒買狂

名拚與百年長錯誤亂鶯又報及花朝招邀何試蹣跚步

次均纒蘅雪山曉發

瓊玉山頭一雋人褐裘側帽逐茵塵征輶莫述伽藍記邊瑣初領正朔春陸賈
輜裝循海壯子由詩句出關新茗茗萬里方茲始跂想翬霄翰翮神

壽行巖六十

翼世藏山兩不疑同光元氣欲歸之自方管樂才堪副安得晁張轍並馳
八表獨閒霖雨手一樓能納海江奇總持風雅名張甚不負西來數百危

君持學東坡

涵負見過

詎辭蹇蹇老沱岷鬱有龍鸞與比鄰苦爲文章常共命不緣家世始相親官私
能了癡無對哀樂相煎氣漸馴怪取彌天著詩意短筇持有野梅春

公庶招同夷午行嚴倘君飲集沙坪壩大成製糖公司感賦長句

欠我一樽邊十年今來痛飲寧非天兩京舊人快意聚春陽妍暖張勝緣憶翁
當日壯才畧干鎖輝徹斗牛躔逸足竟付中道折文藻風議歸簡編郎君舊起
濟時用捨官植藝策幾先手蒔霜蔗百十畝資世甘食羞較錢王符不廢齊民
術范蠡亦有計然篇矧此樂郊雋風物柳枝梅實雲角懸撫事懷賢費唏嘆忍
辭百罰深杯傳人生奚必果還鄉隨分端欲乞一椽

次均孤桐贈夷午返衡岳

得擬坡公慰穎濱旅床對雨意堪珍夕朝不害千詞費游止聊同十日親國是
安容吾輩慮世人未若此翁真郡公晚節衷懷惡往往臨歧苦愴神

石船詩存 卷下

桂陽陳毓華仲恂

次均鏡予憶孝陵梅花

扶夢看花那得真，峽鄉仍滯苦吟身。
卅年三變人成芥，一念千秋淚洗塵。
消息綺窗逢客問，幻迷紫陌逐時新。
那堪樓上西南望，佳處江山各自春。

次均鏡予憶孝陵

風雲應護石頭鄉，明祖陵前萬栝蒼。
黃鉞白旄功莫尙，珠襦金碗事堪傷。
果憑英爽恢周宇，忍令腥羶滌舜墻。
痛哭梅村詩史在，福王畢竟是孱王。

寄懷高二適

野雲那肯伴春來，遂古狂心費一裁。
悽妙草堂人日作，苦教村曲晚憐才。

聞西安大雪寄養公

年時得句任雄誇，密坐星移促換茶。此日誰陪老裴度，長安二月雪如花。

疊均會鏡子

綺年貪住白門鄉，河榭携吟結老蒼。蓮府高閑政無事，竹林簡傲亦何傷。乞花客過春棲棟，昵曲人歸月度牆。懸味承平舊時事，浮生雅合禮空王。

懷公衡瀨上

抱海酬潮汐，天資若語工。鵝湖烽影間，魚腹醉魂通。微憾千編負，還期一盞同。乍逢儻嗟異，鬢髻兩成翁。

次均調甫躬畊

目畔不事事，躬畔此客愁。當老蜀京高，計漫從玄德說。危機彌嘅少，游情村煙暖。曖曖滋堪戀，山夜茫茫那肯明。增晒卧龍三顧誤，身殲遺憾錦官城。

喜伯鷹履川見過

花雨天影妍二妙宵化我凍烏癡欲窺晶輝珠璧瑳識邃用斯弘豪緒締婀娜
破的據勝場袖有千金笥周不史或難若此倘亦頗嗟憾生世晚不及際江左
憲憲萬古心付渠中印可出遇曹蜍輩直欲喚么麼

次均新彥晚還黃沙溪

一籃詩味雋芳草日斜時夕角催人老春颿照夢遲微哉枯菀旣遐矣古今思
誰遣觴歌寂山川損故姿

次均鏡予春雨

此中猶自著蓬篙癡戀平居百衲袍便待掉頭卧滄海忍教縮手對神皋雨酥
花藥供詩雋波劫颿樞入夢高苦似蘭成羈緒迫愚公谷裏詠褫桃

前詩尹默見以爲絕佳似后山疊貺名篇履川伯鷹亦同之因各酬一章
塞其意

我詩非后山我詩亦非我砥珠屬玉叢不攻輝瑳瑳隱侯西邸雄卓峙孕嬰娜
駛如下瀨船銛若射天筈撒珠謔神娥不謂晚亦頗少師敗彌尊鞠旅當王左
英英並世人眼中君孰可天海狎虬龍自詭忘纖麼

論詩如論書無我亦有我妙揀越女絲織錦華瑳瑳會侯琢新句蒼雅納嬛娜
射楊百中能寧假妘胡竒見許貌散原妄意君亦頗神通如帝天雄睨失龍夫建
左千金費屠龍晚知極不可天下有才人居然競微麼

潘子淫蠹簡妙聞輒澤我真見裴叔則玉山行瑳瑳舖啜飄大韻曼吟饒娟娜
慧中才副之霞風翼文筈明堂欠萬物貢諸或亦頗天不死士安待序三都左
柳色媚春旗中亭月欲可遣生無益事任渠嗤細麼

次均問樵病起

殘鶯啼徹病中春撩撥詩功走百神與子共之世嗤怪短檠燈影秀才巾

上已禊事闕然懷寄穎人舊京兼示吉符

今日之春失顏色我落岷西君薊北安所合并膠雲龍韓愈孟郊求不得蹕厲
名場及盛年園林高會飲詞客胡茲抱影危城棲仰食屋椽鬼嗤嚇埒書什九
愁不達亦虞魂夢關程隔吟尊數數偕阿兄追語舊塵髻鬚白移山倒海八表
昏吁嗟此事未忍測鯨虎磨牙曉穹間江渚況有白頭賊敢企華亭聞鶴唳只
懼池潢殞鴻翼天幸重登君子堂持有辛酸萬年說

次均鏡予春陰

聖處壺歌了不親暱看懸榻鼠行塵漪漪江色俛中夜黯黯花光勒晚春天意
詎私吾輩老詩才合遣此生貧荆楊在望帆檣斷輸與鷓鴣作幸民

次均衆非聞警相念

吟成慵付手當子見懷初艱卓交逾見騫騰才豈虛何時一揚鱗莫惱數求車

閑遣王孫老山花相友于

懷衆非

視君猶弟吾何敢眞率相期政不嫌官興偶符僧退院詩功差逮塔成尖似聞
缺舌詢家世詎許鷹崖放滯淹吟向殘宵烏鵲晒一衿月露爲誰添

疊均答問樵

誰教殊俗苦相親三見蠻花糝玉塵不逐山鸞常照影安如社燕及歸春榆錢
在地憑童掃茗銖無煙愧客貧世味齋茶晚嘗盡政宜歸作一閑民

寄孤桐衆非

章侯嘯虎橋譚子屏鷹崖有酒無相歡吟斷寸寸懷老投巴子國畚揭願恆乖
憂天苦不遑況復規米柴滋賴素心人歌哭黜之偕走詩呵百卒扶月穿千街
寧憚襜褕譏朝昔款僑齋商略百王際興極私自佳哀今誰共命野鴉爭庭槐

雨風前夜惡掀欲茅屋埋此邦胡可處逝當飄江淮短章萬緒赴譟以諗儔儕

和孤桐南泉聞歌

九死憐知淚不多春來幾度注江河喜孃玉殞梅郎老奈此鍾情子野何
絕處聞歌始自悲我還飲淚誦君詩撼樓風雨鶯啼急迸入茫茫百感時

合肥李煒秘書投詩後猥復見過追懷斐君巡按二兄賦呈二十均

君爲散翁詩往往鬪天根緻密渺遺蘊霜幹翹華騫春遲柳萸綠不謂肯枉存
所見百所聞僂爾恭以溫移坐展家世重是滇帥孫粵使其季父調斐君巡按栝柏豫

章門嗚呼賢使君於余累友恩倚霄假翅翮償酒簞耕軒雨床述家國肺腑千
萬言誰遣彌天姿奄忽歸九原碩才不竟用空餘風抱尊永惟平昔事輟斥酸
羈魂投峽遘阿咸悲喜中頻繁艱阻心易親玄味況一源紅纏酒征時憶嘗預

觴罇

令叔爲君婚於唐氏
納采日延余爲賓

抱子長舞象稚亦習踰奔居諸駛如此吾髮安不髡懸知埋

骨處煙檀修難捫鬱鬱吾欲東有懷賤帝閣公孫慎自愛世德翼乾坤

觀劉君學魯公南園書

夙傳波磔鄔公門釵股嗤非屋漏痕在壁龍蛇自揮掃隔江巒壑爲崩奔岳兄
羅弟皆凡駟蝮叟瓶翁豈異源晒似征南杜武庫卅年左史癖猶存

次均尹默紀夢

綴天風齋動丈室睇春盡楞嚴掩不看我有一百病曲肱味癡夢客呼祇漫應
塵塵若有人付以波蜜性世失摩尼珠真妄倚誰證幻處衣著花色聲萬魔勅
懸此不住心護念人天定

次均送會昭六還滇衆非同作

門世今王謝桓桓筵勝流軒翀天假翮況瘁雪添頭才老淬千灌詩妍寫百憂
似聞簡書急歌盡慰沈浮

讌集聽歌

期功不廢聞絲竹晚日東山意可悲有淚忽如江海注在天殘月獨歸時

時三弟新逝

次均衆非喜桐翁下榻山居

在日老鷹崖夢魂飛不前山賊譚公子居然致章先粼粼太古石習習萬松泉
稱心拚樂死奚遑愁軒王孟才勝郎妙意鱸吳鮮綺疏不受塵一甌紅杜鵑
想復親枰局勝負兩欣然我自慕淵明吟抱壚里煙

劉將軍書放翁乞取今年一夏涼詩見貽追均奉謝

騶騎擎來寶翰香喜聞頗牧嘯胡床筆酣待草東征策還我金焦六月涼

四月十五夜宿黃沙磯山居有懷同社諸子

拮拾餘燼棲野樓細君解爲綢繆謀何戀折腰五斗祿欲呼知我雙白鷗卅年
行腳極南北茫茫苦欠茅蓋頭衰遲託命長鏡柄差比杜公客夔州宵來買得

好風月一段明錦懸滄洲綴繡柳綠若可策影水鯨魚欲入鈎羣蛙定喜佳侶
至閣閣鼓吹吟不休捨身奚必山川窟保此尺壑聊優遊萬寂遽聞笳唱急嚴
城燈炬彈指收生憐吾黨偃火宅倒衣震恐眉睫愁汲汲顧影虞不遑安望文
歌踪曩疇天造奇艱煎刺劇寤歌涕泗誰與酬

次均石公北碚圖書館見寄

萬書香色媚江簾不恚霜髭夜夜添聖處禪機參徹詣晚來詩律造矜嚴繩床
遽縛三年夢版屋寧堪四字瞻當戶南山失葱蒨春歸獨有雨纖纖

山樓對月疊寄石公

明波微漾玉墀簾照見春衫淚暈添長夜獨憐星漢冷荒岑那怯斗刁嚴何當
帆海尋靈運便欲乘風訊子瞻四聽哈臺軒語切誰同殘月影纖纖

山居得瘖庵寄近詩

瘖庵三十雄爲詩駸越尊家節度使雅才抑塞百寮末在賢不登國之耻嚮造
奇句病僂艱新來篇章華實美吳下誰敢蔑阿蒙鼎邊不啻逢侯喜嗟貧念亂
此何世蜴霧沈沈地天死行京草木戰血羶夢回驚有棟榱圯我老寧願尙書
期草閒偷欲河清俟覓陽浹日啜雞羹雋永憐若君詩是

次均芋庵見酬

恨不吟逢吳越州峽棲怒怒祇埋頭九原不貸千金骨謂斐公一紙眞賢十部投

事亟會須終賈彥君時任蒙藏會參事詩超漸逼愈郊流白鳥啄屋朝官避勞盼傾觴洗肺

愁

次均孤桐六十書懷

並時楊孔合呼兒席有奴騷演雅思驕餌翹翹揮若浼君屢卻僞命靈脩賽賽嘔爲

詩猶親枰局雄心屬能納機鋒世法宜翰墨伏波哀亦老儻須薏苡療風痺

山谷詩翰墨場
中老伏波

徂春崖壁斫青光
耽淨滋教物務忘
柳殿風流猶可想
芋堂遭合況非常
平生
輸汝文千帙
何日能還楚兩狂
剪取淞波朝惘惘
溫柔窟裏欠身藏
君兩姬
留題

次均瘖庵喜孤桐移居南山

果棄人間採藥去
畸天那肯中時宜
徽音漫爲浮邱絕
見康樂集
清瑗終償滄海期

會有鼎來符璽降
不容參處版蒲知
埜樓悽味淵明語
塵事幢幢好語誰

次均衆非有感

駭兵那識世天非
謬認行京當帝畿
果爲郎君治廨舍
故巢宛約燕思歸
衆非新
除行政

院參事遇一老卒呼爲
少主蓋畏公舊人也

次均念庵懷楊昫谷丈

南來鼎鼎簪裾雋跂想前賢意可哀勁立詩能闢堂奧高名天獨斬樓臺淵源
喜有人豪村謂非器要誓愁終腹痛回若坐悄憐風月苦飄零貸此散樗才

次均齊陶書懷

癡長糊獮那濟貧

舊說童子師爲獮王

裹糧來買瀘溪春盟天未負响濡念溺世猶存坦蕩

身八表沈沈蠶蝕葉一樓靄靄鳳棲筠宵觴泥共黃髯醉謂新彥莫便喧呼惱比

鄰

次均問樵聞鄙人譚詩

百家閣誦憚人知此老胸中半點癡詎似傳衣競能秀差同分錦契淹遲江河
難廢當年體風力猶堪晚代師微笑晦堂無隱爾耐參禪悅木樨時

送王弟齊陶之沅陵長句二十韻

聞君祿食五溪西我亦毀車圖徑歸咄咄中軍那復語悽詠貧賤親戚離野山

連旬暑雨共手挽寫脫酬唱詩劇談飛動髯抵几屋角月落曉鶉啼悅耳繁聲
底處覓駢聽嗚咽洪落隄盤殮愧欠兼饑膳卽今人吏恆苦飢況復廊廟勤遠
略東南杼柚懸蛛絲島海諸酋鑿戰急殺機弩發無淨陞鶉首賜秦妖夢異憤
憤天意未易知庾信詞賦渾無賴傅燮生世空自唏酒悲撫事重有念日及君
家全盛時淹中門籍叢將相高文不脛四裔馳安蒲朔南渺虛歲舉時耆髦聯
軫隨斟挹百王事差了築室蓄痛德人恭考禮巍堂幾易主影書梧竹析薪吹
家園百罹竟如此掀天涕泗寧勝揮語別積夜衷抱惡歛床滋痛顰鼓悲避地
耦畊計亦得奈戀賢豆爲人羈風颺鞭絲掠嶺逝樓心跂望煙樹迷一百八盤
振衣上儻有雄句爲我題

懷伯堅西安病院

拋卻涼宵夢歛床吟念君媿譚許長史逸句鮑參軍病榻羈翥翥柔鄉負澤芬

才多償懊惱，頃偈定中聞。

次均孤桐酬二適

適乎詩句如人好，料揀恒沙見瓊寶。冷官私有通峭聲，聖處欷噓天爲惱。世有知君逾自知，囊金頻斥市鼎彝。忍截鶴脰徇時用，茫茫蒙叟嘆成虧。

次均衆非山居詠懷

邈矣雲龍失並馳，如君才慧亦駢枝。玄言雅有南朝氣，拗味初探北宋詩。卓砌孤葵師自衛，潤牀修竹暱名慈。百屯領得無能好，悔被當年好爵欺。

喜雨呈養公

聞公甫下車，詢舊首見及。亦猶鄙詩成，火迫寄裁荊。南州割陳榻，東野竄韓帙。半生知己恩，逢人持之說。況際袞衣還，國是諸龜策。當宁輟吁塵，遺穗頌霖澤。

時亢旱公來始有城糴之慶

某尤展宿私，霜夕溫降色。酬唱有馳筒，跋赴無緩轍。重虞弛慢慣，醉

嘔褻茵席賢哉大將軍安忍禮法責癡了丈夫事雪山證瓢笠元結何足云誑
我蒼梧石

疊均答行嚴

在掌隨珠不療貧倚杯癡戀太平春村翁猶識雲間士祠祿何羈物外身南渡
理譯憐樂衛西崑詩格祧商筠客來艷說崖松好矢瀉輜裝爲買鄰

六月十五夜

吹面和風曲意親石闌花側乞除春陰樓穩納山川美持傲崖西兩箇人

浹日炎威金石流西風襲勝鬱蒸收漢廷何用驃驍將淨洗胡塵席九州

謂行嚴
衆非

老兵得失亦尋常頓覺殘宵箭漏長負卻懸天詩思好屋山斜月影禪床

齊陶入
坡未返

次均二適懷寒操

負絕陶埏騷雅手樽筇間越忘年時似聞前席嗟三策不遺修門費五噫雄概

何殊王景略幽吟每憶沈佺期愛才爲誦黃州語
椽吏能詩悔不知謂二適佺傑甚何不擬之

次均二適懷纒衡

襟期朗朗百間屋有念黔州禿髻翁會侍王盟千客識政緣好事一官窮高名
氈毳都相問極域車書檄使通歸頌雄遊慳捉手轄膏寧俟旭曦東

伏暑詣纒衡所居炸燬

重巷朝來苦叩門漫天禰葉颭詩魂癡望斷楚零花末可有年時玉唾存

雨晴夕還山各一截

驛樹風催晚雨寒鶴翎縮處綈袍單廬陵米價君知否萬鏹何公一飽難
維新棖桷黍離傷愷愷何心戀夕陽滄海不情秋絮晚委教瘴嶺髻堆霜

再疊答齊陶

詞鋒如此那長貧吟動蠻溪葉葉春
嵌夢若逢常笑口酬時漫擲不背身
蔡邕

垂老傾書帙杜牧簷才負竹筠爲說偏沅魚米賤西風興起計投鄰

次均答二適

一不爲少百非多雲日閑來抵汝歌魑魅憧憧冥陔壁青燈有味奈癡何
悠悠駭骨傳研皮夸俗哀賢許汝知經怪平生章子厚階緣世法有微詞

次均答孤桐

崖月愁持短髮晞況憑江練憶元暉晚蘭何意芳新室樓柳相望弔故扉

謂君聚
興新村

舊居唾手功名時不許嘔心文字命相依蓼花楓葉秋容索君本無家底處歸

中秋家飲示擎宇甥次如任

何哉百年身三夕蠻鄉月

禮經秋暮夕
月言夕祭也

茲宵得汝曹聊憑慰寂蔑餅蔬間朔南盧糲

雋堪吻隔籬爭盞呼懸命酬節物駕秋崖壑超玉盤挂天闕欵乃時復聞雙鳧
逐興沒薄醺殆欲眠泥人絮絮說家書速我歸乞外計安必悽讓竹林游遽成

遙古別聞季叔
新逝

午夜葭露寒腸迴尙如沸

大佛崖晚眺

稼雲割盡野蔬栽閒倚澄江作酒罍分向菩提貸骸骨一秋遽費百回來

和養公清明節奉命祭橋陵一首

尼山尊所聞書斷放勳始皇皇我祖隆散見竹書紀涿鹿一戎衣攘夷正天緯
祇霧失崇岑蚩尤甘磔死論相援力牧書契肇文軌諮道崆峒鑄鼎荆山岷

太白詩黃帝鑄鼎
於荆山鍊丹砂

漢家宗緒餘邳治姬周美遐哉聖神謨稽古孰侔擬華胤命維新敢

忘功自起尊親示不祧麗天聳壇壝使君國棟才淵心玉珮委分陝人神誠將
命蠲初祀有事肅先朝釁沐及祝史嚴駕蒞郊坰雲物春甸迤對越走羣祇仙
仗儼尺咫氤氳蒸百燎馥苾飾千篋誰謂德不馨駿奔彥濟濟靈鳳侑精禮下
上振徽徵故老重嘆嗟幸覩漢官偉肸蠁帝謂通絃詩唱嘆纒祭福戰斯克孝

孫天所啓

我戰則克祭則受
福禮經孔子語

方召昔江澣頗牧今禁裏投艱腹老謀勝算決千里竚張

弧矢威式慰弓髯視

疊均懷孤桐

熱官思熟負王晞留對崦嵫劫末暉詎果真龍棲畫壁不妨凡鳥署蘅扉白公

嗔尚朝卿喚杜客憐終閣老依煮字畊經饒晚計人生何必有田歸

坡詩有田不歸如此水

重九由鄉之部招海屋偕登仙洞山

山距渝城三數里為王將軍陵墓內舍有花藥臺謝之勝財部初僑置
於此山舊無名余以毗連神仙洞遂呼為仙洞山亦西來一故實也

贅天痼疾饑邱林茲辰詎忍廢登臨山程走喚非無說愛君同據人外心挂眸

山茨歌哭處猿緣百級矜幽尋天狗昨墮樓觀赭銅柯拔上樞使燭惹夢棠花

衰秋死野槿紅白仍槎森錢

問樵

黃

新彥

羸茶呼不出吳季

鏡子

捨去雙鯉沈節物

彈指催世換子桓能不淚泔泔百艱作達聖者事孱躬善感處匪任安得漢將

陰山捷長輟魯女漆室吟日斜結菊亟歸去有江如酒愁不斟

次均問樵寒雨

禪榻鑿秋雪髻堆費渠薄釀兩三椀憑將壯鼠銜書去愁有瘡鴻飲矢回燕寢
添香須柳顧寒瞳映海似張雷宵來雨樹拋心處淚未乾時蠟已灰

衆非招游老鷹崖

崖棲聞說松風好及約借秋嘆不遲野鶴昂藏异凡產江花駘蕩比新詩不因
閱閱名方美能結耆蒼意亦奇留取閑身窮事變老夫倚看八騶時

次均續蘅九日

環樓皆山不可登梵棲趺坐肺氣騰思秋勁翮失神驚添憐講上雙玉鷹極知
景光難擲負揀高號笑遣生平

是日借海屋
登山洞山

高榭花摧百狀劣愁欲憑風吞金陵卧

龍躍馬償史實悠悠此復專廢輿鞭笞六合非乏術豢寇坐大竊冰兢果聞元

戎振神武不教黠虜猶震矜新詩在手捷書開嘆君知國如知兵

時湘桂均有捷報

次均問樵秋晴

晴灘積水不容篙賸取和風拂楫袍幾伴蟄蛩曉屋柱生憐鴻雁媚江皋麥阡
虛受三秋月松淑清涵萬里濤禪味與君參領得莫辭分啖烏銜桃

次均養公重九禊集大興善寺卽游翠公墓

西笑邁居諸倚雲嗟荷荷有念綠野翁跼危付邊鎖神州餘幾何
嗚議猶水火無人安异同滋懼殞宗社天召自誰還

時公兼黨政委員會委員長

急國寧俟駕政須麟鳳姿斂

笏樞堂坐疑當決元龜世不廢變雅睇陽煦千門大雲芘九野江左付夷吾私
憂奚爲者羣流鏡無遺微獨良厚我百篇曹劉雄嵩華失巍峩桓桓哀樂衷攀
高與陶寫將軍揮駟還奚虞跼鳶墮悲智萬劫回憑茲廓函夏

次均海屋秋郊晚眺

風搖孤嶼影中川不待登臨意已妍
謝客會須償舊想劉王底事慨長年
晚衰負卻千觴酒秋緒涼於一味禪
癡羨南鴻翎骨動橫江揜碎柳宿煙

次均孤桐見懷

逝日苦多君共我斷山癡擁絮雲衣空留粲舌春
生座猶索枯腸晝掩扉城闕不歸負歌酒風波相望戀閨闈

謝詩恩甚戀閨闈君當携姬西來

斬蛟射虎駸駸老嬾向人間問陸機

次均問樵冬日

僧顛雁背兩添霜暝共脩篁耐夕涼卓錫遽同三載謫
寒更愁爲一人長桂旗蒼望要瓊珮茗榻懸悲喚錦囊
負卻平居梁父詠區區溫飽晚難忘

疊均月夜寄懷

太清不滓月涵霜那怨層厓影踽涼雙鬢成絲才漸盡
一樓抱葉夢初長上方悔欠飯禪版前席慚經劫智囊
聞說佳人蘿補屋江湖此夜忍相忘

謝纒衡致藏香

舍衛槎初返羣真付慧才若知崖瘴苦爲致藏香來紅袖羸標韻青詞倚剪裁
遲君頻跋馬愁負菊花杯

次均問樵署中獨坐

羣兒寧念嘒嘒翁忍使麤身簿領中幽繫祇酬千世士顛歌猶作萬夫雄漫量
腰尺誰憐瘦已擲毛錐莫論功戚戚坐曹歸亦惱冰樓悽對小爐紅

寄懷香宋老人

蹕厲中原事已過待澆雄抱飲無何檢詩應歎耆英盡發篋猶存諫草多大墨
淋漓失今古獨山偃蹇費啼歌風朝待買西颿上授記祇林老達摩

古意呈養公

靄靄泰岱雲崇朝霏霖雨大澤豈我私涵膏九州黍出岫夙無心潤礎終何語

放之彌六合卷之置無所虬龍從之游鱗爪掀神宇載慰暘旱祈得偕大風舞
聖傑際非常駕天萬物覩咄彼山中人自怡慳贈與

輓汪提學九丈二十均

詩書

書尺晚愈妙自調堪願諸丈人語近諶丈人意良悲中朝好家居撞壞憑纖兒
厝火積薪上果釀燎原期丈仕海中外目擊心謂危非無活國略屏息安所施
酒隱三十載海江影鬚眉隱几窮世相揮塵狎朋卮雅不伐異同悒悒問惠夷
柔心翔羿毅逸躅踪天隨造物若可干卓者撼不移當官清勁褻孝友天所資
偶擘筠素牋爭賞瓊琚詩獨此崖柴抱終古欠人知捧杖風塵際南北彌年時
中夜村深語欹樓魍魅窺祝死疇者願況遘百罹翻綿憊禁兒禱易簣瘖無辭
朝士奄遂盡滋恫末契私精靈夢來詔風撼雲杪旂

喜立侄自酒泉來

離絕三年哀樂多詞源筆陣近如何汝能萬里歸邊徼汝伯何緣髮不皤

歸見新月

笙歌鼎沸不關情歸待江頭眉月生燭炮香銷寒強耐獨欹樓角和蛩聲

次均履川說詩

持取寥天抱排朝款子門解人今豈易無益事方尊隻字撚髭斷須彌納腹吞
誰真衣法授參罷證宗源

十載伶俜忍參軍意可哀書名掩風什茗事勝觥月且吾終負鸞龍世尙猜
滔滔追不返注記託湘纍

次均蔭亭雙江

眯眼陳編歎見欺鏤冰畫餅百乖宜誰哀衰晚楊生肘絕想風流版柱頤一勺

西江端欲乞大兒北海語寧私蓬心日繫雙流上愁爲零鴻拊瘡痍

紹勸見過客邸

兩京榮樂忽忽逝此夕逢君夢幻間霜月壓樓羈緒苦那堪頭白說樊山

次均瘖庵書懷

悍向涪坡競旂鼓詩來字字挾風霜單棲誰櫛鬢鬢髮淡酒難澆塊壘腸歲月不居徒自苦人才若此況能狂鵲啼中夜拚無寐念汝蕭寒水一方

輓胡參政九丈

元倅

筆籃手關先天下今日湖湘鬱樸材避地雪髯蘼遙瀨策時風議動留臺泰梁遽壞人安放文帙初披眼忽開

昨通君詩集

節府百朋朝獨憶懷賢嘆舊倚豪哀

君錄情教育陶

齊尚書贊助爲多

次均眞如二夢

百年殊相攝之回若有銀屏邈迤開願力況同周壁固幻魔寧敢岳軍摧押衙
倚劍含英氣摩詰虛床證槁灰不住溫柔何地住善哉居士乞評裁

題劉君畫梅

叢疊軍書許暫閑懸情疏影暗香間幾增畫苑梅花價雄翰冥追造化還

次均廉山長亭晚眺

眸邊風物幾曾離索索葦亭重有思酒侶遽同花摘盡家書愁若雁來遲
臨水回哀夕梵唄彌天人定時三載奚囊鏤刻遍行謠換得足皲胝

次均孤桐偕二適宿重慶村

打包旬月劇蕭然忽著山癯短屋邊說餅第茶誰最勝剖瓜分豆此何年
九章未信回荃宰千里愁聞累纒牽

見張茂先詩二適

書局自隨歸亦得吾衰敢望泰膺船

次均孤桐重還上清寺舊居

構刳關河宵夢微燕巢無恙柳陰稀負渠白鷺三江水暱此紅塵十丈扉奇字
客詢虛載酒舊山書至埒當歸玉皇謫吏蓬萊住莫歎聞歌與願違

用樂天句

次均問樵閒日

晚耽竹肉近天然不礙春衢著霧煙覆甕已詳他日事臨毫詎復向時妍堂堂
歲月居人後歷歷光宣在目前妄膜複重蚕白網愧君啖蜜徹中邊

次均問樵歲臘既望翫月

海角駭情月温温共一冬支離天儻貫膚郭世猶容梅入吟心瘦烏知歸興濃
玉堂商舊事遐戀飯前鐘

次均答問樵

綺疏時罨網蛛灰未浣亭亭玉骨梅詞客獨憐珠柱劍漫郎終負石窪杯乞靈
香火乘禪偈索答文書迫債臺了事癡兒何事了瓊琚那換米薪來

戲東行巖

石船今日愁難碎世有探天換月才一代雅騷受鞭策三軍旂鼓失風雷文章
末技精如此麟鳳無徵事可哀猶勝屏人書咄咄名山爭致老鄒枚

歲臘朔後三日孤桐招讌頌橘廬鐘集分均七字

章侯冠世才匠手負閑擲西來主詩盟高衿亦莫越酬歲有嘉招雋流磬折
集生活嗤冷淡梅英逗春色平生逃社人攢眉幸斂筆幾任禰正平日堪典
酒食客能說南皮伊謂湖風流事非一戟髯拂龜蒙漪瀾納茵席時有庾樓游婆
娑弄禪月人往勝因存好事鐫圖笈江滸開文苑髣髴吾尙及飄零此何時羯
塵四郊塞挾筴競自雄遑念老賓客安得兩京收文物復疇昔石頭飲公輩少

吐胸兀肆予身隱王城長年事歌律蘇門況多賢秦九與黃七

謂伯鷹諸子

次和衆非元日山齋用樂天均

辛巳

俯窗雪嶺晝斷守準擬石交堪耐久昔年分味末下鹽今日同衙邨筒酒君家
鼎鉉會還君詎許強年節衰朽白璧方酬國士知蒼松獨契天畸友軒軒才韵
揖香山侑歌祗欠樊櫻口冷淡留交了世緣謫住蓬萊可人否雄句幾增蜀牋
價發策十恆舉八九把風歡歎絕世無此生甘納袖間手

蔭亭枉過譚詩

中朝詩別差能說鄭卓

海藏

陳深

敬原

太傅高

敬庵

隆替便當關互古乘除漸欲及

吾曹二毛狀寫春添頰一葉神通海狎濤重是黃梅衣法在鏡臺拂拭莫辭勞

君爲石遺先生入室弟子

偕竹君游牛角沱花園

一丸觴詠窩晴佳時復至徂春禪病羈塞戶錄遐思細君眷景光牽率買芳騎
偃夢舊題榭沈沈索茗事緒風若相迎颺動千門幟初竹綠成番小花紅失次
水波浸天光野鷗閑欲睡玄對欣暫酬應勝溷官寺

次均答孤桐

未還詞客百煩憂作崇平生署石舟短舞誰憐挈月手細書良負暎天眸病中
司馬愴琴曲酒末淳于戀帑鞢愁是兒時讀書處千盤間越夢無由

贈許溯伊

酸楚江關乍見時況因無忌念牢之悽悽猿鶴乘生死落落龍鸞失友師西邸
賓儔遺子在南樓詞詠有人知宵樽絕倒偃玄著寧待清風每屬思

次均衆非山居春雨

負卻江湖一棹春巖棲風雨送蕭辰飛昇漫遣閒饒舌富貴應愁早致身

杜詩長
安卿相

多少年富貴
應須致身早

三世無慚天厚汝九歌能誦國無人層樓弘景知幾早不爲松風隱始

眞

叔章云湖南
閱無三世者

次均問樵釀飲市樓

一樓花近引深卮飲罷飄零獨索詩流議猶容嵇叔夜舊人終曠沈佺期更煩
五盃滌腸垢不礙千燈影髻絲劫取江光閒慰藉平淮詎奈捷書遲

酬劉君繼宣

劉君英鑑遺驪黃往往詡我能文章連城華袞寧齒數晚增名價驚欲狂乞酒
便圖驕妻孥憑軾忽若邈儕行氣類斲然捫帝謂死猶無憾豈尋常生歎不識
韓荆州小兒師事說能詳從子秉立嘗
受文學於君四海求交斬畦畛一槩著書弼光芒說土肉
甘本天性奄有衆長訟人長前身得非退之歟誇盧荐孟摧俠腸我文擗墮安
足道鷓鴣假羽愁不祥士未易知知豈易九原悲欲作張廣雅王
湘綺

次均衆非人定

霜鬚影短檠撫世百悲生翻甕鼠相齧揀枝鵲有聲賜秦誰示夢質鄭忽輸成

見公

種菜堂堂老嗤教脾肉驚

東坡詩云免使韓公悲世事
白頭常對短檠燈可念也

題何特循適園詩存

曹孟其王嘯野劉腴深李肯明

吾真友數數書中贊適園能擲一官措正骨自礪萬士

味真源兒如麟鳳世交羨詩入夔巫格更尊計日青楊候何沓同浮天末邨筒
樽

曉角

夢邊畫角遞清悽強自看春野霧迷細字家函虛念我子身仍落萬山西

伯商招游化龍橋寓園夫人製西茶相餉

春光聞在閩都外慰藉詩懷泥素交雙礪初浮嬰頸樹一亭遙睇蓋頭茅更煩

主孟煎奇茗誰遣詞流戀故巢

同游均思鄉

及約禊辰恣吟賞連山桃杏錦棚包

次均酬函負

温麗儕葭瑄吹忘雪谷寒才將三古返律豈隻詞寬天驥無凡近雲龍及控搏
慧因勤護念莫負水晶盤

爲童藻蓀題思舊館圖

明季全太常大程不仕清聖家居郵縣之靈谷村其友王評事家勳來訪不遇歸爲清兵所執不屈死太常乃作思舊作哀之館久祀廢縣人近謀置葦童君藻蓀傳余紀宋

作圖名曰思舊館圖

威弧不弦瀕陸沈秋士倚紙剗古心越山一角妍水石中儲碧血何處尋明清
遞嬗猶族類神州慘更虎狼侵憤憤江神那足恃收京夢斷寒涕泫九天招與
忠靈語被髮大荒雷雨瘖要扶紀常藥天壤豈容腥羶俚昔今祭酒一錢痛不
值梅村絕命詞一錢不值何須說卓哉玉碎重穹岑晦宵慎莫妄張視愁有西臺痛哭音

曼若枉過

老去匡頤喜說詩欲搏今古第評之近來誰似吾宗好此意寧求儉父知翹翹
黑宵狎深語枯松蒼黛揣幽姿畢生肝鬲狂傾注恰是嵐漪泛座時

熱悶喜有雷雨

二月春剛半渝州苦鬱埃飄風噫萬竅殘夜走千雷燈地花彌雋潮平樹欲回
欹樓耽獨嘯浪遣暝禽猜

題行嚴十九歲縣試卷卽送南還

平原二十傳文賦君更成童有美名不分張文遠瞿文慎著科目玉堂遺憾負平生

定霸騷林越卅年蔚宗史筆甫歌篇時移事異空惆悵歸種城西丙舍田

酬亮吉枉示近詩

颶波贏得逕還山漫較長閒復暫閒便欲從君圖一飽肥魚大截澤蔬顏
好句閨中共和之藏山松栢穩撐持颶天花雨春無賴情繫寒江訪戴時

上已奉同香宋丈禊集北碕分均又字

能致商山翁中字亶神秀雅望收東南鵝羽競來筵雨末萬境清雲嵐譎釘餌
羣花發天光顛香抱欲鯁鳴榔沿瀨嬉山黛寒裾袖片水醞於醞春風吹不皺
亶亶秉燭擾逝歡時哉嘆不又

僧椽幾

賦謝右任院長招同香宋丈暨養復孤桐諸公讌集

文章氣類穆韶瑄寰中識公何太晚瞻園翊嘆殊等倫變馳萬本皆琬琰抱刺
漫費三年藏閉門政坐一生嬾巖巖太華奕雄異西望繭足梗衷窳高花春雨
延鄒枚跋天鯨浪忽張眼戟鬚影拂古冰雪玉笋痛澆胸噫嶮豈無滂涕感山
河道資神理席圖版衛道隆儒非細事江表今日嘆微管詞伯人豪列龍虎瞰
座機槍呵使返風流併入聚星堂詰旦刊傳索餘莞

日刊大書其事

次均非器感懷

繞屋憧憧耿不眠，曲儒敢說晚憂天。
飄零終古乖中隱，睥睨群公哂獨賢。
不負清歌桓子野，尙偎殘月柳屯田。
輞饑吟想葦蘆好，樓外風花任自妍。

次均涵負借孤桐觀張女士游園驚夢劇

茲宵宮闕屬何年，對影聞聲倍惘然。
鳳屐行來羞露冷，螺鬟睡覺倚雲偏。
已嗟一念撩天譴，底事重來殉世緣。
晚日謝公哀樂苦，歌中賺得使君憐。

次均伯毅以詩迎孤桐歸湘

茂先增歎纒牽纏，安得菟裘老毗連。
並世遙酬郊島侶，中興癡待漢唐年。
刳心蠹簡張三世，酸夢龍蟠費百篇。
採蕨飲江心許久，繩床欠似芑身椽。

贈劉與爲君爲少少從子高考第一今掌曹縷衡記室

君家世父狂難及，破寺癯瓢二十年。
絕代倚天迴一笑，劉喜元戎衝雪證雙銓。

天遣筆陣掃千軍

工部贈
姪詩

能顧畸翁意不羣爲語故人今畢阮

謂續
衡

茫茫晚欲託

吾文

寄二適

人中賞高二希世心不波老筆驅今古童山買笑歌子雲嗤壯悔叔夜臯才多
俚影嵌深語崖柴奈汝何

次均酬公衡

駕海能來杜宇鄉乍看正色倍蒼蒼王郎側帽才無負杜客長鑱命可傷閱世
相嗤同傳舍媿歌忍憶傍宮墻生前邂逅銜杯好挂舌休教說百王

張將軍自忠輓詩二首

遽奪長城去天乎胡不仁岱宗生有自河洛系相仍

張巡爲河
南南陽人

苦戰狂鋒挫借仇

義問伸敦書兼折士況復美髯倫

堂堂千古事留與蓋棺知飲謗書墳篋思功淚漬碑天褒感諸將家祭命孤兒
便有神州痛懸心聽鼓鞞

次均問樵送春

流鶯吟共瘦寒時惘惘江頭撫柳枝薄釀每紅花下頰好風不綠榻邊絲愆歸
負卻春颿遠忍睡留教曉漏遲山疊軸籤新料簡晚逾愛好證君詩

題翊雲樂磧游篇兼寄亮吉

私天放與鶴雲閒孤笠雙流恣往還奚必歸鄉羨江總政宜對酒哂曹瞞功名
收手厭厭老魚鳥俚心泄泄關我亦一瓢無罣處耦畊願乞戴公山

室毀移居旅舍雨夜寄二適

扶淚收餘燼茫茫孰宅身一生幾兩屐卅載五湖人雷雨掀天立灰埃掠夢新
好詩資慰藉嘆汝撥皮眞

詣行巖不值遇之奇

浪跡南泉且北泉憑人供作十方禪酸辛日昔商歸計輸與春風又一年
養高不悔佳人寰況有清瀟雨末山辦向籃輿貸詩料老兵得失雅無關

讀湘綺樓詩集

捧杖匆匆遽白頭閒披吟卷淚瀧流軒騫無分譏恆畏師與先君書云仲郎千里駒也初生不畏虎衣法咸

存願已休稍有聲名憑獎拔終哀跌宕負藏修千年難忘山塘路忍死歸先酌
檣楸

題醇士頌酒圖

孤憤睨人世何如荷鍤埋山王非我輩康杜狄儀有真懷嬾語寧堪詰雄文偶

記借酒悲猶勸進彌嘆閉關佳

病吟

生歎蛛塵冑玉簫鬱伊遽費百千朝雅心寧礙看除日姚合詩一日看除日三年捐道心末齒初驚量瘦腰一衲携來雲水幻萬錢輸與七匙驕觸蠻何預人間事寂寂玄文託自嘲

旅舍聞歌

修夜真當喚奈何誰媮幾曲舊京歌白頭付與虞淵痛不爲傷春淚始多

次均鐵庵丈社飲

投劾歸來戀景光野殮奚似大羹嘗舊栽松栝春方勁隨分壘鹽世欲荒規國

陳詩區正變看人穫稻晒閒忙白頭手寫平原集文錄口生文遺集已載事妙格猶能範晉唐

夜宿羅家灣李宅憶履川

撼陸龍蛇殺氣屯酒邊誰復共温麈隔墻燈火憧憧見夢裏披衣幾叩門

移居何園喜伯鷹見過

誰吟地癖經過少開往初來第一流好典鸕鷀招近局詩篇取次泥君謳

端節偕莠雲廉山思年醪飲樂露春

瑣尾來渝州亦粵三重午風物嘆無殊徇俗堆角黍持心乞人安悠悠誰念汝
本自湖海士投老迫羈旅肯顧園府賢牽帥陶芳序市樓故自佳南烹雋淞滬
登來縮項鮪茄苳馨盈盞痛飲灌巨卮囊錢寧齒數由來骯髒懷微獨度與甫
癡兒意常多千歲真何所淙淙簷溜聲哧哧肆沽語摩天噫微噓鈴屨指畫肚
次均肇湘十五弟種樹成林

我衰拙生事政坐喜讀書君栽十萬樹曷嘗專城居逸少歡囊盛元亮暱扶疏

孰衡身名際

莊子名與心孰親

圭組寧關渠臣家全盛時門塞朱輪車世父守潮陽文武

燁徽譽家國遽至此誰式通德餘神臬壞七八驕莠痛莫鉏撫髻行自念豈堪
供吏胥勝處乞茅庵游止覲自如嗤似老伏波跼焉追友于松楸無恙否南首
淚傾裾

次均二適獨石橋散策

排朝歌哭淚千行瀉處黃流與略當
三歎有人非寂寞一鞭夢子正飛揚
圖歸未遂歸寧好媚學誰知學且荒
來書有詩窮之嘆奇嘯徹天潭水碧
竭來容得阮生狂

次均調甫雨夜獨臥炸後漏屋中

詩史尊猶筆削誅吞聲甫也比何如
猶矜故態拚沈飲爲近浮名悔讀書
炊米劍頭寧辦食牽船岸上沉疴居
漫嗟麟爪終淪寂雲臥寒川待一噓

雨榭灰邊俛萬流幾撩比舍善羈憂
名篇價越晁無咎卓行心知許散愁
彈指樓臺供壞滅過江人士耐拮收
記懷細故非賢達矧子隆隆詡黑頭

送非器出權蘇皖贛稅事

求宿西程共幾先果乞鄉才躋詩伯
室名震將星行畫錦江花迓宵衣驛
月涼好持廉靜意巾澤拊殘瘡

送參龍聞警臨江返實無警也

已虛懸榻歡況慙自崖返百懼心所危嗤等吳牛喘搖搖灘上舟夢夢霧中眼
尺咫笑言乖安用酬繾綣天祝微言絕嘆子去人遠孤經發膏肓千賦含組纂
昨來議算緡新法苦搜揀書生斷國是無乃失驚緩善又慎厥藏斐章俟裁翦
由乎何處我見檄倚探天雁簡

將之樂磧先寄亮吉兼別養公

結徒日狎文字飲天狗墮地紛駭走佳鄰朝忽盡室行閉戶但留塵百斗謂塵懸
命危城饑欲死鬱鬱居此更何有艤舟逝當適樂鄉東道況得羊求友桃花洞
口好題詩長壽江頭且沽酒便圖穩作蜀州農杜門學種先生柳自歌紫芝比
幸民詎望黃閣記衰醜別情猶戀午橋遊何日吟伴老裴叟

曉發

荒荒月色付誰憐已近江南白鷺天
彳亍街頭數星斗憑渠夢囈萬廬眠

舟行

浹辰果宿諾辨色溯江行殘月滅山大浮嵐撲艇輕
幾教悲世事安忍計歸程
四聽漁歌好吾衰愧汝情

亮吉辱和長句疊均奉酬

脫羈天駟無轍迹恥共凡鷲競驅走詎似坡翁怕硬差
畢生但詛筭與斗世上
美官思爛熟田林圖史君自有賭茶不羨明誠妻

夫人爲大鶴山人賢媛

報書方絕巨源友雨

雲翻覆奚忍論此口但宜長酌酒雲鵝微哂相負處
添香晚欠蠻腰柳投止相
從十日飲故人惡客交自醜歸乞細君買吳絲繡取戴公山下叟

亮吉疊均見歸適逸兼絕再疊奉酬

宣南君自爲郎久我亦卅載都堂走豆棚閑述翠微遊
遮天紅葉大如斗世變

迫人化鷓鴣題襟雋侶今那有風流誰賞微雲詞亦謂大鷓 襟襖常逢觸熱友老學
坡公屏世緣鍾憐玉色松醪酒臧山豈異雞擇栖飲江未負魚貫柳西來邸報
置莫看隱几聊窮諸相醜吟懷天末雨風知禊秋何致考城叟

次均亮吉別墅卽事

淨居朝夕埽爲我護秋光松塢風飄韻蕉窗雨遞涼門才憐玉郎男女公子皆秀慧 詩戰
引杯長爭嘆知幾早官資錄睡鄉

東陽山曉望示亮吉

山容掩映机案間凌晨曠視癡忘還曠矐杲日沐海出天風篩作穀文班野芙
倚秋睡味足初花穠澹爭殊顏失笑微之有俗韻晶簾只解覷螺髻經年棲市
厭鷓隘對此遽遺妄相刪百鳥笙竽入耳熟賞奇欲聽虎聲虬羸茶憾乏濟勝
才攝衣蘄絕誅榛菅佳士無名亦負負吟望驢侶抉天慳聞屬尊家百年物敢

乞題賚戴君山又況閩中自有管道昇何不貌寫萬幅驕人寰

鄉居傍夕必行散

粥飯閑消仗索詩愜心每屬意行時能遮日影藤花架自皺波紋柳絮池安邑
豬肝寧可累定林驢背偶相師山鄉據有桃源世頻拾松枝侑曉炊

蕉雨

床頭蕉葉綠帘橫惹雨涼宵琤有聲幽越何殊琴阮奏彌憐竹肉有凡情

立秋後夕驟雨雷風

雷風鞭殘暑山氣勃勃○凍雨大於丸珠璣走的爍梵唄聞無聞諸龍在天躍
蒼松類髯翁俛欲瞰危閣耳目此一奇未怨行衣薄昨者嚴城棲鴉域痛爭惡
今幸踪冥鴻若自蓬心索薄酒遣蕭辰儂焉俯哀樂秋聲欹枕涼打燈桐葉落
猶仗洗甲兵幅巾返衡霍

山行夕雨

欲識田家樂事多，短筇翼我度坡陀。
松杉晚雨山程迥，自倚漁磯數鴨鵝。
觀亮吉所藏故宮書畫影拓

金題玉躐落人間，誰念純皇手定刪。
騰似通天臺下過，神功造化痛難攀。
桐陰讀畫滌炎暑，影事撩心暗自悽。
曾校尚書消暑錄，百千真蹟費吟題。

樂碩江干投彈鄉人震恐相告

猶驚伯有至，入山歎不深。
鬼蜮安可測，蕩茲無住心。
重念城居人，旬暑鑿煎燻。
縮影狹隧中，喘息滋不任。
礮石毀天發，萬馬爲之瘖。
懸命須臾間，腐肉齒刀砧。
饑腸輓轡轉，孟水奚從斟。
黑夜穴風瑟，抵背代裊衾。
幸且貸一死，歸安廬宇尋。
亦旣雨潦降，瓦揭巢幕淋。
子遺斯何辜，屠毒洊凌侵。
安忍臯夷甫，天促神州沈。
繹詠無家別，慘慘古猶今。
藟狗啼善喻，萬榻飄呻吟。

山中聞杜鵑寄二適北碚

臣甫再拜意何云重是當年望帝魂傳說東川西川有憤憤蜀客裘無聞山行
乍聽哀楚奏絕殊凡響掩抑頻游侶謂亮吉道卽古杜鵑啼教羈旅摧心神捨去
觸耳聲轉急呼聞若慙沈海冤萬里孤臣驚雁過三年嫠婦痛天翻我今不樂
念家國安遑爲汝淚河奔敢擬黃州憎孟詩語愁肺腑置不論異哉高生胡嗜
此抱巖酬唱歡友昆口繪手摹工形似雨鈴霜磬悽無倫稚圭鳴蛙代鼓吹虞
翻青繩作弔賓由來畸士才抱別蓬棲奚必植蘭蓀別君忽及秋柳踈風吹崖
泉愁不溫野天躑躅懸念苦題寄草堂資告存

次均亮吉西平關曉眺

英光奕奕尙西來翅鵲風吹跌蕩開享客笙竽天韻好百年松檜有仙才

次均亮吉晚蒼溝卽景

松篁專淨地不任垢氛侵香火僧傳偈寒泉客聽琴莊生遽覺蜨陶令倦歸禽
勝日宜雙至能教畫理深

別山漫寫

空山頭白對萬語擲酸辛吟望人間世猶羈禪病人

謂問
梅

豆羹與瓜飯風味昵田家一粲詩心屬還來就桂花

與君有重
來之約

強爲十日留山靈吾不負涼雨酬歸人亦自文情厚

怒洪決山發傾耳聽千雷終古滔滔者肯憑悲智回

波鷺不宜呼顛雲時有無欠携惠崇輩寫併笠簑圖

初秋百態好況復泛江天一死吾猶欠跼鳶在目懸

舟中
聞響

開府悲身世安齊未必安無家一房客且挂趙州單

雨後過理鳴不值

潦浸流天萬瓦墜獨絃索索意難真誰教騎虎擎龍侶閒置箒郊詛病貧
雨淋蕉葉綠波皺欠共秋燈話苦辛倍憶章華臺下客無書慰訊未歸人

謂行

雨夜謁養公歸

刳地崇光倬懸公在腹詩揮教曹陸返憾不鄧白香 王湘綺知勁立顏常陴豐功
史有資醇醪思意決歸忘雨飄帷

重居羅灣喜雨簡涵負

還我千萬鄰涼澍果時至蠟屐頻經過寧憚輕薄刺窮天索真知嗟始得氣類
沈澀文府歡郁穆苔苔誼我詩細已甚鄙下札無議君於吳敬原 楚仁先邦強爲
圖位次玉貌世無人節使嫫鹽貴卅載盜虛聲貧餓晚作崇納納宙寓間我心
卽君意南史千金學屠龍欲獻亦徒費

毒熱

火宅懸餘喘愁無自拔時鬱蒸玄幃裂焦卷碧柯欹沓茗拚狂灌胡床憊屢移
前綏嗟稅甲吾亦輟吾詩

秋暑借涵負過曾弟紹杰感舊投以長句

中興伐閱首尊門一堂龍虎拏乾坤獨君重祖抱高節仍世韋布道更尊甥館
及侍翁在時悲歌燕市結公孫移舟夜半人代換百死惘惘追舊恩天陲失喜

遘之子孽襟數對燠篋敦潘揚之陸有自來況復孳乳蒂根源

余祖出於文正公之門

文史淹

正濟時用風日酣美酬玄言自提銛管逼斯邈誰耐劇句祧韓樊家山松濤著

萬愁寫入縑素腕末奔

君工鐫刊
盤續事

王謝諸郎足風氣憐渠才骨雅軒軒客來且暫

廢簿領淨洗茗椀揮秋暎有約雨宵肯過我翻江注海鑿菊樽

孤桐過飲之翌日詣之已還湘

掉首巢翁輓不能挾詩歸作打包僧松風自賞乖弘景尊茶先歸嘆季鷹三載

距蚤常共命九疑崖巘待同登
局樓黯黯留鵲語悽憶樽裾昨夜燈

謁養公不值讀其近詩

天網罩羣流堂堂復密密豈惟士武甚語詩亦無匹
鍾嶸有佳評阮謝宜入室

香宋推公
持甚至

我已弓前盡委心千舍避亘代傾吳歛唾棄建安骨安作尼丘翁風雅

稍區別據几想人豪雲崖瘁前席楚楚斷整花日闌耐吟悅

君邸舍亦
被焚毀

秋浸

秋浸韜埃鬱其如屋見天添暝蟲蚋舞重費米薪錢拮据牽蘿補趑趄納履穿
中宵看八表愁更黑雲懸

過伯鷹屋毀移居

風柳生憐漣影嵌銀鈎書格玉璫函孤襟落落宜多感元箸超超那肯凡
刼去
尙存花藥雋饑來莫爲籜簞饑能持牛鐸調鐘呂神識中朝歎阮咸

君論持近
今無兩

次均伯仁秋日懷江南

舉頭那得南都見
淪瘁霜波舊雁回
湖字莫愁坊錦繡
欠渠歌哭五年來
挈汝年時樽屐共
湖心癡對月西斜
鐫胸那忘琴絲語
除卻江南未是家
村鼓梅歌夢嚙聽
羯塵處曲房局百
年痛有朝來事粉
本江山換虜庭

秋日偕履川伯鷹過紹杰卽飲市樓

秋色罨蟪蛄瑟瑟
滋欲悲爰及二三
子聖處和天倪醞
茗不澆愁還仗酒
千卮
哲弟雅邁往市飲
不復疑屨影燈柱
間簷雨涼髻絲收
涕踪放曠嘔肝赴
襟期
樽前拚樂死天宇
今何時耿耿黃墟
要漫諗昨慕兒

次均亮吉秋霖感賦

投栖旬日飽風泉
愛子墻東好葑田
官興陶公歸獨早
文心陸客愛能捐
高花
壓榭撩宵飲好鳥
嘯山輟曉眠莫爲
愁霖捐年髻吟回
巢葛幸民天

輓張季鸞參政二首

忍令斯人死天平事可哀
驂龍羣屬望止鵬竟戕才
舉國悲著蔡中宵覆酒杯
畢生方管樂先遣肺肝灰

家世慚兄事儕流訟子賢
君山每孤憤景畧不中年
噩問邦仇快雄文戶誦懸
盡然天下痛寧暇爲私憐

應天文臺報館請賦酬美國羅斯福總統二首

造命鍾神勇當機授廟謨
軒方和氣載卓絕近今無
劍履行當及樓船不待呼
表天徽幟轟蕩蕩頌來蘇

止戈昭大武吾尙及遺文
符契邦盟鞏畦町寇德分
威稜銜日赫義問在天聞
震代葵邱會冠裳請命殷

重居大佛崖有懷海屋

避地蟻旋磨我勞詎敢憚石磴鬱透紆纒行迫日旰經年眠食處陳迹天遺案
崖佛善知識重對發幽贊風搖桑柘黃隕葉侔金彈連囿幸有秋報賽野垌衍
休戚平生人隔崖不可喚君養疾鵝公處不詳
處所咫尺未獲遇晤三年世變劇我衰君亦癯琢篇開府工

哀屬江南亂吟憶那肯眠苦月影葭幔

問樵寄新詞見懷

照夢秋光孰得多書來每念病維摩軸絃舊澆青衫淚刈度初翻白紵歌一飯
追教關性命十年已忍狎風波畸零信有天哀處付與茶煙自在過

晚眺

短髮風吹豎江灘葉葉秋碧崖天一色白鷺水中流索米僧歸急擣衣婦語淋
八荒屠斫苦何處築糟邱

次均亮吉壽女公子乾符

謝庭嬌娃意最憐，慧中秀外雲髮鬘。二十有聲翹太學，初度恰屬巧日前。阿翁重女勝重男，祈福九齡賚三焉。秋光渲染添畫理，百鳥啁啾娛玳筵。天倫樂事今稀有，湯餅未預先歸旋。織素慚自筐篋弄，底物堪壽女青蓮。瓜飯香淨猶在口，徵知主饋儀無愆。及約重登君子堂，宵飲爲致菘薤籩。女公子曾以瓜飯見餉南朝書體誇

衛鑠世上凡兒寧，值錢老蚌生珠宜。快意甞偷邀月舞，踰躅張文襄詩鑑九齡帝夢錫三焉兼用文王世子事也

次均亮吉送別

買山放子作巢由，矧有膏腴爲鶴謀。琢句常持修月斧，狎賢能致采風翰。陳人閱世埃栖草，冷雨飄天屋可舟。辦向東陽峯下隱，木奴乞爲種千頭。

偶見无量草書詩幅懷寄不必歸无量也

西來不慕峨眉好，憑人踪訊謝居士。飄撇海漚聞未歸，煮字三年厭人事。眼明忽覩顛墨書，落落小詩肝作紙。圭組難羈石徂徠，鳥花未負元漫仕。爲憐文藻

卷波瀾頓若神明還故始世中詎可無此人
談俶才兼獨行史天角應念冶城
栖短屋歌啼吾共子神州鉅變亘古無
干戈饑凍凌衰齒子影崖藏遽徂秋霜
葉打頭曠山鬼瘡鴻哀助懷舊情坳書
持與審生死

贈賀君

勝域參樽屐垂垂二十年艱貞抒雅抱
號令準前賢敏挽織洪剖深心慧猛全
禁中有人傑不遣牧頗傳

瀛海星槎遠涼州節制尊任常兼內外
學每究流源決策踪羊杜崇文致白元
岑樓邀月地問問挹衷言

次均履川秋日江樓餞燕嚴恩紋都講之緬甸

雨挾雙流滙霜含一雁飛美難愉合并
夢影倦稀微幾遣狂兼聖不應瘦勝肥
縞裾闌角立凝笑煦寒暉

雅幔絃湘瑟

湘女士

離棕泥酒杯愍從人意聖慧遺世緣灰閣體烏絲格家風絳

幔才寥天鸞嘯渺凡羽忍相猜

淨境瞻千相吟魂兀一甦竹憐佳士苦花稱小名呼栩栩憑懼遠靈鷲覩夢孤
江秋逢驛使苦訊坵書無

送賀伯亞之權遵義

酡顏鶴髻峙人中及見君家畫苑翁

謂履之丈

氣數遽催諸老盡崎嶇與子一樽同

不孤通德該玄史得乞偏州道寇戎甲秀峯頭扶月過好詩先寄錦江東

次均戴八東陽別墅門前筆柏爲迅雷所擊

狃郊偃蹇託根大睥睨凡株容自在孤標謾謾長風煙忘知塵世殺機殆芘賴
常與障歊陽鬱葱奚必植崇塊陶令得歸詩思奇倚柯寄傲邁時載屨列文房
態穎若吹向僧飯香蓓蕾雲閣隱被神龍鱗霜邊驕琬天馬設齋季女聰明

到謂乾符

傳真不仗蜀王牢吟眸重對喏如期枝西已辦千觚待子立應鍾造化

憐誤中堪罪豐隆怠銅幹中摧倚荷柱此事熟思良氣餒每讀郵章愴零落遙

愁山茨減輝采安排朝棟本無煩屏置溝斷更何悔板蕩卅年劫變多幾人能

不鴉畫改

見山谷

我是蒙莊賞散材春來剡與涉江海

三疊酬翊雲兼謝賞梅之約

天坼不使兩京守詩卷釣竿挾君走頻年鬱伊撫巴歛老賸爛腸葬三斗

見關尹子

高名臚仕等夢過嚮日朱顏那復有丈室闐然百態非苦念吾儕屬真友劉

成周

汪旭初

屏迹章侯歸誰與酬斟中聖酒疊疊賒取泰古春預期渡江頌梅柳

花時辦共醉千觴莫嗤窄褐杜陵醜終當還我江南人香雪中瘞雙叟

夜起

秋半將殘夜天睡不樂人繞腸千世事滯迹二江身戍角撩羈淚芳籬耐晚貧

欵闌渾忘曉悒悒露濡巾

次均問樵移居

身携襆被共西遷山郭隨緣受一廛藥餌天哀初病起詩騷山疊細書編秋心
幾伴連雲閣宵夢常呼下瀨船落落高襟兼慧業晚儕龍象猛無前

在目層樓等比鄰催詩猶仗短僮頻過廬騎省情常惻飲水屯田格愈新偈悟
團蒲當共證夢分餘錦詎無因維摩丈室君休懊還有繩樞甕牖人

鄉居甚狹

次均碧桐湘北大捷

撐柱東南肆塞城樽邊風鶴颺心旌巖巖廟算遙摧敵鬱鬱閭歌且洗兵淝水
諸軍宵報捷天山三箭世知名

謂薛將軍

衰年敢傲龜堂叟傳檄中原見太平

書何芸樵將軍真書四路軍烈士公園記後

將軍勅百戰好士能文章卽今白頭際猶寫烏絲行

公小楷博涉余嘗謂制墨不廢公書當以第一人及第也

曩昔元

二灾天維弛不張褚冠伍我疇被說淘披倡盡池淆大音蟻穴隳崇防其螫甚
騰賊其狠甚虎狼公時總師干鋤非幟堂堂萬號震舒壑獨力扛崩忙土敷橫
流澹日現爝火藏偉哉聖者徒法天摧墨楊策府酬蓋勤十載鎮粉鄉德心認
同異機牙柱變常士則被道藝民則熙農桑奚必赫赫功去思惇史詳內辟大
司徒軍國憑劬勩近復典撫邨弔問怒如傷倦彼袍澤傳艱阻夙共嘗存者巍
干城歿者榮國殤葺園妥英靈穹碑紀其旁鼓鞞思部曲休戚滋不忘況今郊
壘偪神宇鞠莠稂行看帥宿望秋昊摩鷹揚訐謖侔晉公偕仇定荆揚老當濡
秃管碧石春陵岡

重九養公招同秋禊分均何字

崖霜遞寒信羈雁初渡河遙楓攢丹葉密篠貞翠柯詎使陶蕭辰嘯致髦與皓
亦來表海雄讀沈主
席成章預會冠嵯峩庭列玉炬輝觴浮金叵羅文戰异軍國號令獨

細苛

反坡詩意

興極繁憂前遑問夜如何重貺雪山篇載歸邀月哦

新刊義眉游詩贈客

雅俗憑

坐鎮巖城舉壺歌猶聞關隴民謳思今伏波

曉月憶新彥

柳月朦朧瞰短窗倒衣悽聽寺鐘撞長懸吾舌烏從說賸有詩功未肯降安預
桓公家國事猶羈杜老狇資邦尊鱸嘆子真歸去獨撫秋風淚睫瀧

次均履川況松飲集

雨樓黃葉憑風打癡看樽匝角兩雄日下雲間豈凡語南船北馬偶來同九幽
肝鬲沈沈鏹百幅鸞鱗宛宛通賺取才人詩事雋靈籟聲度桂堂東

次均伯鷹壽真如

廉公晚日厭論兵醉睨神皋萬棟傾賸遣狂歌狎吾輩愁無健者與之京心超
層刦詮禪諦手創諸軍褻義聲殘句斜書餘事耳世間往往賞連城

老

鶴淚頻

彌年供

題

域中不

志業豪

髮禿盡

嘲好爲

次

曳裾猥

門蔭悽

石

納手

納手書堆意豈佳悠悠苦自索形骸
牙期會託聞絃契華煥誰教識劍埋
射利錢刀嗤鬼魅阿時符命臯優俳
麟植突兀褫心魄若此人間那可懷

和養公太平洋大戰感賦

嬴秦席六國二世祀不奉典午治蜀吳
胡虜迨遄踵彰善暴斯極監觀無遺孔
彼兇胡不悛疲民禍心聳伐虢卒誑虞
覬蜀首圖隴戈船捲海飛礮石劈山動
祆褻宵晝昏華邑夷邱壘毒若賊含沙
狡甚狐發冢射天氣孔驕詛日怨何洵
憂豈在顓臾弗戢火棖栱急功要領絕
鞅斯罪作備柔弱生之徒危言岑鼎重
次均二適見寄

日成獨癖閉門詩我尙飄零子豈宜亦任避人書咄咄不妨酬世語期期持將
暫刻追歡慨耐取他年了事癡梅柳照天江醪醖爲湔百慮復千悲

次均公衡歲晚

九衢軒蓋騰騰地獨遣公孫涕不禁
就句豈關身後事戀家猶著世間心
蘆鴻片水含春寂梅雪千欄壓夢深
西邸年時鑣席接竟來天曲伴愁斟

次均公衡聞長沙捷訊

天鉞頻殲螿手虵圖歸喜便話桑麻
魂甦萬里頭風檄春泛三年淚濺花
終望虞淵追落日儻同京邑詠餘霞
飛書枚叔今衰矣能頌中興亦謬誇

和養公追懷劉故鎮守使建藩二十均

羣雄昆季歡結君嘆稍後忠武允生知
眉宇兀嶷秀高才獵圖乘英抱籠宇宙
義幟疊追隨志業亦畧就卸甲湘城栖
春共觴歌侑中夜瀝肝曲私怪於我厚
樞府魁柄曠易帥事彌繆時以傳良
佐督湘桓桓振臂呼霆電掃氛
擊南來十萬軍驅之如遁獸席勝收
名城胸顧肅江右稍岨師無虧規復
謂可又豈圖搶攘間大星

隕晴晝先軫元未歸温嶠神詎佑短氣及騶卒號欲百身救名將斬百頭冥冥
胡可究天儻假之年燕然不足鏤平生杜陵情未獲迎歸柩華表麓峯巔俚詞
愧釘館畏公題君墓
聯華所撰漢廷失頗牧胡馬躡郊囿畢然干城思微獨涕交舊

翊雲總長招同養公行嚴纒蘅仲雲叔章履川暨余飲集丁家寨徐莊踐
看梅之約成詩三章紀其事

梅萼秀連壑未受峭寒勒抱妍深處棲天爲回春色幽人不自私揀勝速耆特
辦具中饋才香淨堆肴核舖啜嘆不凡矧夙翹翰墨逢花博醉倒齊贅計亦得

村人皆呼君
爲姑少爺觴罷信步嬉萬雅瞰奇客風吹宿醒醒歷日翠明瑟飄英欲滯人斜日

影榻策葦航儷天塹語別情惻惻

甚矣吾真衰攀磴資籃輿諸公寬禮數愁被花挪揄呵凍還温磨屏妄肅仙癯
家國畢生痛取快償須臾壯旣不如人老寧筋力須愛才折達尊懷我老尙書

止止須我友貪對鷗淑奇二水挾天寫萬柯抱霜欹鋒車絕迹馳胸息及江涓
絳裾半規日揚采磧溟池玫瑰奪神光巖電差似之履川謂似
玫瑰花憑軾睥眦甚淚睫
刮金篋晚歸索深杯根觸藐姑思寒月晃窗櫺抵余寤語時

韜園部長招飲見師峩眉游草

卅年抑塞君無憾蔗境天遣倒啖甘精饌不教凡客預名篇詎礙晚心貪鬢髯
著有峩眉雪竅府虛於鈞錡潭省識坡翁世緣淺禪中玉版耐同餐

紹杰書致石船篆刻

山人鐫贈好印章齊嶺生意匠奇偏彪古光廿年珍護忽捨去机案褫色情佞佞
內弟心鏡遇物了寒夜剗劖爲取償發騰伸紙恩意極鞭使神明回故常況復
雄琢徹脂理折股釵枝鋒中臧缶翁晚筆差及此奴視人間王戈止與唐薛石臣
家比世乏長物壞帙一籠書半床朱鈴歡爲享千金什襲那肯付諸郎好展阮

孚諡痼癖拜石米芾嗤顛狂區區竟自預人事長吟感動髻絲霜

杜詩物微意不淺感動一沉吟

次均味筍將軍詠懷

蛤蜊安得食愁向知許事雄峙樓雪寒天鴻掠獸意羯胡洊憑陵忍爲穹第計
大好錦告身酒爐貸一醉梅粧侑孤吟唾處珠璣碎頃來書力適咄咄撼楮背
騫越神駟駿寧耐世咎轡十年不論兵詩府卓安置

次均衆非立春

撒手羲陽挽不回撩春猶是舊芳菲北來雁簡音無準東去烏篷願更違短水
偃梅嵌月小平疇行策抱霜肥東坡心靳青衫脫詎果眞緣苦筍歸

次均衆非除夕

軒檻眞宜畢署蕭萬音寂處賞松寥清時鐘鼓酬何日冷雪蔬花餞此宵連璽
何如書味好長年已任酒杯饒謝墩雅預文顏集

謂長公文

還憶郎君齒最韶

次均二適歲晚

不款人間趙李扉，鈎翰吟對野山圍。
騷騷玩世終乖世，刺刺論歸詎諾歸。
五夜看天真負汝，一庵煮石若娛饑。
說廬薦孟風流在，愁奈韓公願力微。

海籌夜過

蹇產乖時抱非君，孰見存乍驚鴉揀樹不負月。
栖軒讀律區凡變，陳詩蹟委原。
悵思鍾去後，連榻午宵溫。

爲朱鐸民題詠莪堂記

樂令生憐洗馬才，勒題塞此鮮民哀。
廢詩猶抱孩心恫，誓墓誰知世味灰。
況復虎籠失揮掃，忍緣魚鳥見羈徊。
靈祇爲護松楸路，有夢年時雁蕩來。

元旦喜雪

壬午

玉娥狡作嬉巴州，乍尺雪失面三許秋。
旣蓬甦肝鬲，饒歲鄰飲還灑帷聲脆越。

迫晨倒衣看萬區皆暫澤呼觴侑勝情未負西來客愁欠梅數株橫斜影樽側
疇曩陂陀處幻爲珠貝闕柳梢綴銀絡奪我鬚髯白彌天羽檄馳圖歸歎奚得
憂國恃有年載筆記諸策

次均碧桐喜乾符自港還磧

謝庭花樹無凡植三宿浮屠意最關閉戶龍麟隨地長飽霜燕子及春還亦知

高詠憐珠掌未分圍城悴玉顏

用仲連事

好拂羯塵摩寶翰十三行裏更回環

叔乾見過

者回相見者回親投老彌憐吻沫真百里入城能濟勝一生有母足驕人開眸
寶墨飄零久掠夢神臬鋸刦新客去枕肱終嘿嘿凍雅噓語訟酸辛

次均答二適

兀兀念君忽不樂繁星終夜瞰窗時坐花難慰單栖抱阿壁常鐫苦語詩標榜

復聞永嘉未厓柴豈願尙書期上林春樹憑渠好欠爲鸞凰借一枝

春郊懷養公

不嫌排日作郊遊傷別酸衷企少酬浸水碧崖疊圖幅迎人綠柳若旌旂雁邊
芳淑春無恙牛背斜曛客欲休祇念深居賢節度撫今懷昔見文選費千愁

嘲涵負

酒末暗噫抱號天不世情寧爲庚白死那似伯鷹生終古蓬山渺千魔鑄錯成
江春一樣月慳向橋廬明

輓庚白十六均

結君不歎遲乍對互傾倒私詫邂逅初姓名卽先曉徂西歌酒密持嬾數來造
盱衡抵時艱邃蹟商文藻自喜誠大甚抗世輸心少其狂不可及奚必付深討
似聞高生語二適俚詩辱稱道殘帙索不還資作撫掌好取別乖羣衷聞變驚

但早陳尸九衢開渴葬凡草草作崇人鑑篇危言失過矯古來京郭流幾不戕
其實於君亦何憾彌天戢棺了得死所歡手勝樹百華表爲渠嫁阿鶩談諱音
猶繞已矣安忍云臨觴覆家醪

疊均酬叔乾

風俗天涯那可親駢教鹽米澆清真忍思開寶當年事已失嵇劉一輩人興極
酸吟供客哂學來短舞逐時新顧榮採蕨啼無命頭白同償萬苦辛

次均蘅纒招同香宋諸公五通橋修禊

風標絕憶舊宣旬吟寄遙波卅六麟活國名兼荒歲雪噓天胸有太平春得驕
蘇軾生還蜀豈傲楊雄晚劇秦能致羣賢觴詠雋攢頭看殺永和人

次均味筍鷹崖道中

碧霧憑看杏丹巒逐夢低僧歸雙磧北鳥語萬松西積水浮牛鼻香泥印馬蹄

寥寥人字外情極買歌嘯

次均調甫風雨夜有懷

亦任滄洲訊屢訛晚來才韻本無多黃塵四塞風飄瓦白鷺雙歸雨渡河樹已成翁誰種得花猶照眼奈癡何百端迸入中宵感惹淚剗腸那忍摩

四月初二夜

花事饒春謝羈愁伴暑蒸起居方丈室明滅午宵燈死尙王尼貸才誰任昉矜雷風天萬幻苦費倒衣仍

次均亮吉憶問樵北碕

未合仙癯溷丞掾故教巖石病宜瘥錦華幾費文通割銅狄終須子訓摩修竹

憐渠雙翠袖

謂沈景惠

斜風欠爾一青簑日長不耐懷人憾付與殘鶯極意哦

飲後喜晤劉夢庵得詳无量消息作酬味筍簡林寄華家仲陶

子規啼徹花欲盡買愁夜共市樓飲有客振奇蜀郡來瞥見倍驚眸子問爲說
謝公固無恙粥字得錢輒擲屏朔南掉臂三十年不教一事著人境詩才偶鍾
賈闋仙書格奚番僧智永愁向儒俠位置難題作高卓儻首肯卽今機槍燬殺
機犬羊洊食痛行省才媛詞侶俱零落風土磽鹵中欲瘦聞知天府米價賤燕
秋逝從味桑甚將軍觴罷想風流凭闌西笑月初靚

疊均海籌四月四夜見憶

作崇空函咄咄訛中軍晚自悔心多峯巒雨打愁排闥楊柳風飄欲渡河朝報
輒憎知許事市樓那任飲無何吾宗詩好煩相慰耐取迷人淚眼摩

再疊答海籌

風枝蟬唱苦差訛刼取胡床幻滅多便擬掉頭眞入海不嫌皺面自觀河題將
居士靈安在參罷菩提意若何漫歎詩裁倍寒瘦西來頓頓食羅摩

次均夢庵山居見懷

賓客長城比君其苗裔耶豪襟傾九牧秀句琢三巴漫遣頻中聖不嫌偶嗜痴
託舟西去好饜欲飽魚蝦

題東坡拄杖圖線女士爲夢庵寫

白盡髭髻罪斗箕茫茫持此果安之屏朝君相無英鑒輸與千年慧女知

次均君左得非器上饒書陷賊久矣

別來徵權使攬轡意方饒詩格標雙井家姬艷二喬忍論歸匪計誰遣賊彌囂
悽瑟千門雨遙憐詠轉高

次均考先見送還湘

芳杜春來誚厚顏見文選敢晞餘日養高閑當年雋侶存荒塚今代青衿念小山
劫罅風濤終自定明時文物儻能還絲綸世掌方期汝莫輒依違簿領間

養公見示擬牧乘諸篇

屹立搢頽字肫忠七發心五年無好夢三歎有遺音
雄盼傾華裔精詞冶古今
白頭茵席接詠德託瑤琴

涵負夜過同念伯鷹

畢生不預功名際黑夜狂吟影萬魔一鉢常隨憑法轉
三春自惱負花多江東
獨步吾輪汝直北愁看哭間歌倚瑟倍憐潘騎省世緣屏盡媚維摩

次均逸志題清風閣

劈峽鞭石人匪天楹桷翼翼張勝緣經畫方對宰大千金甌不缺於萬年帷幄
子房未華顛蒐繕士馬精且妍日無全牛烹小鮮百城高枕忘風鷗細之精眇
入無邊大之渟泓涵百川神宇坐待圖凌煙如山崢嶸水潺湲愁費萬石鷲燕
然祝融九疑迤毗連歌我薰風朱絲絃朝殲鉅寇夕草箋英英落落謳當筵畢

生知已蒼龍泉不識何會值一錢政資定慧諦雙詮珠鈴玉帳羅胸前胡不南
牧有人焉燭照數計策萬全唐李宋范地行仙澤膏部曲溫續綿三捷凱奏音
淵淵不煩毒手與老拳使君號令似前賢旦晚收京弛仔肩帶牛佩犢遨坤乾
幅巾嘯傲爲之先清風峽上塵吟鞭楓林松塢雄句傳我當投劾賦歸旋

雨民招登浮圖關絕頂時君主教練兵役

雄關百千過勝處乖攀臨歧馬但睨視兵衛肅森森有穆雅歌將載我披春襟
快甚懸溜決奚憚歷嶇嶇綠磴撫密篠憇石酬幽禽顛風殷天來飛去愁不任
長樓松樾峙日斜篩綠陰雙流春明波萬奏魏至音人世淨土無保此等祇林
矧君諦玄覺不俟偈安心向來夜雨寺像佛漂難尋成壞憑自然抗悲彌古今

涵負本事

深地柔心不可鈎聯梯將去著岑樓萬言歎汝真癡絕端向愁城自惹愁

小築橫紅繞綠楊衝波單舸意迷茫回看伎惱千絲縷不繫青驄繫夕陽
驀遣雙心異燠涼伯輿晚悔殉情場東風底事渾無賴吹皺春來水一塘

亘古誰教此事全

坡詞

憐才吟想步非煙青天碧海終孤汝無盡愁腸有盡年

申叔遺書殺青竟見其簡端肖像憮然成吟

頽身骨立看猶在驚呼不起淚珠漣飄天遽夢是耶非刳去忘知幾年載江府

高掌收異才驥駟入馭失驚駘

謂端忠敏

衆中爭折行秘書鄴架軸籤不煩買節樓

梧秋攤被眠覷見舐墨獨揮灑人境獻酬了不關敗楮殘唾藉閣廡懸心直到

秦漢間睥睨馬鄭標聖解慘慘贏得身後名君自畢生被書給金門重對哭西

州摻手訝已形神改遽遣崔駟委菁華空嗟劉勰震文采李祠深語矢不忘頭

顛可知吾早悔雨風冥夜撼窗櫺挾有百哀訴眞宰

上已不禊

養公不樂行公貧絕乏能修故事人辨取飄零千萬日渝州風柳盡撩春

涵負與林寄華女士唱答詩詞韻悽戾如聞哀筑傲其體和之用本均

南朝英淑果來歸不數元暉復令暉眞賞軒軒供鬼哂狹中刺刺與時違涕洟
爭向孤絃赴零落終原一念非刼入華鬘無可說敢嗤悲智亦些微

能鑿危語格彌新劉謝幽譚稍擬倫禿管矢將倚生死鞭腸詎辨等冤親撥灰
黯黯心中字倚柱茫茫世末春不爲詩工寧至此排闥懟欲詛何神

吳逸志參謀長來渝出席見示湘北大捷諸作

跂想奚如一見眞堂堂肝膽吐輪囷杜陵忠抱詩無敵淝水奇功國有人借箸
方杼前席嘆浮觴聊慰百勞身饒歌勝似頭風檄喜極危時遘鳳麟

次均公衡對月

哀樂催教髻早霜人間安忍更猖狂一生詩句負殘月初夏鶯花遺晚香未分

風流隨世盡頓驅幻翳與心忘吟懷諸葛憐君意來舉床頭薄薄觴

次均公衡閒步

峽上初眉月巖邊本色山漸嗟霧縉渺待索古歡還飄蕊欹文枕浴颺蕩珮環
拂巾孤寄在無夢籛鵝班

次均問樵和二適見念

圖南待挾釣竿走山中古人得知否槎枒肝肺乖時宜私嘆兩君於我厚東嶺
斜日西嶺雲酒熱歌呼天爲瘖一代猖狂成底用嘔心詞賦不驅貧

次均隨庵端午

八極鑿兵日三巴削迹年瘴潦羸北客節物戀南天荔子差中啖櫻桃也可憐
隨緣聊不負觴罷草新篇

次均問樵病起

未任孫公賦遂初長鏡託命意何如藥爐活計新拋卻箬笠歸情不耐書白絡
鬚髯人競看綠柯心竅晚彌虛鳳樓竚待凌雲筆莫浪禪寮暝粥魚

喜叔章病起見枉

直諒多聞誰子若晚來還乞沐薰之相從南北憐蚤駟不礙浮沈決筴龜招隱
書來吾欲往伐交計失國堪知枝官安預人間事耐取松風示疾時

次均公衡蘆溝

不教淮海作鴻溝隩域神皋一霎休漫指梅花訊孤嶺眞哀杜若就汀洲寰中
方煽燎天燄峽裏常橫下瀨舟殷鑒鉞心安與說獨携殘月嘯山樓

毒熱

兼旬合目橐駝坐草草家書等告存薄雨那容甦喘喝驕陽猶自戀暝昏羲軒
已負當窗榻襪穢常敲近市門仕隱皆非供世笑悔不早計臥江村

次均二適北碚公園獨游

瘦樹野山煩料理此間不樂奈無家
詩功駿駟憑陂騁書格驚鴻帶水斜
懟世沉飭下客食逃虛徒慕故侯瓜
清江隔手悽吟絕幾抱繩床聽曉笳

強病過涵負飲喜晤尹默匪石大壯伯鷹芋庵

每食不飽九旬日宵來何幸飫郇香
身經兩世飄零厄病看諸君嘯咏狂
燈火初融圖偃臥詩篇暫讀付渾忘
餘生收拾須歌酒還約束籬醉一觴

病中秋雨

菩提坊裏雨簾纖敗葉狂花黯自拈
間處秋光消受得帶圍寬盡髻絲添

賈韜園部長九日宴集歌樂山余以病未預分均繁字

閑居愛重九負渠亦頻繁矧今滋兀
飢風痺幽甕軒賈侯修故事高譙陳
垌原豈侈游觀娛將示氣類敦嘆想
結吟時耆彥皆白元命翰百靈馳掉
舌九河翻

境心冥會處礪壑忘厖喧抱霜菊初綻受風柳未髡古苔藉屐齒狂石驕墨痕
泥飲互賓主遑恤日旣昏茲樂良云幸新亭羞與論鍛翻戢笈檻遐矣咏鸞鶴
咄咄天所慳卽此孤願言明秋插茱萸復我烝與沅

次均酬伯鷹見贈

玉音肯使幽谷妍送喜燈萼爲之先風標才蘊有如此芥拾青紫君不難持心
遙望西極山千年氷雪詎知寒高軒數枉非無說刼罅駒光學養閑

綿仲斥南泉宅卜築羅灣索句

故人新葺城隈屋孤負南泉好景光棲共一巖携嬾過壁愁四立待詩昌江湖
廉政猶交詡筆舌雄才況莫當樞府舊寮君獨健忍論樽末亦滄桑

次均答纒衡

欹床畫肚那能奇霜末寒蟄嘆等夷稍怪彌天蘇學士閑來亦擬孟郊詩

千年詩髓挾同光陳鄭樊梁晚擅場誰遣風雲等閒了白頭語舊痛難忘

次均廉山贈別

五年巴峽歡昆季惱汝鄉思客裏筵病末攝生資北杞夢邊作嚙喚南船顧榮
忍負蓴羹啜畢卓方從酒甕眠安得兩京傳檄定青春攜手穩言旋

次均伯堅間道還長沙坵寄近文

瘡疥關山晚紀行癡魂重罽馬王城芳蕙難弭王孫感圯榭微嗤豎子名媚古
縹緲何處覓撩人歌酒若爲情綺文好句雙來貺九死靈均詠日成

乘飛機返湘

能賦相如假羽翰了無行地嘆非難孱軀欲飫天風善儘耐瓊樓玉宇寒

桂林宿楊君實弟家

昏雨偃偃止桂林密姻邂逅一開襟茶香衾暖傾家有此意憐同弟妹深

夫人爲
王梅子

女丈之

衡陽微雨由太子碼頭渡江

喚渡當年日日過塵眸還夢舊煙波芳汀梅柳春無恙祇欠紅樓隔雨歌

抵耒陽薛長官館之別墅

疊疊爭傳吐握風伐巖搜穴各來同杜陵晚日真怵慄生理端憑僕射公

歲寒旅次

山縣瀟灑霧時資楫楸温先邱廿年別同學幾人存衰疾遽如此辛酸誰與論
去留乘寸臆愁似失枝猿

涵負書來以小詩答其意

癸未

癡無蠻素韻添香幽獨傷神鬢影霜且晚爲君乞如願嬰寧室裏駐春光

次均公衡歲晚

河洛辭親費笑啼，淒涼短景野雲低。應懷天末詩，推李亦夢湖邊人。姓西畫曙，忽忽聽粥鼓，索吟惘惘向梅蹊。蠻城酬子無佳語，況際觚稜萬態迷。

夢從養公論詩，因呈短什。公以爲工，覺後祇憶拾均一聯，逾日足成之。

泰華峙天表，諸峯尙僂立。琥珀委海陬，泗兒不敢拾癡夢。抱雄篇，忘知落蠻邑。曹陸乖並世，勝處容追及。取譬華鬢相，莊妙萬儀集。亦若細柳營，森嚴那可襲。希有費思議，藏室鑄寶笈。何必髀肉嗟，掀天共叢筮。

上元夜

江縣遨春，放意嬉魚龍。幻作眼中奇，幾教影事宣。南憶千炬樓臺萬錦帷。

次均廉山春日見寄

朝揀寒葩節瓦瓶，那堪吟寄舊棲城。鮭蔬稍喜饒鄉味，鶴唳憐渠不世情。天末觴歌隨歲儉，水邊萍絮受風并。愛閒多病吾將老，敢哂羣兒自寵榮。

養疴江干新彥見過

造物乘除誰料得與君削迹萬山南
直心寧伎極鉤曲苦語差同諫果甘
松老歲寒交愈固水清石見秘相參
勞勞終負駢棲願白首扁舟太不堪

疊均寄新彥

締交卅載均休戚接席聯鑣北復南
糶藁中之情最聖菜根齧得晚彌甘
雄文曾自驕流輩漫仕聊欣廢謁參
三架橋頭翹望及故應叔夜懶難堪

軼民招飲

投老詩才勁長齋禪悅深
官如蕭寺冷德比素琴
愔百感人間世孤棲物外心
梅宵何遜喜清讌合朋簪

疊均柬軼民

稍恨推襟晚懸知託分深
說詩花雨喜讚佛覓泉愔
文史憑遮眼官資豈碍心

野梅斜更好勝日待同簪

次均酬旭初去秋候病長句

百戰病魔賈餘勇小書劇句看尙能伸紙彌增氣類感況乃文誼參上乘積月
風眩喜若失吳客良勝三折肱深藏懷抱和不得雪山愁與較峻嶒絮語苦教
止詠事癡兒吹蠶作羹懲歸臥蠻江朔物改淚昨遽覩柳蟲翳夢想羅灣有嘉
集欲訊瞿曇強起曾君儻酒後老畫師我亦長鑱駭杜陵茫茫底處置兩翁寒
暖啼斷蒼崖藤

次均酬尹默大壯履川伯鷹菊枕齋聯句

叢憂作計刪博取一春閒逝日心終惜遙天手欲攀諸公馳宿願前哲鬱奇艱
驛使梅花末簪朋菊枕間決眸閃瓊屑稱意珥珠珊能事三長擅精思百代還
銀臺霜作簡沈藩官
監察院泉府玉爲顏曾藩官中
央銀行澹澹惟聽水茫茫詎買山賃廡傳五噫

侍研失雙鬢時中臣彌聖無眠客類鰥柳蒲哀早頓魅鰐迫爭頑不分趨三府
差同竄百蠻踰淮淪枳實題柱奪苔斑有願踪韓孟相輕哂傅班會當躡風馭
誰與伐天慳乍見當投轄更生若賜環禪床恣西笑吟對野花殷

次均曉峯以明信片錄長句見懷

短札題詩不著封中儲古淚膜重重人間枳棘非棲鳳庭際杉松儻化龍一別
此生乖合并百罹吾輩耐狂慵倒瀾將及呻吟榻難語巖居邴曼容

薛兼長官飲集二首

元功涵整暇佳日速賓僚盤錯忠彌著壺歌意自超萬流宗水鏡一柱翼雯霄
勝算棋邊決胡兒那敢驕
武烈賅文德人和倚政通錦衣三箭績木屑八州功疲瘵躋仁域衿髦澤士風
吾儕恣觴詠微管在江東

次均答問樵二首

頭童尙漂泊愁視古猶今
薪米懸心大巾裾受垢深
北泉燦狂墨西嶺望幽尋
誰喻無絃韻淵淵非世琴

眼底飄縷絨彌憐我輩人
傾襟甘說土震俗託搜神
藥石研金匱旗槍試玉塵
離羣促衰疾償憾錦江鱗

衡陽宿留餘堂有懷叔玫丈

佳人渺矣絕朱絃無復籬花照目妍
宵雨高堂角觴詠此情記屬卅年前

題曙邨歡濤閣

絃柱嘈嘈不入耳奚若一枕玉淙聲
晚春花藥回殊艷小邑谿巒遠情萬劫
得歸身欲隱九原可作淚常傾讀長公文
預人家國吾知悔願假餘年賦耦耕

山雨

山雨捫天魚雁盡饒渠旬日獨欹時爐香黯黯殘經掩合目賺教黠鼠窺

尹默去冬兩用閑韻見貽勁采玄思令老夫不能已已

開帙頓教駮骨妍定知抽思在梅先雪窗細了詩家律千幅爭如隻字難胸邊

況有具區山霜簡森森六月寒米蔡蘇黃要安置誰同世上誚忙閑

見宋神

醉容玉唾無凡妍攀弟敢躡梅兄先負嶠幾欲降幡豎老矣彌嘆此事難皮相
紛紛飯顆山夏蟲惡與語冰寒使君願力擾龍象探得天心晒等閑

飲歸對新月

山月四窗圍輕車飲罷歸水光中夜灑風信半帆微漸暝長髯塵還存壞色衣
此身何處著甘被老饕譏

去冬承匪石手寫華嚴寺雙桂爲大蟻所蝨長歌見跡稔余舊游也感其
意追酬之

吾宗奄有家國感詩弔雙桂抒百潛浮屠三宿佛鍾情況復霜秋歷把擊此樹
聞越數百載先朝興廢日親瞰小山隱逸輒情招晦堂禪機嘗默頌斧斤肯貸
天刑之傷哉才士暮軻笥居傍蟾蜍果不祥罪及蚍蜉詎能撼疇曩僧寮虛訪
君藉花孤詠香味醺漫擬殘柯機若見自矜珠履語良儆病枕忽吟蜀州篇懷
往中宵鬢絲髮老矣慎勿尋舊棲愁類澤陂傷菡萏

次均伯堅斥產營書復得萬卷且喜其見過二首

際天玉府不容居謬向胡僧訊劫餘跼蹐盡人題賣宅啼歌恣汝晚求書能漸
鄙嗜生原異自述家風嘆不如三載別來憐更進吟思耐得月樞虛
渺然此世想羊求忽有英光入座收猶爲三餘情蹙蹙不教五厄運悠悠誦經
嬰武癡難聖鑽紙蟬魚狡且侯石火光中參悟否絕無尤物爲君留

曾弟昭樺柳州書至云仍將之渝兼申秋後游柳之約

詩是君家事才應今代難彌天無煥席簾肆晒枝官青簡行當與朱絃莫輒彈
柳溪醉魂處癡欲乞魚竿

資江養疴二十首

壬午冬十一月余應薛兼長官電來未參加湘省行政擴大會議因疾淹
留今春正月賃居南門浮橋旁遙岑綠波清暎枕席風晨花夕惘惘成詠
計得詩二十首諗知我者聊代告存

綿屨寒江雨長虹在目懸四山豐若骨百槳駛於弦積水無鷗鷺新溪足鮪鱸
老夫病初起貪擁絮衾眠

舊侶失黃伍新交締史

次耘

巴

壺天

肺肝時欲揭風氣漫相誇微懟官書冗頻唏

酒債加豈圖巒瘴域觸目見瓊珈

病緒閒時領羈愁夢裏經露黏花暈碧風剪柳眉青驛徑紆於蜴漁燈碎似螢

噉鴻風淑緊藜榻委心聽

萬鱗及時躍昨夜始聞雷春氣扶相覺天心禱倘回世誰尊駿骨晚欲控龍媒
蠹簡狂塗抹餘生幾費才

雲水晴逾靄能漪丈室輝乞花蜂導引撫樹燕來歸幽事鐫詩帙芳愁損帶圍
一邱吾亦可世網與心違

陰晴渾不準旣雨倏驕陽唱遞憑禽語節宣受菜香欹橋鯊蜺見影水髣衣涼
靜日無人事聊資藥裹忙

間日朔南風涼熇迥不同客歸雁程後春在虎聲中衣著乘時易帆檣抵暮空
雨雲翻覆幻老手屬天公

朋簪猥見枉久矣廢迎將衛足師葵葉觀心證藥王噉名徒自謂作樂竟誰妨
終古橫流慟催教髣早霜

百憂投料理物態情相關三五當頭月千重本色山餘光猶把玩逝隙那追還
抗古標微尙風波世外閒

叢疊峯千百槎枒樹兩三風邊漁火沒雲表曙星含雁掠青莎徑螢窺碧荇潭
殘宵那能寐頭白念江南

從子頻書告交親跂返渝嬌娃衝雨至迓我營故廡瓶鉢隨緣好鴉鷺印夢孤
支離庾開府厲衛果奚圖

江宇撩多景拚教滯一春天留雲作髻風逐水成鱗淑氣翔妍暖煩疴謝苦辛
石磯晚吟眺遲我賞心人

旦晚唱橋開千舸魚貫來錐刀糜血汗煤菜化瓊瑰誰進均輸議猶尊末富才
貧將營什一愁被鬼嗤哈

初日甯桃花明粧倚水涯漁樵看若堵蜂蝶闌成衙詩寄玄都觀春藏處士家

堂堂元亮記魏晉那關他

寒飈催雨急作崇禊春辰東倒西歪屋南轅北轍人龍鍾誰見念騶卒
悽憶江亭集羣公骨已陳

僑寓寧長算從巫卜去留月痕偃曲榭山色浸中流桃柳春無那桑榆
儘教長寂寂寸抱萬年酬

氛霧連城晦身疑滯蜀江五年世變大一病壯心降短舞滋堪哂危榭
深心師少伯愁欠五湖艘

小杏紅初隕芳茵綠尚萋魚嬉春水暖蝶悵晚花迷偶對玄譚客常隨
杜門持半偈不礙鷓鴣啼

徇世心多忤還耕計豈佳情猶三宿戀願已一生乖甫感長鑱託伶甘
悠悠青史事攢念故安排

迎風攏麥黃江滸日舒長鼠跡嵌孤榻蛙聲聒隔廊殘春空咒筍薄海待栽桑
負卻門前水無資葺草堂

上巳韜園禊集履川代拈海字見寄

賈侯今韓歐禊事盛賓采遐哉驪雅心寧惱被春給有來曲水賢秀翮捎荃幸
罷觴騁妍詞元箸超復在平生老節度倚天唾珠琲貽代護蘇儲度以起痺痿
奕奕高交儔緒餘卓千載幸及驟斬之飄髯氣不餒經月滯蠻江呻榻酬欸乃
重負城北招幾萌周南海合并會有時慎各護芳采借問一葉舟何如萬人海

次均齊陶暑雨見存

故人慕共祥霖至頓覺江花異色香乍見爭憐漸羸瘦微嗤不減昔癡狂飄天
詩卷行當託唾地芩芪病欲忘俗物紛紛徒敗意政宜挾子一傾觴

疊均贈齊陶四弟離緒在詩外也

王孫雅言摩禪地薰激人天知見香塵海一生憐弱弟君家三世著真狂比踪
參彼驚何敢結隱匡廬願莫忘雨脚早眠愁說別悔不醉死百疊觴

喜頌護夕雨見過代竹君

江濤日夜雨絲絲賸有遙天雁語悲密意不教風雨隔絳裾綠髻晚來時

次均帷誠初度感懷

昕宵癡盼中興年觸緒涸碑淚泫然雙劍未酬知我願百行不獨俠民傳風聲
鶴唳人爭館火色鳶肩命負天聞說蒼梧巖壑美及秋來證木樨禪

疊前均答海屋

淨土夢求禹州外王尼熟料有今時欲持繩榻衝波去深怪憧憧聖得窺

宿忠愛社雨夜偕夷午議長飲

極天稽巨浸促共行館燈命觴難強歡墨雨懸萬繩睽闕亦既久刳滅況洊乘

負此屠龍手十紀投滄溟
阨危起宿望鄉議屬平亭
老謀一不試種橘家山賸
天殆晚用之孱國鬱楨型
誰謂非鬻鑠驚甚霜崖鷹
伏枕戀明德痺痼朝欲興
待我子厚歸聯襪闔玄扃

五疊答海屋

秋到雁邊憶我否北山
以北南山南讀書靈運耽
雙寂藝橘義之悅一甘詩思
珠盤憐獨雋禪機玉版失
同參令威化鶴尋常事祇
恐重來世不堪

寄味辛廳長有懷疇昔護念之情

藥水稱量事嘉風及史編
書會黃石授詩紹武功
姚傳通介因時制浮沉得靜
便真人昌漢業可任子陵賢

始還桂陽伯仁置酒勞我

經畫九州無著處縮影短樓
暝虺霧白頭誤讀湘綺書
饒渠沈成章楊揆先鞭

去平生東西南北人
衰謝干戈迫歸垆
重有高衿念渴羌
主孟椎髻修治具
江波鼓角別茗茗
五載酸腸償一吐
我已瀕死飽世變
君早厭事非無故
涼飈撼碎殘蟬啼
敗葉紛披不帶樹
還鄉等是打包僧
彌天哀樂何忽遽
王孫垂老陷賊藪
梅郎新曲誤誰顧
抽絃輟軫銜古愁
舉頭那見白門路

竹君偶語孤桐生有俠德歎爲知言因寄小詩奉懷

譚謔攀天斷精禪
鑄夢通綠衣公論
在玄髻俠心同能賦
原餘事不觚鬱至忠
宣城望京邑祇憶瘦腰翁

次均酬莢青三兄見贈

養高世緣淺聊署嘒
嚙翁觀稼秋彌豫
裁牋晚自雄勝情酬謝客
餘策發陶公願乞延齡訣
扶看日再中

中秋夜飲

逋客乍歸非土著先人敝宇在城坳難迴玉兔中天駛相伴鐘魚徹夜敲生理
聊憑諸弟妹夢痕猶塑舊朋交傷時識事成何濟拚借屠蘇一解嘲

一齒落復生戲占

紛紛看核恣雄嚼鯢齒新來合策勳天誘豎儒饕餮願鵝生四足鼈重裙

寄棗頌護代竹君

鄭重投君屬赤心秋塵莫浣酒邊襟據床看月渾如昨祇欠珠喉百轉音

七疊酬問樵

君儻臨川老狐魅百陂煙水憶江南旅餐莫致金齏美交契寧妨玉醴甘時復
坐曹朱墨間晚詳詩律切繁參禪棲縛得秋光住休倚隄楊歎不堪

中秋末由邑城還泗洲砦瑛兒爲設榻蕉雲書舍憶乙未歲先子課禮經
於此塾師以一年容易又秋風命題越丙申隨宦出五十年乃歸適屆秋

序百緒酸心係以短詠

仕宦鮎上竿旅程蟻旋磨得歸良可憐才慧隱雙挫
建求鼓亡子誰哀嘗百艱神臯氛霧塞收淚對家山
綠地蕉無恙霜花仍襯籬阿翁授經處時見稚孫嬉
五十年來事秋霜撼髻邊客兒負心久垂暮詠歸遄
坊巷朝來過兒嬉迹已陳時從鄰嫗語遠事太夫人

次均松陰雨夜聞鶉

念子晚淒清歸思劇顧榮迹心雙寂寂鈴雨一聲聲世味懸操捨詩功擲晦明
五年夔萬客此物最鍾情

重陽展祀皇妣冥誕感述

羿穀吾能還卻顧心魂悸臍蠻儻見哀勞以晚花桂生及家全盛重闈奉壽觴

潭潭畫錦堂趨踰百昆季博簾寬朴責稍令習文字皇考詡鳳毛膝前頒果餌
至哉天倫樂難得何易逝江海飽風濤常夢兒時事脫歸亦奚爲閩人慟成世
明達隨運盡數典孰諳記榮戟委荒苔香案蛛網贅翼門好楊柳被戕作薪爨
成壤理固常三葉愴未逮幕天邵伯棠邦猶歌菱蕙誰歟振衰緒懸息朝夕俟
門戶付織兒家國等悽唱

晚眺三拱橋

蕎麥舖花柳綰縈晚秋風物不會饒止情藥餌衰因在卻要人扶過石橋

畚江嶺宿外家

叩角頻經地重來遽髦年陌頭秋迨鴛木末鳥初懸夙惘春暉報終辜宅相賢
涪翁懷外氏悽詠肺肝鏘

三教庵喜遇益心丈乞題所臨金石文

藜筇隨喜到祇林雙磻橋頭翠篠陰
滄茗忽逢老居士揀花同禮古觀音
會圖滇蜀諸邊勝不負王樊末契心
膾有雄毫掩皇象寫經福德晚來深

挽王調甫參事廿四均

造物鍾才難奪之亦良酷瀕老淚河枯
乃爲斯人哭識君過江後行卷舊吟熟
神慧驚寶誌淹思躡玉局危論太學傳
豪游長風屬里望舉議郎國選翊樞軸
挾此天驕姿羽儀振鴻陸晚猶奉朝請
頭顱嗟可卜憤乞近鄉關中道覆華轂
轟轟盛名人奄忽鐫鬼籙憶昔連棟棲
淵心置我腹鳳掖席頻接馬廐經共讀
得酒斟酌之劇譚夜更僕會侯主壇坫
佳日輒見速漂搖等不幸天狗赭僑屋
君懷若深恫幽懣詩百幅銜醪強作達
婦言賀省錄剛腸鍛嵇鸞殉名天賈鵬
我歸疊訊君君歸竟不復雋才寧復有
靈藻忽決日凡駟九衢駕怒自圖驥驟
卓越平生事徒博誅册牘莊生慨金躡
楚老唏蘭馥茫茫未可期安知死非福

秋燠追酬樊山池上同玩月

偶檢故紙堆中見樊山師續栞詩集首章卽爲同余池上玩月之作憶是
篇成於江寧藩署其夜二人譚至鷄鳴語皆有爲若符今日之事思之懽
然

詩入白門格倍好置身海岱晒行潦收拾聲名五十年氈毳不脛走瓊寶時因
白戰示神通梵筴圖經鏡心了高才失入山公啓世論漫方隨園老酒邊記荷
小友呼幾向蘇門擁篲掃落落麟鳳歸天上翰林誰挽橫流倒癡夢頻坐瞻圓
月感事酸淒刻甲爪神理詎隨世運盡霜鐘猶欲袖椎考斷鴻迸作一秋啼劫
罅林壑騷魂繞吾棊淚浸那忍彈書付薇垣舊人曉

叢山過李總兵仁黨故居

松篁拂到綠天雲甲仗森森隱一村山海關前鏖戰死卽今誰弔故將軍

海屋復疊南堪韻二首依天奉酬

易世猶慳仙籍分
茫茫雞犬負淮南
白鷗沒水飄飄慣
黃菊鑿霜寂寞甘
奇寶
早宜從市賈
頽容應不稱
廷參長愁養病干
戈際
亭伯年來意詎堪
苦憶涪翁奇句在
天生鼻孔屬司南
髭鬚子野當歌捥
心折平原拊掌甘
孤抱
猶頻念迂叟
浮榮那肯羨
新參雨淋楓葉蠻
江上累汝歌啼委
不堪

山程

葱蒨谿巒失舊容
秋光吟送馬蹄中
驛亭倚立無情思
癡看餘霞浸水紅
過柳州奉寄養公二十載前公會駐節於此

設險居然號上游
壺歌當日幾淹留
侔天玉雪官梅閣
肯爲詩來悵舊遊

耒陽旅夜

霜捫雅背夜江寒
索索煙花迫歲闌
簾幙常垂深自護
笙歌乍聽強爲歡
乞羶

文史心終悔圖效畊桑力已殫此淚若教澆后土百年風日暝難乾

次均酬齊陶四弟篆寫贈詩

嘉子銀鈎字礪碑洗綠苔千山艱夢到三古仗追回便腹村童哂奇詩礪雨催
梅宵誰共話兀兀撥餘灰

題李紫屏近詩

百詩卓卓騫神骨此士堪昌粵正堂西邸雋游毫獨健南州耆學病相望人間
空抱三年刺夢裏常呼萬里航得見秘書失心疾杜陵寧惜倒衣裳

次均酬行嚴見懷

忽忽涼風末禪窩幾夢君呵天遺苦語載世震高文百拙機心杜雙修瑞應紛
庭柯隨勢異不樂復何云

偶遇壺天

五春卜宅資江孺嘆子襟期似水清
午夜枕書斥塵務丁年趨府襟才聲
臯言杜牧天應悔詞客秦觀酒不情
強爲南來蕭瑟意驛梅折贈呢寒檠

三架橋視新彥病歸慰以詩兼懷叔章倜君渝中

離腸千萬言旣面果何有奚若未面時
絨劄古心紐溟海翻鉅波幾先君縮手
我亦脫身歸跼天肘生柳過從雨風斷
結鄰乏塵受凄溯經年事敗意饒八九
矧念方李儔徇祿岷沱右浮潛雖異趣
懸知漸衰醜投老仗友朋忍料終負負
近者困羸疾遠者繫官守安得宙寓壹
賭醉板橋酒來往成四叟真率圖不朽

歛硯贈光海

君家筆法掩顏柳裏研貽之締石交
殲蔡更煩草露布雪天爆竹當鉦饒

冬日謁杜工部墓作

資江歲晚天靳雪寒汀鷗鳥獵春色
蹇步幽尋杜公塋穹碑聳厲行署北
平生

半世讀詩卷潢潦冥贊頭已白痴兒聚訟埋玉地張目儅州計亦得嗚呼才士
例無命屈平賈誼槁湘澤況公生世等龍門明光獻賦聲萃勃孤忠不營走蜀
州茅茨苦歷雨風刼瑤西葺堂晚有名羣會相斫幾不測卷書失作洛陽歸買
舟忽溯洞庭發白酒牛心竟爲崇百代精英投鬼窟堂堂許身禊契處蓋棺事
了付誰說長存雄句表江山祇供酸儒拜圓碣經籍天湮董相陵兵燹風飄王
粲宅遙岑猿鳥倚夕哀儻爲排闥臯淪塞

十一疊答海屋

觚棱石室閒孤負誰念斯翁北斗南儘任鶯花憑世幻卻饒筍蕨泥人甘涪坡
詩事當遙付能秀禪機莫浪參爲訊同曹老居士春衣典盡凍何堪

次均海屋曉起

霜髭吟斷曙雞餘耐得寒廳著燕居趣捨萬殊徒自調粵歌一夢詎宜書沈沈

梵唱遙峯磬闕闕街聲狹巷車文劄等身慵料理憐看凍鵲止庭除

齊陶四弟見和旅夜詩仍荷篆寫疊均奉酬

蒼梧秀黛披函見倚病中宵嘗未闌倬彼子方昌絕廢超然我亦晒榮權增憐
一鶚鋒棱異待致雙鳧願力殫餘潘矢從河伯句羞教聖手筆常乾

次均新彥携詩見枉

天教抗古題中隱蛩距相忘寂漠濱不任緇塵澆琮璫曾從碧落摘星辰千詩
自瘞寧酬世萬妄能窮且買春玉鍊橋邊雋梅雪餘生幸作舊京民

壺天介葉天一以詩來贄爲題長句

嶺謚香花千寶窟官除筦榷一詩人名篇乍歎波瀾異勝日能來氣彙眞雅雅
夙嶠上乘乳匆匆莫負苦吟身杜陵游後風流寂失喜儉荒筵鳳麟

蜡日不設粥

糜炊玉粒糝珍果香淨聞資佛供餘百釜咄嗟千騎饋雄衿猶憶老尙書

歲暮奉懷太谷院長寄呈二十均

相公天生德愛才躋司馬八紘掩垓埏珠玉走堂下賤子夙多幸暑寒庇穹厦
密坐榮暎殊稠會恩波瀉寵歸汙文茵餘瀝傾玉笋美譚羣嘆羨稽史實才寡
近媿常服陳遠踪前席賈聖哲用心處畢然範朝野養疴滯資江宿顧苦搨搨
江淹別龍門望雲滋難捨邦君愛屋烏官私優供假回春大鈞手品彙失跛啞
况公謨烈偉憲天謝來者華裔候起居今古在陶冶葛亮遜周才富弼輸大雅
堂堂名相傳餘年萬本寫葭灰歲瑄新陽澤昭鱗瓦鶴班翥元會氤氳遙欲把
曷用酬明德春卮介純嘏曷用揚仁風頌聲肆時夏

寄公衡解嘲

忤世偃偃吾共汝美官今日媿胡羅餘嗤枯菀有前定爲較閑忙孰得多貫酒

偶謀仙眷屬乞花聊供病維摩金剛坡下明窗屋羸濤取風自在歌

同日得會八柳州雷四衡陽書感喜有寄

并敘

曩者湘鄉會偈庵嘉禾雷艾室兩丈鉅學崇文棟礎詞苑頻託末契幸獲
高交投分綦深契濶匪間令嗣君主璋特達海甸標譽疲於津梁寓隱簾
肆國琛家珍作達豈宜振翼濯鱗期昌通德云爾

啓我高文者非今二子歟損牋字字好歡勝拾瑤琚會識嵇中散難酬沈尙書
懷賢羨麟角莫使老塵闕

新彥以自述二十詩見示題後

萬劫繩床處處家梁園枚馬忍猶誇止觴應憶年時事夕雨明陵看杏花
淒涼弘景撫頭顱晚賴松風韻道書謙謹圓通差不負可憐無地著樓居
歲除前日新彥招飲賦謝兼呈漢懷丈

崖菇石耳無凡味主孟良工歲晚謀兜舁雙雙能自至盡觴數數那容休游譚
眞送吾儕老雅故還教僻地收鄭重餘年買鄰約連墻花竹亦風流

質廡狹蹙資生之具充物戲命之螺殼鳥

品物圍狼藉歌啼亦此中我今螺殼鳥奚若鷄窠翁

癸未餞歲

稍憑詩力遣浮生飢鳳幽愁世不情剪燭迴光照無寐聽餘爆竹又鷄聲
譚邊爾日著駭癡淮海孤襟黯自知閱世幾擦今古憾光宣忽忽復何時

再疊酬夕堂

昨宵風雨欺茅屋羨汝藏山好夕堂夔府一翁煩致語象州二嶺費吟望托音
元亮無絃木卜命靈均不繫航性僻耽詩癡更絕歲除可使嬾求裳

次均呈養公

禹州手定始營家上將雄襟未算賒何日樓船歆表海要令郡縣置流沙晚來
詩律吳綾細興極書功趙璧華卅許年前經蒞蜀儒風人說勝劉霞

疊均酬孤桐

鬱此禿翁著作家雨床共命興彌賒天倪漫謂蒲爲脯聖解仍疑粥是沙猶憶
雄譚齊稷下爲求美諡楚章華若教生及同光世風格居然一建霞

寄衆非再疊

日下雲閒本一家豫章作棟望非賒十年東閣魚資水幾夢南颿雁落沙憂不
傷人矜玉貌閑能共我擷瓊華門風王謝詩溫李仙骨前身蔡少霞

三疊懷叔章不面積月矣

提今攀古不專家新法荆公願力賒危棟相望罪雷雨長河寧礙注泥沙菩提
坊裏羈禪病樞密堂中嘆歲華瓶鉢垂垂半天下可無名筆傲徐霞

孤桐於余論詩若不釋然賦此解嘲四疊

銅官家世屬通家我意君心託契賒何悔賦都資撫掌敢論見寶費披沙當時
王駱堂堂著並代淹遲簇簇華紙貴洛陽竟無紙南舟好爲致松霞

五疊重呈養公

肯共酸兒較作家南樓吟寄夜來賒萬功不屑鑄彝鼎一唾還當淨瘴沙傾祿
舊人衣屢浣語文稚子佩無華買絲雅欲平原繡歸乞針神老彩霞

山樓有懷六疊

一鉢身懸客當家漸來薪米乞人賒角樓雄據風飄瓦暝鳥狂歸浪捲沙吏隱
能兼供世笑悲歡何物送年華買歌影事癡仍憶哀管當筵白玉霞

七疊寄二適

援瑟尋吟忘憶家萬錢斗酒可容賒異才忍令歸黃祖健筆眞堪撼白沙萬疊

寒林呼欲出百三叢著載其華菰蘆人物君奇勝那數江東楊蔚霞

貧思江味戲作八疊

季鷹此日最思家秋晚蓴鱸雋趣賒癡豈人間求玉椀夢常隔下湧金沙范蠡
還欠扁舟具庾信何哀短髻華雅謔龍陽吾尙及江蝦風味擬江霞

自述九疊

龍門生世太邱家授簡成書願託賒終望真人興白水莫令羈客滯黃沙先塋
無恙碑猶闕弱妹愁知髮亦華骨肉九原安敢忘兄龍弟璧姊瓊霞

十疊呈養公

羣公高據鳳樓家慚有繩樞願已賒聖代都兪貌巖穴梵天瑰異護恆沙似聞
裴老推韓愈豈乞盧翁識任華安石碎金私付與懸教八表蔚湘霞

甲申開歲二日雨中喜壺天紫屏天瑞狷翁見過長句誌之

甲申

壺公蓮府翊了了清粹夕堂藝文曉鷹冠神鏘游八表碧湖鵝友降丁老扶春
過我螺殼島翫眼忽明觸瓊寶玄譚霜河一曲繞雄文泰華倚晴昊豈惟平子
愁絕倒戶居載陽失庭檣况復宅心非草草頽陽揮使中天表故事復修攘靈
藻委巷僊俚羞與道俛聽憇龍首頻掉蘼雨助喜禪床裊

壺天紫屏天瑞素言飲集

諸子賢哉多暇日先春酌我綠蘋洲朋情落落振衰疾詩德惓惓穆獻酬會促
難羈簾肆客興來欲叩野秫樓還期賞雨臨茆宇剪韭炊梁與媿謀

次均益生困雨

飛書安用老枚臬歡伯閑閑荐鬱陶酸臆紙堆皆史實惱春雨滴想人豪心如
明鏡塵難浣手植貞松黛漸高自獵一生艱阻厯使君近亦惜奇毛

上元夜兀坐

寒勒江花酒欲冰愁知人處避何能紙窗竹屋閒消受負卻邨街徹夜燈

聞知

聞知影好似當年舌底翻瀾惱夜眠九死歸來身化鶴猶憑殘夢想君憐

雨中飲省府諸君

輪與市樓好魚肉膩登來繞髻千門雨盟心百罰杯故人獨貧瘁諸相亦灰堆
刻意酬閑散彌憐望府才

次均新彥人日阻雨不果來

瘴鄉吟望髻絲殘閉置東坡泱晝寒癡處方將賦六合晚來寧祇避三端猶勞
人日詩筒寄已負江春酒盞寬聞說野塘梅萼好橫斜遲子踏泥看

伯帥常德凱旋賦呈

灞上諸軍兒戲耳幾憑神弩定天山行看東下降旛出不使南來匹馬還郭相

考勳古人少陶公運甓那時閒侯嬴老欲酬明德琢石浯溪筆未孱

疊均酬天瑞兩和長句

濤霍宿因未遽了懷賢風雨雞唱曉盛府元僚才表表介鸞贊鳳訖斯老天爲
韓公生賈島所遇况屬東南寶茶煙不動愁味繞興極挾欲躡層昊好詩雋永
啖蔗倒秋色峯巒幻映槁忽忽染翰不遑草頓使神明還舊弃候夢金繩與玉
藻蚯蚓詰曲安足道九衢無人臂可掉夕江頻有餘音裊

次均叔章見訊

懷君巴峽忽經年影事聊憑斷句傳青眼獨酬博聞友白頭未負結交篇誰教
蘇李睽南北漫向王盧較後先病枕遙憐同不寐幾驚寒月倚櫺邊

次均天瑞雨中放衙

碎雨尖風黯歲華朝寒披氅自煎茶索詩客至題纔半已見泥中吏放衙

次均天瑞苦雨

柳帘儂舞何心覩耐取寒廳匝月春落落彌天憐鍛翻滔滔逝水失恬鱗翻因拙疾饒詞寄稍賴良知嘗苦辛杜老日愁茅屋圯平生稷契願難伸

懷問樵

別子相期旬月耳何圖忽忽遽彌年一枝同悸崖鳶跼萬態常嗟野鶴賢塵務時經渾自詭美官熟念了無緣雨樓詩抱淒寒甚賸取中宵颺颺憐

膽瓶椽花妍發夕堂云宜詩

雲鬢久別江南地誤把椽花當牡丹明艷朝來影霞日解賺詞侶曲評看

味辛宣慰蒙邊使還郵示西北遊草

我愁蹕蹕滯西程君乃乘風萬里行雖不封侯亦可喜邊瑣雄異落詩裏十年所見異所聞君詩果抒肝鬲眞雨街數數枉軒騎時復設醴知我貧眩瞶歸臥

蠻江畔蝸涎鼠迹悽相親風味猶思罈子肉堆盤安取侯鯖珍積世閱人良已
多翻手咄嗟判雨雲看君懸心昔賢處節性雪白韜孝仁衆中況歎士武莖江
左尙可羊杜倫延息矢踐序詩諾章此千古金玉人

伯陵主席以册子乞題

功名盛處心彌小種柳江隄萬象涵听夕猶聞專左史雄襟何減杜平南

江干晚眺

雨霽漪嵐罨畫橋芳茵驄馬向人驕此中清士呼難出獨據漁磯數柳條
哭歌行國與心違頽晷憐無再杲時悔不早圖溫飽計連陂魚稻著癡兒

上巳坐雨

元巳雨風鏑惡例故人有約詎能來三朝陳迹皇皇索八表雄思怒怒灰臧霧
豹文深護惜乘軒鶴羽銜毳毳謝公病劇投窮海進退違方晚自哀

寄伯鷹實其飲河集

高嘯睨九州晚爲潘江伏响濡燕幕閒五年共歌哭斜簪嫵花事雄飲鑿詩局
彎弓示餘閑往往折吾鏃好句逢人說馳簡爲張日世或嗤黨羣余亦恧阿曲
官事癡不了新復衰著錄文流滄橫裂挈欲歸邊幅亘代雲龍才着心那肯俗
行見不脛走有井萬遍讀誼劇范島金功恢剖和璞牋天酬願力如願媵詞屋

疊均答公穌枉詩見懷

故人新有除書慶負却修名越十年自識趙翁詩倍好能懸陳榻世爭賢臧山
筠素應逾淨迷國俳諧莫作緣吾道何之付茫貿酸吟微許蚊夔憐

次均曉峯卽事用簡齋均

無益嘵歌遣有涯炊糜不熟勝蒸沙微憐生意窗前草幾負歸程陌上花亦任
小詩遍傳寫未嫌淡墨醉欹斜因人作熱嗟何說悔欠東陵學種瓜

再疊海屋

南來祇有渝州夢若別羣公萬歲年憑水寄書常不達杜門索句那能賢中宵
鈴鐸飄酸語丈室風花失世緣揀實梧枝無覓處倚天威鳳爲人憐

次均天瑞岳遊雨歸兼謝

中天旬夜雨愁子遽迷方薄宦猶蠻語雄歌本楚狂獻嘲山骨聳浸夢水心光
袖有青精貺憑茲鬱翥翔

次均公穌聞鵲

疇曩戴公山下宿聞聲爲謚有情癡英靈一代歸何所家國千端怒自知躍馬
臥龍同寂寞刺蛟射虎費年時西飛慰汝羈居憾待到黃花應不遲

次均嗣尙春興三首時館君衡陽天馬山別墅

眞賞蒼蒼攝萬虛竭來天角葦蘆偶符康伯尊充隱誰遣興公賦遂初蓮府

尚求龍翥筆柳池獨抱蟹行書一枰謬被兒曹壞縮手年時涕唾餘
妍春巒壑赴靈期失恨圍場脫鬣遲三致千金非乏術一匡九合可無時行勝
待發經邦策墜壁頻題擬古詩衡宇歸來擁松菊頌章荆俠屬何思
塵外高柔託意深靚粧唱遞綠天陰客來偶計收京事世促彌懸證佛心亦晒
鳶肩非俊物不嫌馱舌有凡音山堂逝果重棲喏抵汝霜前抱膝吟

溪上同嗣尚對新月

精拓歡日夕頽躬仗友生樹梢襯蟾影塘外遞蛙聲欹坐眉髭冷深譚肺鬲傾
海洲鏖戰急悽負買鄰情

次均伯仁初度有懷

鄰傅傷離歲王生信美鄉儘教嘲寂寂不減意堂堂夢應珠泉紀羹會玉膾嘗
崦嵫歲來迫持子鬪冥茫

次均新彥辱賀茅屋之成

東西南北吾安往，愁嘆靈均此卜居。
輟瑟難爲時彥說，捲書漸與古歡疏。
圖呈五嶽頻神往，瓢飲千江詎願餘。
轉腹彌天歌哭事，未妨鸚客說虞初。
才人不抉天慳處，負却坡翁乞鏡湖。
肯爲小園飾芬藻，猶聞下邑誚萊蕪。
喁喁稗議丹吾轂，森森中流倚此壺。
跂望勤來詫鄰曲，門前曾見是賢無。

贈丑行長俠雲

筍雪寒郊契結鄰，病閑念子百勞人。
湘州泉府侔天府，稍試才諧已絕倫。
贈余劍秋廳長

十年經建無遺畧，鄉國羣謳海殖功。
擺落凡榮暱樗散，古心直似倦知翁。
寄張星舫參政二首

荒江一屋雨風打，獨有參知肯見過。
故相緒餘善付囑，西征幕府已無多。

平生楊李重君賢，韜斂鋒棱任自然。
衛黨教才頭白盡，孤襟落落獨畊田。

寄彥遠洪江

五十年來好昆弟，論交海內莫之先。
握蛇騎虎天終貸，省事清心政可傳。
豈有贏金遺子姓，相期松笏嘯林泉。
思君今夜黔江月，茗蕚何由抵足眠。

除夕家飲

赴壑修虵逝，捫軒弱羽回。
晶瑩霏雪子，寒瑟蹙梅苔。
弟妹兵中至，笳鏡酒未催。
百艱強圍坐，愁似異鄉栳。

人日有懷新彥叔章子奇偁君乙酉

黃方薛李愁安往，獨遣頽翁殢野鄉。
眞夢乘車馳鼠穴，猶憐摻袂繞羊腸。
題詩遙寄春無恙，釀酒重圍寇正狂。
五十年中號無事，有生憾不際同光。

悽負

臧山經世嗟何有老賸扁舟拙疾身
悽負節翁書尺語江南名士祇三陳

月夜

山邨也有月照此不眠人
殘柝猶時夜寒燠那當春
百年尊示疾千賦拙斷貧
神禹茫茫域悽看裏虜塵

先妣諱日感賦

刳罅百罹吾閱盡強將避地當歸田
阿奴碌碌生何補不舉梧椽五十年

山館看梅賦長句

東風肯爲梅作計一夜吹開襍春意
蹙蹙衝寒連日看詎謂晚來仍好事
虬枝橫出拂池塘高花特峙綴徽志
尙書草堂三百梅分貺德人卓風誼
當年吟罷映手栽繁陰遽作山茨瑞
蜂闕午衙不自休魚暖香塵那容睡
畢生孤立天意憐樹亦隱芘翹位次
客過猶當儲胥看時移誰念典型墜
皓首生還攀故條百

端迫使沸酸喟醉魂恍倘喚之回不辭僵立冰雪地

飲罷山館看桃花

豈從僧伯排朝飲爲惜幽芳惹雨看悽賸劉郎吟眺處兔葵燕麥淚難乾

新田道中

淑霽驕春御莓莓百里田笕泉聲不斷松晷影常圓宿鳥憑人駛癡牛抱犢眠
晚颺曳巾幘羸取夢吟便

贈李含真秘書

才聲藉藉匡時略苦自山城典簿書健壯事功例強仕行看振翼嘯天衢

郊眺

雲臥千巒幻晦明篔簹初老麥芄生葦橋西畔鶯歌醉閒與棠花貸晚晴

過文蘭臯丈故居

石友驚憐化古邱蒲輪門巷想風流飄天冤蕩無人訴虛費豸區浹日留

許二弟仲京索書

隨分蠶茶有俸錢聾丞生世倚天憐皖江門館會三宿憶汝兒童竹馬年

歸程夕詠

願力行隨世緣盡些些去住豈容心
盪咍初喜鳩聲勸爭席頻呵鼠迹侵
儂石
雜花經雨大幕天重絮駕春深塵纓
矢買山泉濯詎奈人間日易沈

次均伯仁桂陽炸後避地見懷

家傳王霸怯論兵自卷琴書臥邑城
赤驥倚轡人競惜白鳥啄屋變彌驚
卅年
同涉風濤慣百里相望霧潦生安置
吾曹天意審何煩西去叩君平

次均伯仁江南兼寄

神臯七稔已無春愁把來章淚墨新
身後銘旌終乞汝莫忘題我冶城人

挽姚松圃

松圃先生高才至行中道倏捐兒味辛紀詩述哀誦之增友于之重用賦
俚句藉塞深悲

第五人爭羨何殊驃騎賢學成重譯國名顯棄襦年數歷金逾鍊清真玉比堅
百艱身許久烈烈祖生鞭

荆樁將母意飲憤遽還鄉沉瘁南陔膳驚危北虜狂孤眠負風雨祆夢踐池塘
終古人琴痛遙知淚萬行

右先君所著石船詩鈔若干卷孤女儀瑛於反哭虞祔之后始鈔錄校對畢功自慚淺陋無以知先人之學然隨侍几硯垂四十年凡有新篇手披口誦窺見師友之淵原故不敢避狂妄之譏輒書所聞以附諸后至於規矩旨趣則世之登詩壇者均自得之固不待煩言也先君少負神童之譽方在總卯才氣發據比事屬詞已驚老宿湘潭王湘綺大師講學衡陽船山寒家父祖昆弟著門籍者幾十人先君亦其一也湘綺經學文章俱追秦漢門下耻言宋元故先君少作頗擬顏謝旣冠之后徧覽名籍服官中外驟斬羣賢與義寧陳伯嚴三立恩施樊雲門增祥二先生遊備聞偉論漸卽宏通別后涂軌矣戰伐初起中樞遷渝先君往焉所撰留之湘中因以散失居渝六載雖烽火頻驚而吟詠益富還湘未幾忽尔陷寇林澗之中詩稿自隨乃重加覈閱茲編所存皆近十年作也平生敦厚哀樂過人而篤學不厭雖衰病曾未自休尤好少陵山谷之詩沉浸

其中臻於融會每有新製深思苦吟或廢眠食會心之處欣然忘憂若夫淵明之恬逸子建之識度康樂之工律東野之奇崛蓋兼有之矣昔大家繼續兄書文姬傳寫父作不肖如儀瑛者又盍足以及茲

三十五年丙戌仲夏孤女儀瑛謹識